

**AVESTA – the Sacred Books of
the Zoroastrians**

PART IV. Vendidad.

This edition copyright © 1995. by Joseph H. Peterson. Based on edition of Karl F. Geldner, *Avesta, the Sacred Books of the Parsis, Volume III - Vendidad*, Stuttgart, 1896.

This book of the *Avesta* contains myths, code of purification, and other religious observances.

pa nam ī yazdā

Fargard 1.

1. mraot ahurō mazdā spitamāi zaraθuštrāi, azəm daḍaḡ spitama zaraθuštra asō rāmō-dāitīm nōit̄ kudaṭ̄ šaitīm, yeidi-zī azəm nōit̄ daiḍyaḡ spitama zaraθuštra asō rāmō-dāitīm nōit̄ kudaṭ̄ šaitīm vīspō aḡhuš astvā airyanəm vaējō frāšnvaṭ̄.

2. paoirīm asaḡḡamca šōiθranamca vahištəm frāθwərəsəm azəm yō ahurō mazdā airyanəm vaējō vaḡhuyā dāityayā. āaṭ̄ ahe paityārəm frākərəṅtaṭ̄ aḡrō mainyuš pouru-mahrkō aḡimca yim raoiḍitəm zyamca daēvō-dātəm,

3. dasa avaθra māḡhō zayana dva ḡamina taēca hēṅti sarəta āpō sarəta zəmō sarəta urvarayā aḍa zimahe maiḍim aḍa zimahe zarəḍaēm aḍa zyāsciṭ̄ pairi-pataiti aḍa fraēštəm vōiḡnanam.

4. bitīm asaḡḡamca šōiθranamca vahištəm frāθwərəsəm azəm yō ahurō mazdā

ḡaum yim suḡḍō-šayanəm,

āaṭ̄ ahe paityārəm frākərəṅtaṭ̄ aḡrō mainyuš pouru-mahrkō skaitīm yaḡ gavaca dayaca pouru-mahrkəm.

5. θritīm asaḡḡamca šōiθranamca vahištəm frāθwərəsəm azəm yō ahurō mazdā

mōurum sūrəm ašavanəm,

āaṭ̄ ahe paityārəm frākərəṅtaṭ̄ aḡrō mainyuš pouru-mahrkō marəḍamca vīθušamca.

6. tūirīm asaḡḡamca šōiθranamca vahištəm frāθwərəsəm azəm yō ahurō mazdā

bāxḍim srīraḡm ərəḍwō-draḡšam,

āaṭ̄ ahe paityārəm frākərəṅtaṭ̄ aḡrō mainyuš pouru-mahrkō bravarəmca usaḍasca.

7. puxḍəm asaḡḡamca šōiθranamca vahištəm frāθwərəsəm azəm yō ahurō mazdā nisāim yim aḡtarə mōurumca bāxḍimca, āaṭ̄ ahe paityārəm frākərəṅtaṭ̄ aḡrō mainyuš pouru-mahrkō aḡamca vīmanō-hīm.

8. xštūm asaḡḡamca šōiθranamca vahištəm frāθwərəsəm azəm yō ahurō mazdā

harōyūm yim viš-harəzanəm,

āaṭ̄ ahe paityārəm frākərəṅtaṭ̄ aḡrō mainyuš pouru-mahrkō saraskəmca driwikāca.

9. haptaθəm asaḡḡamca šōiθranamca vahištəm frāθwərəsəm azəm yō ahurō mazdā vaēkərətəm yim dūzakō-sayanəm, āaṭ̄ ahe paityārəm frākərəṅtaṭ̄ aḡrō mainyuš pouru-mahrkō pairikaḡm yaḡ xḡaṭ̄aite yā uraḡhacaṭ̄ kərəsāspəm.

10. aštəməm asaṇḥamca šōiθranamca vahištəm frāθwərəsəm azəm yō ahurō mazdā urvaṃ pouru-vāstram, āaṭ ahe paityārəm frākərəṇtaṭ aṇrō mainyuš pouru-mahrkō aya aiwištāra.

11. nāuməm asaṇḥamca šōiθranamca vahištəm frāθwərəsəm azəm yō ahurō mazdā xnəṇtəm yim vəhrkānō-šayanəm, āaṭ ahe paityārəm frākərəṇtaṭ aṇrō mainyuš pouru-mahrkō aya anāpərəθa šyaoθna yā narō-vaēpaya.

12. dasəməm asaṇḥamca šōiθranamca vahištəm frāθwərəsəm azəm yō ahurō mazdā harax'aitīm srīraṃ, āaṭ ahe paityārəm frākərəṇtaṭ aṇrō mainyuš pouru-mahrkō aya anāpərəθa šyaoθna yā nasuspaya.

13. aēvaṇdasəm asaṇḥamca šōiθranamca vahištəm frāθwərəsəm azəm yō ahurō mazdā haētumaṇtəm raēvaṇtəm x'arənaḡuḥaṇtəm, āaṭ ahe paityārəm frākərəṇtaṭ aṇrō mainyuš pouru-mahrkō aya yātava,

14. aēmca ahe ciθrō daxštō aṇḥaṭ aēm ciθrō-paiti-dayō yaθa kavaciṭ jasən zaoyeche yātumaṇtəm aḍa həṇti yātumastama aḍa taēcīṭ uzjasəṇti yā mərəṇcyāica zaraḍaḡnyāica xštamicatca maḍaxaheca.

15. dvadasəm asaṇḥamca šōiθranamca vahištəm frāθwərəsəm azəm yō ahurō mazdā raḡam θrizanṭūm, āaṭ ahe paityārəm frākərəṇtaṭ aṇrō mainyuš pouru-mahrkō aḡəmca uparō-vīmanō-hīm.

16. θridasəm asaṇḥamca šōiθranamca vahištəm frāθwərəsəm azəm yō ahurō mazdā

caxrəm sūrəm ašavanəm,

āaṭ ahe paityārəm frākərəṇtaṭ aṇrō mainyuš pouru-mahrkō aya anāpərəθa šyaoθna yā nasuspacya.

17. caθrudasəm asaṇḥamca šōiθranamca vahištəm frāθwərəsəm azəm yō ahurō mazdā varənəm yim caθru-gaošəm yahmāi zayata θraētaonō jaṇta ažōiš dahākāi, āaṭ ahe paityārəm frākərəṇtaṭ aṇrō mainyuš pouru-mahrkō araθwyāca daxšta anairyāca daiṇhuš-aiwištāra.

18. paṇcdasəm asaṇḥamca šōiθranamca vahištəm frāθwərəsəm azəm yō ahurō mazdā yō hapta həṇdu, āaṭ ahe paityārəm frākərəṇtaṭ aṇrō mainyuš pouru-mahrkō araθwyāca daxšta araθwīmca garəmāum.

19. xšvaš-dasəm asaṇḥamca šōiθranamca vahištəm frāθwərəsəm azəm yō ahurō mazdā upa aodaēšū raṇḥayā yō asārō aiwyāxšayeṇti, āaṭ ahe paityārəm frākərəṇtaṭ aṇrō mainyuš pouru-mahrkō zyamca daēvō-dātəm taožyāca daiṇhuš-aiwištāra.

20. həṇti anyāsciṭ asāasca šōiθrāasca srīrāasca gufrāasca bərəxdāasca frašāasca bāmyāasca.

ašəm vohū.....

2.

1. pərəsaṭ zaraθuštrō ahurəm mazdām,
ahura mazda mainyō
spəništa dātərə gaēθanaṃ

astvaitinam ašāum
kahmāi paairyō mašyānam apərəsə-tūm yō ahurō mazdā anyō mana yaṭ
zaraθuštrāi,
kahmāi fradaēs ayō daēnam
yaṃ āhūrīm zaraθuštrīm.

2. āaṭ mraoṭ ahurō mazdā,
yimāi srīrāi hvəθwāi ašāum zaraθuštra ahmāi paairyō mašyānam
apərəse azəm yō ahurō mazdā
anyō θwaṭ yaṭ zaraθuštrāt,
ahmāi fradaēsaēm daēnam
yaṃ āhūrīm zaraθuštrīm.

3. āaṭ hē mraoṭ zaraθuštra
azəm yō ahurō mazdā,
vīsaṅha mē yima srīra vīvaṅhana
mərətō bərətaca daēnayāi,
āaṭ mē aēm paityaoxta
yimō srīrō zaraθuštra,
nōiṭ dātō ahmi nōiṭ cistō
mərətō bərətaca daēnayāi.

4. āaṭ hē mraom zaraθuštra
azəm yō ahurō mazdā,
yezi mē yima nōiṭ vīvise
mərətō bərətaca daēnayāi
āaṭ mē gaēθā frādaya āaṭ mē gaēθā varədaya āaṭ mē vīsāi gaēθanam θrātāca
harātāca aiwyāxštaca.

5. āaṭ mē aēm paityaoxta
yimō srīrō zaraθuštra,
azəm tē gaēθā frādayeni azəm tē gaēθā varədayeni azəm tē vīsāne gaēθanam
θrātāca harātāca aiwyāxštaca,
nōiṭ mana xšaθre bvaṭ aotō vātō nōiṭ garəmō nōiṭ axtiš nōiṭ mahrkō.

6. āaṭ hē zaya frabarəm
azəm yō ahurō mazdā
suwraṃ zaranaēnīm aštraṃca zaranyō-paēsīm.

7. yimō asti bərəθe xšaθrayā.

8. āaṭ yimāi xšaθrāi θrisatō-zima haṅjasənti,
āaṭ hē im zā bvaṭ pərəne
pasvaṃca staoranamca
mašyānamca sūnamca vayamca
āθraṃca suxraṃ saociṇṭam
nōiṭ hīm gātvō viṇḍən
pasvasca staorāca mašyāca.

9. āaṭ yimāi paiti-vaēdaēm,
yima srīra vīvaṅhana
pərəne im zā haṅgata
pasvaṃca staoranamca

mašyānamca sūnamca vayamca
 āθramca suxram saociñtam
 nōiñ hīm gātvō viñdēñti
 pasvasca staorāca mašyāca.

10. āaṭ yimō frašūsaṭ raocā ā upa rapīθwam hū paiti adwanəm,
 hō imam zam aiwišvaṭ
 suwrya zaranaēnya
 avi dim sifaṭ aštraya
 uityaojanō,
 friθa spēnta ārmaite
 fracā šva vīca nēmañha
 barəθre pasvamca staoranamca mašyānamca.

11. āaṭ yimō imam zam višāvayaṭ aēva θrišva ahmāt masyehīm yaθa
 para ahmāt as, tēm iθra fracarēnta pasvasca staorāca mašyāca hvam anu
 uštīm zaošəmca
 yaθa kaθaca hē zaošō.

12-14. āaṭ yimāi xšaθrāi xšvaš-satō-zima hanjasēnti, āaṭ hē im zā bvaṭ
 pəṛəne¹ ... mašyānamca.

15. āaṭ yimō imam zam višāvayaṭ dva θrišva ahmāt masyehīm yaθa para
 ahmāt as, tēm iθra fracarēnta pasvasca staorāca mašyāca hvam anu uštīm
 zaošəmca yaθa kaθaca hē zaošō.

16. āaṭ yimāi xšaθrāi nava-satō-zima hanjasēnti, āaṭ hē im zā bvaṭ
 pəṛəne pasvamca staoranamca mašyānamca sūnamca vayamca āθramca
 suxram saociñtam, nōiñ hīm gātvō viñdēñ pasvasca staorāca mašyāca.

17. āaṭ yimāi paiti-vaēdaēm, yima srīra vīvañhana pəṛəne im zā haṅgata
 pasvamca staoranamca mašyānamca sūnamca vayamca āθramca suxram
 saociñtam, nōiñ hīm gātvō viñdēñti pasvasca staorāca mašyāca.

18. āaṭ yimō frašūsaṭ raocā ā upa rapīθwam hū paiti adwanəm, hō imam
 zam aiwišvaṭ suwrya zaranaēnya avi dim sifaṭ aštraya uityaojanō, friθa
 spēnta ārmaite fracā šva vīca nēmañha barəθre pasvamca staoranamca
 mašyānamca.

19. āaṭ yimō imam zam višāvayaṭ θribyō θrišvaēibyō ahmāt masyehīm
 yaθa para ahmāt as, tēm iθra fracarēnta pasvasca staorāca mašyāca hvam anu
 uštīm zaošəmca yaθa kaθaca hē zaošō.

20. hanjamanəm frabarata yō daḍvā ahurō mazdā haθra mainyaoibyō
 yazataēibyō srūtō airylene vaējahi vañhuyā dāityayā, hanjamanəm frabarata
 yō yimō xšaētō hvāθwō haθra vahištaēibyō mašyākaēibyō srūtō airylene
 vaējahi vañhuyā dāityayā.

21. ā-taṭ hanjamanəm paiti-jasaṭ yō daḍvā ahurō mazdā haθra
 mainyaoibyō yazataēibyō srūtō airylene vaējahi vañhuyā dāityayā, ā-taṭ

1 = Parr. 8-10.

hanjamanəm paiti-jasāt yō yimō xšaētō hvaθwō haθra vahištaēibyō mašyākaēibyō srūtō airylene vaējahi vaṅhuyā dāityayā.

22. āaṭ aoxta ahurō mazdā yimāi, yima srīra vīvaṅhana avi ahūm astvaṅtəm aγəm zimō jaṅhəntu yahmaṭ haca staxrō mrūrō zyā, avi ahūm astvaṅtəm aγəm zimō jaṅhəntu yahmaṭ haca paurvō snaoδō vafra snaēžāt barəzištaēibyō gairibyō bašnubyō arəduyā.

23. θrižatca ida yima gōuš apa-jasāt yaṭca aṅhaṭ θvyaštəmaēšū asanḅam yaṭca aṅhaṭ barəšnuš paiti gairinam yaṭca jaṅnušva raonam paxrumaēšū nmānaēšū.

24. parō zimō aētaṅhā
daṅhuš aṅhaṭ bəratō vāstrəm
təm āfš paurva vazaiḍyāi
pasca vītaxti vafrahe

abdaca ida yima aṅuhe astvaite sadayāt yaṭ ida pasōuš anumayehe paδəm vaēnāite.

25. āaṭ təm varəm kərənava carətu-drājō kəmciṭ paiti caθrušanam haθra taoxma upa-bara pasvaṃca staoranamca mašyānamca sūnamca vayamca āθramca suxram saocintam, āaṭ təm varəm kərənava carətu-drājō kəmciṭ paiti caθrušanam naram aiwi-xšōiθne carətu-drājō kəmciṭ paiti caθrušanam gavam gāvayanəm.

26. haθra āpəm frātaṭ-caya
hāθrō-masanḅəm aδwanəm
haθra marəγā avastaya,
avi maṭ zairi-gaonəm maṭ x^vairyeite ajaminəm,
haθra nmānā avastaya
katəmca fraskəmbəmca fravārəmca pairi-vārəmca.

27. haθra vīspanam naram nāirinamca taoxma upa-bara yōi hənti aiṅhā zəmō mazištaca vahištaca sraēštaca, haθra vīspanam gōuš sarədanam taoxma upa-bara yōi hənti aiṅhā zəmō mazištaca vahištaca sraēštaca.

28. haθra vīspanam urvaranam taoxma upa-bara yōi hənti aiṅhā zəmō barəzištaca hubaoiḍitəmaca, haθra vīspanam x^varəθanam taoxma upa-bara yōi hənti aiṅhā zəmō x^varəzištaca hubaoiḍitəmaca, tē kərənava miθwaire ajaminəm vīspəm ā ahmāt yaṭ aēte narō varəfšva aṅhən.

29. mā aθra frakavō mā apakavō mā apāvayō mā harəḍiš mā driwiš mā daiwiš mā kasviš mā vizbāriš mā vīmītō-dantānō mā paēsō yō vītəratō-tanuš māḍa-cim anyam daxstanam yōi hənti aṅrahe mainyōuš daxštəm mašyāišca paiti niḍātəm.

30. fratəməm daiṅhəuš nava pərəθwō kərənava maδəmō xšvaš nitəmō tišrō, fratəməm pərəθwō hazanrəm naram nāirinamca taoxma upa-bara maδəmō xšvaš sata nitəmō tišrō sata, aiwica tē varəfšva suwrya zaranaēnya

apica təm varəm marəza
dvarəm raocanəm x^vāraoxšnəm aṅtarə-naēmāt.

31. āaṭ mašta yimō, kuθa tē azəm varəm kərənavāne yā mē aoxta ahurō mazdā, āaṭ aoxta ahurō mazdā yimāi, yima srīra vīvanhāna aiñhā zəmə pāšnābya vīspara zastaēibya vīxada maṇayən ahe yaθa nū mašyāka xšivisti zəmə vīšāvayeinte.

32. āaṭ yimō avaθa kərənaoṭ yaθa dim išaṭ ahurō mazdā aiñhā zəmə pāšnābya vīsparaṭ zastaēibya vīxadaṭ maṇayən ahe yaθa nū mašyāka xšivisti zəmə vīšāvayeinte.

33. āaṭ yimō varəm kərənaoṭ carətu-drājō kəmcit̄ paiti caθrušanəm, haθra taoxma upa-baraṭ pasvaṃca staoranəmca mašyānəmca sūnəmca vayəmca āθraṃca suxrəm saocintəm, āaṭ yimō varəm kərənaoṭ carətu-drājō kəmcit̄ paiti caθrušanəm narəm aiwi-xšōiθne carətu-drājō kəmcit̄ paiti caθrušanəm gavəm gāvayanəm.

34. haθra āpəm frātaṭ-cayaṭ
hāθrō-masaṅhəm aḍwanəm
haθra marəγā avastayaṭ
avi maṭ zairi-gaonəm maṭ x^vairyeite ajaminəm,
haθra nmānā avastayaṭ
katəmca fraskəmbəmca fravārəmca pairi-vārəmca.

35. haθra vīspanəm narəm nāirinəmca taoxma upa-baraṭ yōi hənṭi aiñhā zəmə mazištaca vahīštaca sraēštaca, haθra vīspanəm gəuš sarədanəm taoxma upa-baraṭ yōi hənṭi aiñhā zəmə mazištaca vahīštaca sraēštaca.

36. haθra vīspanəm urvaranəm taoxma upa-baraṭ yōi hənṭi aiñhā zəmə barəzištaca hubaoiḍitəmca, haθra vīspanəm x^varəθanəm taoxma upa-baraṭ yōi hənṭi aiñhā zəmə x^varəzištaca hubaoiḍitəmca, tē kərənaoṭ miθwaire ajaminəm vīspəm ā ahmāt yaṭ aēte narō varəfšva aṅhən.

37. nōit̄ aθra frakavō nōit̄ apakavō nōit̄ apāvayō nōit̄ harədiš nōit̄ driwiš nōit̄ daiwiš nōit̄ kasviš nōit̄ vīzbāriš nōit̄ vīmitō-daṇtānō nōit̄ paēsō yō vītərətō-tanuš naēda-cim anyəm daxštanəm yōi hənṭi aṅrahe mainyēuš daxštəm mašyāišca paiti nidātəm.

38. fratəməm daiñhēuš nava pərəθwō kərənaoṭ madəmə xšvaš nitəmō tišrō fratəməm pərəθwō hazanrəm narəm nāirinəmca taoxma upa-baraṭ madəmə xšvaš sata nitəmō tišrō sata, aiwica hō varəfšva suwrya zaranaēnya apica hō varəm marəzaṭ dvarəm raocanəm x^vāraoxšnəm aṅtarə-naēmāt.

39. dātarə gaēθanəm astvaitinəm ašāum cayō āaṭ aēte raocā aṅhən ašāum ahura mazda yō avaθa ā-raocayeite aētaēšva varəfšva yō yimō kərənaoṭ.

40. āaṭ aoxta ahurō mazdā, x^vadātaca raocā stiḍātaca, hakərət̄ zi irixtahe saḍayaca vaēnaite starasca māšca hvarəca.

41. taēca ayarə mainyēnte yaṭ yarə, caθwarəsətəm aiwi-gāmanəm dvaēibya haca nərəbya dva nara us-zayeinte miθwana strica nairyasca aθa aētaēšəm yōi gəuš sarədanəm, taēca narō sraēšta gaya jvainṭi aētaēšva varəfšva yō yimō kərənaoṭ.

42. dātarə gaēθanəm astvaitinəm ašāum, kō avaθa daēnəm māzdayasnīm vī-baraṭ aētaēšva varəfšva yō yimō kərənaoṭ, āaṭ aoxta ahurō mazdā, vīš karšipta spitama zaraθuštra.

43. dātarə ... ašāum, kō aēšam asti aḡhuca ratušca, āaṭ mraoṭ ahurō mazdā, urvataṭ-narō zaraθuštra tūmca yō zaraθuštrō. ašəm vohū.....

3.

1. dātarə gaēθanam astvaitinam ašāum, kva paoirīm aiṅhā zəmə šaištəm, āaṭ mraoṭ ahurō mazdā, yaṭ bā paiti nā ašava frayaṭ spitama zaraθuštra aēsmō-zastō barəsmō-zastō gao-zastō hāvanō-zastō āxštaēda daēnaya vaca framrū miθrəmca vouru-gaoyaoitīm jaiḍya rāmaca x'āstrəm.

2. dātarə ... ašāum, kva bitīm aiṅhā zəmə šaištəm, āaṭ mraoṭ ahurō mazdā, yaṭ bā paiti nā ašava nmānəm uzdasta āθravaṭ gaomavaṭ nāirivaṭ puθravaṭ hvāθwavaṭ.

3. āaṭ pascaēta ahe nmānahe frapiθwō gāuš frapiθwō ašəm frapiθwō vastrəm frapiθwō spā frapiθwō nāirika frapiθwō apərənāyūkō frapiθwō ātarš frapiθwō vīspam hujyāitiš.

4. dātarə ... ašāum, kva θritīm aiṅhā zəmə šaištəm, āaṭ mraoṭ ahurō mazdā, yaṭ bā paiti fraēštəm kārayeiti spitama zaraθuštra yavanamca vāstranamca urvaranamca x'arəθō-bairyanam yaṭ vā anāpəm āi āpəm kərənaoiti yaṭ vā āpəm āi anāpəm kərənaoiti.

5. dātarə ... ašāum, kva tūirīm aiṅhā zəmə šaištəm, āaṭ mraoṭ ahurō mazdā, yaṭ bā paiti fraēštəm us-zīzəṅti pasvasca staorāca.

6. dātarə ... ašāum, kva puxdəm aiṅhā zəmə šaištəm, āaṭ mraoṭ ahurō mazdā, yaṭ bā paiti fraēštəm maēzəṅti pasvasca staorāca.

7. dātarə ... ašāum, kva paoirīm aiṅhā zəmə ašāištəm, āaṭ mraoṭ ahurō mazdā, yaṭ arəzūrahe grīvaya spitama zaraθuštra yaṭ ahmya daēva haṇdvarəṅti druḷō haca gərəḍāda.

8. dātarə ... ašāum, kva bitīm aiṅhā zəmə ašāištəm, āaṭ mraoṭ ahurō mazdā, yaṭ bā paiti fraēštəm sairi nikaṅte spānasca irista naraēca irista.

9. dātarə ... ašāum, kva θritīm aiṅhā zəmə ašāištəm, āaṭ mraoṭ ahurō mazdā, yaṭ bā paiti fraēštəm daxma uzdaēza kiryeiṅte yahmya narō irista niḍayeiṅte.

10. dātarə ... ašāum, kva tūirīm aiṅhā zəmə ašāištəm, āaṭ mraoṭ ahurō mazdā, yaṭ bā paiti fraēštəm bavaiṅti aṅrō-mainyavanam gərəḍam.

11. dātarə ... ašāum, kva puxdəm aiṅhā zəmə ašāištəm, āaṭ mraoṭ ahurō mazdā, yaṭ bā paiti narš ašaoṇō spitama zaraθuštra nāirikaca apərənāyūkasca varaiθīm paṅṭam azoiṭ pašnvāṅhəm hikvāṅhəm jarəzīm baraiti vācim.

12. dātarə ... ašāum, kō paoirīm imam zam mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti fraēštəm uskəṅti yahmya sairi nikaṅte spānasca irista naraēca irista.

13. dātarə ... ašāum kō bitīm imam zam mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti fraēštəm daxma uzdaēza vīkaṅti yahmya narō irista niḍayeiṅte.

14. mā-ciš barō aēvō yaṭ iristēm, āaṭ yezi-šē barāt aēvō yaṭ iristēm upa vā nasuš raēθwāt nāṇhanaṭ haca cašmanaṭ haca hizumaṭ haca paitiš-xʻarənāda fravāxšaṭ haca frašumakaṭ haca tē, aēšam paiti sruye aēša druxš yā nasuš upa-dvāšaiti, ayaoždya pascaēta bavaiṇti yavaēca yavaētātaēca.

15. dātarə ... ašāum kva aētahe narš gātuš aṇhaṭ yaṭ iristō-kašahe, āaṭ mraoṭ ahurō mazdā, yaṭ aṇhaṭ aiṇhā zəmō vī-āpō-təmēmca vī-urvarō-təmēmca yaoždātō-zəmōtəmēmca hušō-zəmōtəmēmca kambištēmca aēte paθā frayaṇ pasvasca staorāca ātrēmca ahurahe mazdā barəsmaca ašaya frastarētəm narēmca yim ašavanəm.

16. dātarə ... ašāum cvaṭ drājō haca āθraṭ cvaṭ drājō haca apaṭ cvaṭ drājō haca barəsmən frastairyāt cvaṭ drājō haca nərəbyō ašavabyō.

17. āaṭ mraoṭ ahurō mazdā, θrisata-gāim haca āθraṭ θrisata-gāim haca apaṭ θrisata-gāim haca barəsmən frastairyāt θrigāim haca nərəbyō ašavabyō.

18. aētaða hē aēte mazdayasna aiṇhā zəmō pairi-daēzāṇ pairi-daēzayaṇ, xʻarəθaēibyō pascaēta āstayaṇta aēte yōi mazdayasna vastrāēibyō pascaēta āstayaṇta aēte yōi mazdayasna.

19. draējištōtəmaēšvaca niuruzdōtəmaēšvaca aētā xʻarəθā xʻaratu aētā vastrā vaṇhatu vīspəm ā ahmāt yaṭ hanō vā zaururō vā pairištā-xšudrō vā bavāt.

20. āaṭ yaṭ hanō vā zaururō vā pairištā-xšudrō vā bavāt aojištēmca dim pascaēta mazdayasna taṇcištēmca vaēdyōtəmēmca upa-maitīm barəzaṇḥam paštō-fraθaṇhəm hē kamərəðəm vīnāθayən aš-xʻarətəmaēibyō spəntō-mainyavanam dāmanam kərəfš-xʻarəm kərəfš paiti nisrinuyāt vayam kahrkāšam uityaojanō, avā hīm paiti miθnāiti vīspəm dušmatēmca dužuxtēmca dužvarštēmca

21. yezica hē anya aya šyaoθna fravaršta paitita hē ciθa āaṭ yezi-šē anya aya šyaoθna nōiṭ fravaršta paititəm ahe narš yavaēca yavaētātaēca.

22. dātarə ... ašāum kō θritīm imam zam mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti fraēštəm vīkəṇte aṇrō-mainyavanam gərəðam.

23. dātarə ... ašāum kō tūirīm imam zam mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti fraēštəm kārayeiti spitama zaraθuštra yavanamca vāstranamca urvaranamca xʻarəθōbairyanam yaṭ vā anāpəm āi āpəm kərənaoiti yaṭ vā āpəm āi anāpəm kərənaoiti.

24. nōiṭ zī im zā šā yā darəya akaršta saēta yā karšya karšivata aibiš taṭ vaṇhəuš aiwi-šōiθna iða carāiti huraoða yā darəya apuθra aēti aibiš taṭ vaṇhəuš aršānō.

25. yō imam zam aiwi-vərəzyeiti spitama zaraθuštra hāvōya bāzvō dašinaca dašina bāzvō haoyaca

upa hē gaonəm baraiti
 maṇayən ahe yaθa-nā fryō fryāi vaṇtaoe starəta gātuš sayamanō puθrəm vā
 gaonəm vā avi ava-baraiti.

26. yō iməm zaṃ aiwi-vərəzeyeiti spitama zaraθuštra hāvōya bāzvō
 dašīnaca dašīna bāzvō haoyaca
 āaṭ aoxta īm zā, nara
 yō məm aiwi-vərəzeyeihi
 hāvōya bāzvō dašīnaca
 dašīna bāzvō haoyaca

27. bāda ida āfrasāne daṇhubyō
 bāda ida aēni bərəθi
 vīspā xʼarəntīš para-barəṇ
 haṃbərəθwəm parō yavahe.

28. yō iməm zaṃ nōiṭ aiwi-vərəzeyeiti spitama zaraθuštra hāvōya bāzvō
 dašīnaca dašīna bāzvō haoyaca

āaṭ aoxta īm zā, nara
 yō məm nōiṭ aiwi-vərəzeyeihi
 hāvōya bāzvō dašīnaca
 dašīna bāzvō haoyaca

29. bāda ida hištahe anyehe dvarə srayanō xʼarəntīš
 pərəsəmmaēšuca,
 bāda θwəm tarasca āṇhānō
 srasciṭīš xʼarəθā bairyeiṇte
 tē ābya bairyeiṇte
 yaēšəm dim frāyō vohunəm.

30. dātərə gaēθanəm astvaitinəm ašaum kaṭ asti daēnayā māzdayasnōiš
 uruθwarə, āaṭ mraoṭ ahurō mazdā, yaṭ uyrəm paiti yaokaršti spitama
 zaraθuštra.

31. yō yaom kārayeiti hō ašəm kārayeiti, hō daēnaṃ māzdayasnīm
 fravāza vazaiṭe, hō iməm daēnaṃ māzdayasnīm fraṇinaoiti satəm
 paitištānəm hazarəṇəm paiti-daranəm baēvarə paiti yasnō-kərəitinəm.

32. yaṭ yavō dayāt āaṭ daēva xʼisən yaṭ suduš dayāt āaṭ daēva tusən yaṭ
 pištrō dayāt āaṭ daēva uruθən yaṭ guṇdō dayāt āaṭ daēva pərədən, ida miθnāt
 daēva aipi-jaiṇti nmāne aiṇhāi guṇdayāi

zafarə tafsaṇ aya masō
 haṃ-urvišvāṇhō sadayeiti
 yaṭ yavō pouruš bavāt.

33. aḍa maθrəm taḍa mairyāt,
 naēciš axʼarəṇtəm tva

nōiṭ uyrəm ašayəm nōiṭ uyrəm vāstryəm nōiṭ uyrəm puθrōištīm, xʼāšaya
 zī vīspō aṇhuš astvā jvaiṇti axʼāše framiryēite.

34. dātarə gaēθanəm astvaitinəm ašāum kō puxδəm iməm zəm mazišta xšnaoma xšnāvayeiti, āaṭ mraoṭ ahurō mazdā, yaṭ bā paiti spitama zaraθuštra aiṅhā zəmə naire ašaone vərəzyāṭ ašaya dadāiti.

35. yaṭ bā paiti spitama zaraθuštra aiṅhā zəmə naire ašaone vərəzyāṭ ašaya vaṅhuya nōiṭ dadāiti avi təm spayāṭ spəntayā ārmatōiš təmō āca vaēšō āca acištəm āca ahūm ā vīspaca avi tiṅra nimata.

36. dātarə gaēθanəm astvaitinəm ašāum yaṭ aiṅhā zəmə nikaṅte spānasca irista naraēca irista naēməm yārə-drājō anuskante kā-hē asti ciθa, āaṭ mraoṭ ahurō mazdā, paṅca sata upāzananəm upāzōiṭ aspahe aštraya paṅca sata sraošō-caranaya.

37. dātarə ... ašāum yaṭ aiṅhā zəmə nikaṅte spānasca irista naraēca irista yārə-drājō anuskante kā hē asti ciθa, āaṭ mraoṭ ahurō mazdā, hazarəm upāzananəm upāzōiṭ aspahe aštraya hazarəm sraošō-caranaya.

38. dātarə ... ašāum yaṭ aiṅhā zəmə nikaṅte spānasca irista naraēca irista byārə-drājō anuskante kā hē asti ciθa kā-hē asti āpərətiš kaṭ hē asti yaozdāθrəm.

39. āaṭ mraoṭ ahurō mazdā, nava-hē asti ciθa nava-hē asti āpərətiš nōiṭ hē asti yaozdāθrəm anāpərəθa haca šyaoθna yavaēca yavaētātaēca.

40. kva aēva, yezi aṅhaṭ āstūtō vā aiwi-sravanō vā daēnəm māzdayasnīm āaṭ yezi aṅhaṭ anāstūtō vā anaiwi-sravanō vā daēnəm māzdayasnīm, aētāciṭ aēibyō spāṅhaite āstavanaēibyō daēnəm māzdayasnīm əvərəzənbyō pascaēta araθwya šyaoθna.

41. spayeite zī spitama zaraθuštra daēna māzdayasniš narš āstavanahe baṅdəm spayeite draošəm spayeite ašavaṅnīm spayeite nasuspaēm spayeite anāpərəθəm šyaoθnəm spayeite dərəzānō-pərətəm pārəm spayeite vīspa tā šyaoθna yā-cica vərəzyeiti.

42. maṅayən ahe spitama zaraθuštra daēna māzdayasniš narš ašaonō framərəzaiti vīspəm dušmatəmca dužuxtəmca dužvarštəmca yaθa vātō dərəzi-takaθrō θwāšəm dašīnāṭ pairi framərəzōiṭ, [vohu ida zaraθuštra hvarštəm šyaoθnəm vərəzīmənəm vaṅuhi daēna māzdayasniš pərənāyūš ciθəm θwərəsaiti].

ašəm vohū.....

4.

1. yō naire nəmaṅhəṅte
nōiṭ nəmō paiti-baraiti
tāyūš nəmaṅhō bavaiti
hazaṅha nəmō-barahe
aēšamciṭ iθra vā asni iθra vā xšafne maēθanahe x'ai pairi-gəurvayeite.

2. dātarə gaēθanəm astvaitinəm ašāum caiti aēte miθra tava yaṭ ahurahe mazdā, āaṭ mraoṭ ahurō mazdā, xšvaš ašāum zaraθuštra paoiryō vacahinō

bityō zastā-marštō θrityō pasu-mazō tūiryō staorō-mazō puxdō vīrō-mazō xšt̄vō daijhu-mazō, [yō daijhave hu-vaxšāi fradəmnahe varōdəmnahe xraθwəmnahe suyamnahe].

3. vacō paoirīm miθrēm kərənaoiti zastō-masō adāt framarəzaiti zastō-masō adāt aņtarə urvaiya fradaθaiti, pasu-zamō adāt framarəzaiti pasu-zamō adāt aņtarə urvaiya fradaθaiti.

4. staorō-mazō adāt framarəzaiti staorō-mazō adāt aņtarə urvaiya fradaθaiti, vīrō-mazō adāt framarəzaiti vīrō-mazō adāt aņtarə urvaiya fradaθaiti, daijhu-mazō adāt framarəzaiti daijhu-mazō adāt aņtarə urvaiya fradaθaiti.

5. dātarə ... ašāum cvaṭ aēšō miθrō aiwi-druxtō āstāraitī yō vacahinō, āaṭ mraoṭ ahurō mazdā, θriš satāiš haḍa-ciθanəm narəm nabānazdištanəm para-baraiti.

6. dātarə ... ašāum cvaṭ aēšō miθrō aiwi-druxtō āstāraitī yō zastā-marštō, āaṭ mraoṭ ahurō mazdā, xšvaš satāiš haḍa-ciθanəm narəm nabānazdištanəm para-baraiti.

7. dātarə ... ašāum cvaṭ aēšō miθrō aiwi-druxtō āstāraitī yō pasu-mazō, āaṭ mraoṭ ahurō mazdā, hapta satāiš haḍa-ciθanəm narəm nabānazdištanəm para-baraiti.

8. dātarə ... ašāum cvaṭ aēšō miθrō aiwi-druxtō āstāraitī yō staorō-mazō, āaṭ mraoṭ ahurō mazdā, ašta satāiš haḍa-ciθanəm narəm nabānazdištanəm para-baraiti.

9. dātarə ... ašāum cvaṭ aēšō miθrō aiwi-druxtō āstāraitī yō vīrō-mazō, āaṭ mraoṭ ahurō mazdā, nava satāiš haḍa-ciθanəm narəm nabānazdištanəm para-baraiti.

10. dātarə ... ašāum cvaṭ aēšō miθrō aiwi-druxtō āstāraitī yō daijhu-mazō, āaṭ mraoṭ ahurō mazdā, hazaņrəm haḍa-ciθanəm narəm nabānazdištanəm para-baraiti.

11. dātarə ... ašāum yō miθrēm aiwi-družaiti yim vacahinəm kā-hē asti ciθa, āaṭ mraoṭ ahurō mazdā, tišrō sata upāzananəm upāzōiṭ aspāhe aštraya tišrō sata sraošō-caranaya.

12. dātarə ... ašāum yō miθrēm aiwi-družaiti yim zastā-marštēm kā-hē asti ciθa, āaṭ mraoṭ ahurō mazdā, xšvaš sata upāzananəm upāzōiṭ aspāhe aštraya xšvaš sata sraošō-caranaya.

13. dātarə ... ašāum yō miθrēm aiwi-družaiti yim pasu-mazēm kā-hē asti ciθa, āaṭ mraoṭ ahurō mazdā, hapta sata upāzananəm upāzōiṭ aspāhe aštraya hapta sata sraošō-caranaya.

14. dātarə ... ašāum yō miθrēm aiwi-družaiti yim staorō-mazēm kā-hē asti ciθa, āaṭ mraoṭ ahurō mazdā, ašta sata upāzananəm upāzōiṭ aspāhe aštraya ašta sata sraošō-caranaya.

15. dātarə ... ašāum yō miθrēm aiwi-družaiti yim vīrō-mazēm kā-hē asti ciθa, āaṭ mraoṭ ahurō mazdā, nava sata upāzananəm upāzōiṭ aspāhe aštraya nava sata sraošō-caranaya.

16. dātarə ... ašāum yō miθrəm aiwi-družaiti yim daiŋhu-mazəm kā-hē asti ciθa, āaṭ mraoṭ ahurō mazdā, hazarəm upāzananaṃ upāzōiṭ aspahe aštraya hazarəm sraoṣō-caranaya.

17. yō narš snaθəm usəhištaiti aētaṭ hē āgərəptəm yaṭ frašusaiti aētaṭ hē avaoirištəm yaṭ dim aēnō-manarḡha paiti-ašnaoiti aētaṭ hē arəduš, puxdōmciṭ nā arədušqam tanūm piryeite.

18. dātarə gaēθanaṃ astvaitinaṃ ašāum yō narəm āgərəptəm āgəurvayeyiti kā-hē asti ciθa, āaṭ mraoṭ ahurō mazdā, paṅca upāzana aspahe aštraya paṅca sraoṣō-caranaya bitīm dasa upāzana aspahe aštraya dasa sraoṣō-caranaya θritīm paṅca-dasa upāzana aspahe aštraya paṅca-dasa sraoṣō-caranaya.

19. tūirīm θrisatəm upāzananaṃ upāzōiṭ aspahe aštraya θrisatəm sraoṣō-caranaya puxdōm paṅcāsātəm upāzananaṃ upāzōiṭ aspahe aštraya paṅcāsātəm sraoṣō-caranaya xštūm haptāitīm upāzananaṃ upāzōiṭ aspahe aštraya haptāitīm sraoṣō-caranaya haptāθəm navaitīm upāzananaṃ upāzōiṭ aspahe aštraya navaitīm sraoṣō-caranaya.

20. aštəməm aētaēšqam šyaoθənanāṃ vərəzimməm anuzvarštāt paiti paurvāt kā-hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzananaṃ upāzōiṭ aspahe aštraya duye saite sraoṣō-caranaya.

21. dātarə ... ašāum yezi nōiṭ uzvarəzyāt yō narəm āgərəptəm āgəurvayeyiti kā-hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzananaṃ upāzōiṭ aspahe aštraya duye saite sraoṣō-caranaya.

22. dātarə ... ašāum yō narəm avaoirištəm avaurvaēsaite kā-hē asti ciθa, āaṭ mraoṭ ahurō mazdā, dasa upāzana aspahe aštraya dasa sraoṣō-caranaya bitīm paṅca-dasa upāzana aspahe aštraya paṅca-dasa sraoṣō-caranaya.

23. θritīm θrisatəm upāzananaṃ upāzōiṭ aspahe aštraya θrisatəm sraoṣō-caranaya tūirīm paṅcāsātəm upāzananaṃ upāzōiṭ aspahe aštraya paṅcāsātəm sraoṣō-caranaya puxdōm haptāitīm upāzananaṃ upāzōiṭ aspahe aštraya haptāitīm sraoṣō-caranaya xštūm navaitīm upāzananaṃ upāzōiṭ aspahe aštraya navaitīm sraoṣō-caranaya.

24. haptāθəm aētaēšqam šyaoθənanāṃ vərəzimməm anuzvarštāt paiti paurvāt kā-hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzananaṃ upāzōiṭ aspahe aštraya duye saite sraoṣō-caranaya.

25. dātarə ... ašāum yezi nōiṭ uzvarəzyāt yō narəm avaoirištəm avaurvaēsaite kā-hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzananaṃ upāzōiṭ aspahe aštraya duye saite sraoṣō-caranaya.

26. dātarə ... ašāum yō narəm arəduša snaθa jaiṅti kā-hē asti ciθa, āaṭ mraoṭ ahurō mazdā, paṅca-dasa upāzana aspahe aštraya paṅca-dasa sraoṣō-caranaya

27. bitīm θrisatəm upāzananəm upāzōiṭ aspahe aštraya θrisatəm sraoṣō-caranaya θritīm pañcāsātəm upāzananəm upāzōiṭ aspahe aštraya pañcāsātəm sraoṣō-caranaya tūirīm haptāitīm upāzananəm upāzōiṭ aspahe aštraya haptāitīm sraoṣō-caranaya puxdəm navaitīm upāzananəm upāzōiṭ aspahe aštraya navaitīm sraoṣō-caranaya.

28. xštūm aētaēṣəm šyaoθənanəm ... sraoṣō-caranaya.

29. dātarə ... ašāum yezi nōiṭ uzvarəzyāt yō narəm arəduša snaθa jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

30. dātarə ... ašāum yō narəm vīxrūməntəm xʻarəm jaiṇti kā-hē asti ciθa, āaṭ mraoṭ ahurō mazdā,

31. θrisatəm upāzananəm upāzōiṭ aspahe aštraya θrisatəm sraoṣō-caranaya bitīm pañcāsātəm upāzananəm upāzōiṭ aspahe aštraya pañcāsātəm sraoṣō-caranaya θritīm haptāitīm upāzananəm upāzōiṭ aspahe aštraya haptāitīm sraoṣō-caranaya tūirīm navaitīm upāzananəm upāzōiṭ aspahe aštraya navaitīm sraoṣō-caranaya.

32. puxdəm aētaēṣəm šyaoθənanəm ... sraoṣō-caranaya.

33. dātarə ... ašāum yezi nōiṭ uzvarəzyāt yō narəm vīxrūməntəm xʻarəm jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

34. dātarə ... ašāum yō narəm tacaṭ-vohunīm xʻarəm jaiṇti kā-hē asti ciθa, āaṭ mraoṭ ahurō mazdā, pañcāsātəm upāzananəm upāzōiṭ aspahe aštraya pañcāsātəm sraoṣō-caranaya bitīm haptāitīm upāzananəm upāzōiṭ aspahe aštraya haptāitīm sraoṣō-caranaya θritīm navaitīm upāzananəm upāzōiṭ aspahe aštraya navaitīm sraoṣō-caranaya.

35. tūirīm aētaēṣəm šyaoθənanəm ... sraoṣō-caranaya.

36. dātarə ... ašāum yezi nōiṭ uzvarəzyāt yō narəm tacaṭ-vohunīm xʻarəm jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

37. dātarə ... ašāum yō narəm astō-bidəm xʻarəm jaiṇti kā-hē asti ciθa, āaṭ mraoṭ ahurō mazdā, haptāitīm upāzananəm upāzōiṭ aspahe aštraya haptāitīm sraoṣō-caranaya bitīm navaitīm upāzananəm upāzōiṭ aspahe aštraya navaitīm sraoṣō-caranaya.

38. θritīm aētaēṣəm šyaoθənanəm ... sraoṣō-caranaya.

39. dātarə ... ašāum yezi nōiṭ uzvarəzyāt yō narəm astō-bidəm xʻarəm jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

40. dātarə ... ašāum yō narəm frazābaoḍaṅhəm snaθəm jaiṇti kā-hē asti ciθa, āaṭ mraoṭ ahurō mazdā, navaitīm upāzananəm upāzōiṭ aspahe aštraya navaitīm sraoṣō-caranaya.

41. bitīm aētaēṣəm šyaoθənanəm ... sraoṣō-caranaya.

42. dātarə ... ašāum yezi nōiṭ uzvarəzyāt yō narəm frazābaoḍaṅhəm snaθəm jaiṇti kā-hē asti ciθa, āaṭ mraoṭ ahurō mazdā ... sraoṣō-caranaya.

43. hāmō-šyaoθna tē pascaēta bavaiṇti ašahe paiti paṇṭəm ašahe paiti maθrəm ašahe paiti frasastīm.

44. yaēca ida narō hāmō-daēna jasaṇ brāθra vā haxaya vā šaētō-cinaṇhō vā nāiri-cinaṇhō vā xratu-cinaṇhō vā yezi šaētō-cinaṇhō jasaṇ ḥam ida šaētōm ḥam-bārayən yezi nāiri-cinaṇhō jasaṇ upa vā nāirikam vādayaēta.

45. yezi xratu-cinaṇhō jasaṇ upa vā maθrəm spəntəm maraēta pourumca naēme asne aparəmca pourumca naēme xšafne aparəmca uxšne xraθwe vīdrvānahe ašāt ašica nəmaṇhāna uxšne xraθwe yaonəm āste, maidyāi asnaṃca xšafnaṃca avaṇhabdaēta paiti asne paiti xšafne vīspəm ā ahmāt yaṭ tā sravā drəṇjayaṇ yā paourva aēθrapatayō drəṇjayaṇ.

46. ḥam-taptibyō aiwyō cāxrare nərəbyō zaraθuštra, mā gōuš mā vastrahe hatō adāitīm vaocōiṭ.

47. adaēca ulti nāirivaite zī-tē ahmāt pourum framraomi spitama zaraθuštra yaθa maṇavō fravaxšōiṭ vīsāne ahmāt yaθa əvīsāi puθrāne ahmāt yaθa apuθrāi šaētavatō ahmāt yaθa ašaētāi.

48. hāuca ayā narā vohu manō jāgərəbuštarō aṇḥaṭ yō gōuš uruθwarō ḥam-pāfrāiti yaθa hāu yō nōiṭ iθa hō upa-mərətō hāu aspərənō-mazō hāu anumayō-mazō hāu staorō-mazō hāu vīrō-mazō.

49. aēšō zī narō paityeṇti astō vīdōtuš pəšanaiti yasca išuš x'āaxtō pəšanaiti yasca zəmakō pəšanaiti kamnəm vaste vaṇhanəm yasca mašīm drvaṇtəm sāstārəm kamərəðaja pəšanaiti yasca ašəmaoγəm anašavanəm aṇuharəstātəm pəšanaiti.

50. paoirīm aētaēšqam šyaoθnanaṃ vərəzimmənəm nōiṭ bitīm, avada aētaða aētahe šyaoθnahe yaθa vaēθəṇti yaθa aētahmi aṇhvō yaṭ astvaiṇti ayaṇḥaēnāiš karətāiš azdibiš paiti ava-kərəθyāt aošəṇḥaiθyāsə-tanvō masyō vā ahmātciṭ.

51. avada aētaða aētahe šyaoθnahe yaθa vaēθəṇti yaθa aētahmi aṇhvō yaṭ astvaiṇti ayaṇḥaēnāiš fšəbīš azdibiš paiti ava-pašāt aošəṇḥaiθyāsə-tanvō masyō vā ahmātciṭ.

52. avada aētaða aētahe šyaoθnahe yaθa vaēθəṇti yaθa aētahmi aṇhvō yaṭ astvaiṇti satō-vīrəm vaēməm anusō paiḍyāite aošəṇḥaiθyāsə-tanvō masyō vā ahmātciṭ.

53. avada aētaða aētahe šyaoθnahe yaθa vaēθəṇti yaθa aētahmi aṇhvō yaṭ astvaiṇti anusō pərəm marəzəm ava-hištāt.

54. avada aētaða aētahe šyaoθnahe yaθa vaēθəṇti yaθa aētahmi aṇhvō yaṭ astvaiṇti āpəm saokəṇtavaitīm zaranyāvavitīm vīθušavaitīm draogəm vīθuš apāiθiš rašnaošca paiti-saṇḥəm miθraheca aiwi-druxtəm.

55. dātərə ... ašāum yō āpəm saokəṇtavaitīm zaranyāvavitīm vīθušavaitīm draogəm vīθuš apāiθiš rašnaošca paiti-saṇḥəm miθraheca aiwi-druxtəm kā-hē asti ciθa, āaṭ mraoṭ ahurō mazdā, hapta sata upāzananam upāzōiṭ aspahe aštraya hapta sata sraošō-caranaya. ašəm vohū.....

5.

1. nā-taṭ para-iriṭheyiti avi jaḥnavō raonaṃ ā-taṭ mərəγəm uzvazaitē haca barəšnavō gairinaṃ avi jaḥnavō raonaṃ upa-taṃ kəhrpəm fraṇuharaiti yaṃ iristahe mašyehe, ā-taṭ mərəγəm uzvazaitē haca jaḥnavō raonaṃ avi barəšnavō gairinaṃ upa-taṃ vanaṃ vazaitē xraoždvanamca varədvanaṃca avi dim vaṇta avi dim irita avi dim patita.

2. nā-taṭ frašusaiti haca jaḥnavō raonaṃ avi barəšnavō gairinaṃ upa-taṃ vanaṃ aēiti yaṃ hō mərəγō āṭre aēsmān iṣaiti, avi dim janaiti avi dim ṭwərəsaiti avi dim tāšti avi dim aiwi-raocayeiti āṭrō ahurahe mazdā puṭrəm kā-hē asti ciṭa.

3. āaṭ mraoṭ ahurō mazdā, nōiṭ spō-bərətō nōiṭ vayō-bərətō nōiṭ vəhrkō-bərətō nōiṭ vātō-bərətō nōiṭ maxši-bərətō nasuṣ narəm nōiṭ āstryeiti.

4. yezica aēte nasāvō yā spō-bərətaca vayō-bərətaca vəhrkō-bərətaca vātō-bərətaca maxši-bərətaca nasuṣ narəm āstryeintīm aṅhāt iṣarə-štāitya mē viṣpō aṅhuṣ astvā iṣasəm jiṭ-ašəm xraodaṭ-urva pəšō-tanuṣ frəna aṅhaṃ nasunaṃ yā paiti āya zəmə iririṭarə.

5. dātarə ... ašāum nā-taṭ āpəm hiṇcaiti avi yavō-carānīm ana-tā vaidīm ayā ana bitīm ana ṭritīm pasca tūirīm nasāum ava-karəšəṇti spānəm vā raožəm vā vəhrkəm vā kā-hē asti ciṭa.

6. āaṭ mraoṭ ahurō mazdā, nōiṭ spō-bərətō nōiṭ vayō-bərətō nōiṭ vəhrkō-bərətō nōiṭ vātō-bərətō nōiṭ maxši-bərətō nasuṣ narəm nōiṭ āstryeiti.

7. yezica aēte nasāvō yā spō-bərətaca vayō-bərətaca vəhrkō-bərətaca vātō-bərətaca maxši-bərətaca nasuṣ narəm āstryeintīm aṅhāt iṣarə-štāitya mē viṣpō aṅhuṣ astvā iṣasəm jiṭ-ašəm xraodaṭ-urva pəšō-tanuṣ frəna aṅhaṃ nasunaṃ yā paiti āya zəmə iririṭarə.

8. dātarə ... ašāum āfš narəm jaiṇti vā, āaṭ mraoṭ ahurō mazdā, āfš narəm nōiṭ jaiṇti astō viḍōtuṣ dim baṇdayeiti vayō dim bastəm nayeiti āfš uzvazaiti āfš nivazaiti āfš paiti-raēcayeiti vayō dim pascaēta fraṇuharəṇti,

aṭra aḍāt frajasaiti
baxta aḍāt nijasaiti.

9. dātarə ... ašāum ātarš narəm jaiṇti vā, āaṭ mraoṭ ahurō mazdā, ātarš narəm nōiṭ jaiṇti astō viḍōtuṣ dim baṇdayeiti vayō dim bastəm nayeiti ātarš haṇdažaiti asta uštānəmca,

aṭra aḍāt frajasaiti
baxta aḍāt nijasaiti.

10. dātarə ... ašāum frā hama saciṇte aṭa aiwi-gāme kuṭa tē vərəzyaṇ aēte yōi mazdayasna, āaṭ mraoṭ ahurō mazdā, nmāne nmāne viṣi viṣi ṭrāyō kata uzdaioyaṇ aētahe yaṭ iristahe.

11. dātarə ... ašāum cvaṇtō aṅhən aēte kata aētahe yaṭ iristahe, āaṭ mraoṭ ahurō mazdā, yaṭ hē nōiṭ ərədvō aṅhanəm vaγḍanəm upa-janyāt nōiṭ frašā

pādaēibya nōiṭ zastaēibya vitarəm, aēšō zī asti dāityō kata aētahe yaṭ iristahe.

12. aētaḁa hē uzbaodāṃ tanūm nidaiṭyaṃ bixšaparəm vā θrixšaparəm vā mādṛājāhīm vā vīspəm ā ahmāt yaṭ frā vayō patān frā urvara uxšyaṃ nyāncō apa-tacin us vātō zāṃ haēcayāt.

13. āaṭ yaṭ hīš frā vayō patān frā urvara uxšyaṃ nyāncō apa-tacin us vātō zāṃ haēcayāt aētaḁa hē aēte mazdayasna aētəm kəhrpəm hvarə-darəsīm kərənaoṭ.

14. yezi nōiṭ aēte mazdayasna aētəm kəhrpəm hvarə-darəsīm kərənavān yārə-drājō avavaṇtəm ašavaṃnyāi ṭāṃ ciṭāṃ daēsayingō vīspəm ā ahmāt nasunaṃca aiwi-varštanāṃ daxmanaṃca aiwi-varštanāṃ hixranāṃca aiwi-varštanāṃ vayanāṃca fraṇjuharətanāṃ.

15. dātərə ... ašāum āpəm zazāhi tūm yō ahurō mazdā zrayaṇhaṭ haca vouru-kašāt haṭra vātəmca dunmaṇca,

16. avi nasūm vazāhi tūm yō ahurō mazdā upa daxməm vazāhi tūm yō ahurō mazdā upa hixrəm vazāhi tūm yō ahurō mazdā upa astəm frazayayāhi tūm yō ahurō mazdā aṇhaiṭim frafrāvayāhi tūm yō ahurō mazdā tā haṭra frafrāvayāhi avi zrayō pūitikəm.

17. āaṭ mraoṭ ahurō mazdā,
aēvaṭa bā zaraṭuštra
yaṭa tūm ərəzvō vašaṇhe,
āpəm zazāmi azəm yō ahurō mazdā zrayaṇhaṭ haca vouru-kašāt haṭra
vātəmca dunmaṇca,

18. avi nasūm vazāmi azəm yō ahurō mazdā upa daxməm vazāmi azəm yō ahurō mazdā upa hixrəm vazāmi azəm yō ahurō mazdā upa astəm frazayayāmi azəm yō ahurō mazdā aṇhaiṭim frafrāvayāmi azəm yō ahurō mazdā tā haṭra frafrāvayāmi avi zrayō pūitikəm.

19. tē hištəṇti ḡzarə-ḡzarəṇtiš aṇtarə arəḁəm zrayaṇhō, yaozdya taciṇti āpō zrayaṇhaṭ haca pūitikāt avi zrayō vouru-kašəm avi vanāṃ yāṃ hvāpīm, aṭra mē urvarā raodəṇti vīspā vīspō-sarəḁō satavaitināṃ hazarjavaitināṃ baēvarə baēvaranāṃ,

20. tā haṭra vīvārayemi
azəm yō ahurō mazdā
xʷarəθəmca naire ašaone
vāstrəmca gave huḁāṇhe,
yavō mē mašyō xʷarāt vāstrəm gave huḁāṇhe.

21. imaṭ vaṇhō imaṭ srayō
yaṭa tūm ərəzvō vašaṇhe,
ā-dīm tā vaca rāmayāt
ahurō mazdā ašava
ašavanəm zaraṭuštrəm,
yaozdā mašyāi aipi-zaṭəm vahišta, hā yaozdā zaraṭuštra yā daēna
māzdayasniš yō hvāṃ aṇhvāṃ yaozdāite humatāišca hūxtāišca hvarštāišca.

22. dātarə ... ašāum cū asti masyō vaṇhō srayō aētəm dātəm yim vidōyūm zaraθuštri upairi anyāiš sraivāiš masanaca vaṇhanaca srayanaca.

23. āaṭ mraoṭ ahurō mazdā, maṇayən bā spitama zaraθuštra aētəm dātəm yim vidōyūm zaraθuštri upairi anyāiš sraivāiš masanaca vaṇhanaca srayanaca yaθa zrayō vouru-kašəm upairi anyā āpō.

24. maṇayən bā spitama zaraθuštra aētəm dātəm yim vidōyūm zaraθuštri upairi anyāiš sraivāiš masanaca vaṇhanaca srayanaca yaθa masyayā āfš kasyaṇḥam aṇam avi-frādavaiti, maṇayən bā spitama zaraθuštra aētəm dātəm yim vidōyūm zaraθuštri upairi anyāiš sraivāiš masanaca vaṇhanaca srayanaca yaθa masyayā vana kasyaṇḥam vaṇam aiwi-vərənvaiti.

25. maṇayən bā spitama zaraθuštra aētəm dātəm yim vidōyūm zaraθuštri upairi anyāiš sraivāiš masanaca vaṇhanaca srayanaca yaθa iməm zəm āca pairica bvāva.

26. aoxtō ratuš aoxtō sraošāvarəzō uzgərəptāt paiti draonāt nava uzgərəptāt dātāt paiti draonāt nava dātāt nisritāt paiti draonāt nava nisritāt xšayeite hē pascaēta aēša yō ratuš θrišum aētahe ciθā aṇaḥarštōe, yezica hē anya aya šyaoθna fravaršta paitita hē ciθa, āaṭ yezi-šē anya aya šyaoθna nōiṭ fravaršta paititəm ahe narš yavaēca yavaētātaēca.

27. dātarə ... ašāum yō narō hāmō-gātvō nipaidyeiṇte ḥam vā paiti stairiš ḥam vā paiti barəziš paitica hē anya dva vā nara aṇhən paṇca vā paṇcāsātəm vā satəm vā ḥam nāirinəm āaṭ aēšam narəm aēvō iriθyāt cvaṭ aṇtarə nərəš aēša druxš yā nasuš axtica pivatica āhitica frāšnaoiti.

28. āaṭ mraoṭ ahurō mazdā, yezi aṇḥaṭ āθrava frā-zī dvəšaiti spitama zaraθuštra aēša druxš yā nasuš yezi aēvaṇdasō frāšnaoiti dasəməm paiti-raēθwayeiti, āaṭ yezi aṇḥaṭ raθaēštā frā-zī dvəšaiti spitama zaraθuštra aēša druxš yā nasuš yezi dasəməm frāšnaoiti nāuməm paiti-raēθwayeiti, āaṭ yezi aṇḥaṭ vāstryō fšuyəš frā-zī dvəšaiti spitama zaraθuštra aēša druxš yā nasuš yezi nāuməm frāšnaoiti aštəməm paiti-raēθwayeiti.

29. āaṭ yezi aṇḥaṭ spā pasuš-haurvō frā-zī dvəšaiti spitama zaraθuštra aēša druxš yā nasuš yezi aštəməm frāšnaoiti haptaθəm paiti-raēθwayeiti, āaṭ yezi aṇḥaṭ spā viš-haurvō frā-zī dvəšaiti spitama zaraθuštra aēša druxš yā nasuš yezi haptaθəm frāšnaoiti xštūm paiti-raēθwayeiti.

30. āaṭ yezi aṇḥaṭ spā vohunazgō frā-zī dvəšaiti spitama zaraθuštra aēša druxš yā nasuš yezi xštūm frāšnaoiti puxdəm paiti-raēθwayeiti, āaṭ yezi aṇḥaṭ spā taurunō frā-zī dvəšaiti spitama zaraθuštra aēša druxš yā nasuš yezi puxdəm frāšnaoiti tūirīm paiti-raēθwayeiti.

31. āaṭ yezi aṇḥaṭ spā sukurənō frā-zī dvəšaiti spitama zaraθuštra aēša druxš yā nasuš yezi tūirīm frāšnaoiti θritīm paiti-raēθwayeiti, āaṭ yezi aṇḥaṭ spā jažuš frā-zī dvəšaiti spitama zaraθuštra aēša druxš yā nasuš yezi θritīm frāšnaoiti bitīm paiti-raēθwayeiti.

32. āaṭ yezi aṇḥaṭ spā aiwizuš frā-zī dvəšaiti spitama zaraθuštra aēša druxš yā nasuš yezi bitīm frāšnaoiti paoirīm paiti-raēθwayeiti, āaṭ yezi aṇḥaṭ

spā vīzuš frā-zī dvāšaiti spitama zaraθuštra aēša druxš yā nasuš yezi paoirīm frāšnaoitī paoirīm paitī-raēθwayeiti.

33. dātārē ... ašāum āaṭ yezi aṇḥaṭ spā urupiš cvaṭ aēšō spā yō urupiš spəntahe mainyōuš dāmanam ḥam-raēθwayeiti cvaṭ paitī-raēθwayeiti.

34. āaṭ mraoṭ ahurō mazdā, nōiṭ aēša spā yō urupiš spəntahe mainyōuš dāmanam ḥam-raēθwayeiti nōiṭ paitī-raēθwayeiti anyō ahmāṭ yō janaiti fracā kušaitī ā dim ā-hišhaxti yavaēca yavaētātaēca.

35. dātārē ... ašāum āaṭ yezi aṇḥaṭ mairyō drvā bizanḡrō avaθa ašəmaoḡō anašava cvaṭ spəntahe mainyōuš dāmanam ḥam-raēθwayeiti cvaṭ paitī-raēθwayeiti.

36. āaṭ mraoṭ ahurō mazdā, yaθa vazayaciṭ viš-hušō tarō yārē mərətō, jvō zī spitama zaraθuštra mainyō drvā bizanḡrō avaθa ašəmaoḡō anašava spəntahe mainyōuš dāmanam ḥam-raēθwayeiti jvō paitī-raēθwayeiti,

37. jvō āpəm jaiṇti jvō ātrəm frāvayeiti jvō ḡam varatam azaitē jvō narəm ašavanəm frazābaoḡaḡhəm snaθəm vīkərəṭ-uštānəm jaiṇti nōiṭ avaθa mərətō,

38. jvō zī spitama zaraθuštra mairyō drvā bizanḡrō avaθa ašəmaoḡō anašava narəm ašavanəm ḥaḡhuš xʻarəθaheca vāstraheca draošca nimataheca ayaḡheca apa-baraitī nōiṭ avaθa mərətō.

39. dātārē ... ašāum yōi nmānā ḥam-barāmahi ašāum ahura mazda ahmi aḡhvō yaṭ astvaiṇti ātrəmca barəsmaca taštaca haomaca hāvanaca āaṭ pascaēta ahe nmāne spā vā nā vā iriṭyāṭ kuθa tē vərəzyaḡ aēte yōi mazdayasna.

40. āaṭ mraoṭ ahurō mazdā, us haca aēibyō nmānaēibyō barayən spitama zaraθuštra ātrəmca barəsmaca taštaca haomaca hāvanaca us haca iristəm barayən maḡayən ahe yaθa nā dāityō dāityayāi bairyeteca xʻairyeteca.

41. dātārē ... ašāum kuθa tē aēte mazdayasna aētəm ātrəm aiti barān ava aētəm nmānəm yaṭ aēšō nā para-iriṭyāṭ.

42. āaṭ mraoṭ ahurō mazdā, nava-xšaparəm upa-maḡayən aēte yōi mazdayasna aiwi-gāme āaṭ hama māzdrājahīm, pascaēta aēte mazdayasna aētəm ātrəm aiti barān ava aētəm nmānəm yaṭ aēšō nā para-iriṭyāṭ.

43. dātārē ... ašāum yezica aēte mazdayasna aētəm ātrəm aiti barān ava aētəm nmānəm yaṭ aēšō nā para-iriṭyāṭ aṇtarāṭ naēmāṭ nava-xšaparahe aṇtarāṭ naēmāṭ māzdrājahīm kā hē asti ciθa.

44. āaṭ mraoṭ ahurō mazdā, aētahe paitī pəšō-tanuye duye saite upāzanam upāzōiṭ aspāhe aštraya duye saite sraošō-caranaya.

45. dātārē ... ašāum yaṭ ahmi nmāne yaṭ māzdayasnōiš nāirika upaspuθrīm jasāṭ aēvō-māhīm vā bimāhīm vā θrimāhīm vā caθru-māhīm vā paṇca-māhīm vā xšvaš-māhīm vā hapta-māhīm vā ašta-māhīm vā nava-māhīm vā dasa-māhīm vā aētaḡa aēša nāirika taḡa apuθrīm nijasāṭ uzuštana kuθa tē vərəzyaḡ aēte yōi mazdayasna.

46. āaṭ mraoṭ ahurō mazdā, yaṭ ahmi nmāne yaṭ māzdayasnōiš fraēštəm yaoždātō-zəmōtəməmca hušō-zəmōtəməmca kambīštəmca aēte paθā fraṇaṇ pasvasca staorāca ātrəmca ahurahe mazdā barəsmaca ašaya frastarətəm narəmca yim ašavanəm.

47. dātarə ... ašāum cvaṭ drājō haca āθraṭ cvaṭ drājō haca apaṭ cvaṭ drājō haca barəsmən frastairyāt cvaṭ drājō haca nərəbyō ašavabyō.

48. āaṭ mraoṭ ahurō mazdā, θrisata-gāim haca āθraṭ θrisata-gāim haca apaṭ θrisata-gāim haca barəsmən frastairyāt θrigāim haca nərəbyō ašavabyō.

49. aētaða hē aēte mazdayasna aiṇhā zəmō pairi-daēzān pairi-daēzayaṇ xʻarəθaēibyō pascaēta āstayaṇta aēte yōi mazdayasna vastraēibyō pascaēta āstayaṇta aēte yōi mazdayasna.

50. dātarə ... ašāum ciš aēša nāirika paoirīm xʻarəθanaṇm xʻarāt.

51. āaṭ mraoṭ ahurō mazdā, gēuš maēsmana ātryō-paiti-iristəm θriš vā šāmaṇ yaṭ vā xšvaš yaṭ vā nava aēte daxma upaṇharəzaēta aṇtarāt naēmāt barəθrišva uruθwō-hva,

52. āaṭ pascaēta aipi-γžaurvatāṇ aspayaṇamca payaṇhāṇm gāvayaṇamca maēšīnaṇmca buzayaṇmca ḥam-vaoirināṇm us-vaoirināṇm gaṇmca xʻāstəm anāpəm yaomca ašəm anāpəm maḍuca anāpəm.

53. dātarə ... ašāum cvaṭ drājō upa-maṇayən cvaṭ drājō upa-maitīm āste xʻarəṇti gaṇmca yaomca maḍuca.

54. āaṭ mraoṭ ahurō mazdā, θrixšaparəm upa-maṇayən θrixšaparəm upa-maitīm āste xʻarəṇti gaṇmca yaomca maḍuca, āaṭ pasca θrixšaparāt us tanūm snayaēta us vastrāt gēuš maēsmana apāca nava upa maṇəm paiti avaθa yaoždayaṇ.

55. dātarə ... ašāum cvaṭ drājō upa-maṇayən cvaṭ drājō upa-maitīm āste pasca θrixšaparāt yūtō gātuš yūtō xʻarəθa yūtō vastra yūtō anyaēibyō mazdayasnaēibyō.

56. āaṭ mraoṭ ahurō mazdā, nava-xšaparəm upa-maṇayən nava-xšaparəm upa-maitīm āste pasca θrixšaparāt yūtō gātuš yūtō xʻarəθa yūtō vastra yūtō anyaēibyō mazdayasnaēibyō, āaṭ pasca nava-xšaparāt us tanūm snayaēta us vastrāt gēuš maēsmana apāca paiti avaθa yaoždayaṇ.

57. dātarə ... ašāum kaṭ tā vastra ḥam-yūta pasca yaoždāiti frasnāiti zaoθre vā ḥāvanāne vā ātravaxše vā frabərəθre vā ābərəte vā āsnāθre vā raēθwiškare vā sraošāvarəze vā θaurune vā mašyāi raθaēštāi vā vāstryāi vā fšuyaṇte.

58. āaṭ mraoṭ ahurō mazdā, nōiṭ tā vastra ḥam-yūta pasca yaoždāiti frasnāiti zaoθre nōiṭ ḥāvanāne nōiṭ ātravaxše nōiṭ frabərəθre nōiṭ ābərəte nōiṭ āsnāθre nōiṭ raēθwiškare nōiṭ sraošāvarəze nōiṭ θaurune mašyāi nōiṭ raθaēštāi nōiṭ vāstryāi fšuyaṇte.

59. yaṭ ahmi nmāne yaṭ māzdayasnōiš nāirika daxštavaiti aṇhaṭ yaṭ vā skəṇdō aipi-jatō pištrō aipi-iritō gātuš aētaða aētahe āste stairišca barəzišca ḥam-vəronāṇte vīspəm ā ahmāt yaṭ ḥam-ci zastō frīne nižbarāt.

60. nōiṭ zī ahurō mazdā yāṅhuyanāṃ avarətanāṃ paiti-ricya daiṭe nōiṭ aspərənō-mazō nōiṭ avacinō-mazō yavaṭ aēša carāitika avi maṃ harəkō harəcayāt.

61. yezica aēte mazdayasna upairi aētəm iristəm avi maṃ harəkō hərəzyāt yavaṭ aēša carāitika avi maṃ harəkō harəcayāt jvasciṭ nōiṭ bvāt ašava məšasciṭ nōiṭ baxšaiti vahištahe aṅhəuš,

62. təm ahūm paiṭyāiti yim drvatəm təmaṅhaēnəm təmasciṭrəm təmaṅhəm təm vā ahūm drvaṭō šyaoṭnāiš x'āiš x'ā-daēna nisirinuyāt acištāi aṅuhe.

ašəm vohū.....

6.

1. cvaṅtəm drājō zrvānəm aiṅhā zəmō anaiḍya yaṭ ahmi spānasca narasca para-iriṭiṅti, āaṭ mraoṭ ahurō mazdā, yārə-drājō ašāum zaraṭuštra aiṅhā zəmō anaiḍya yaṭ ahmi spānasca narasca para-iriṭiṅti,

2. māca pascaēta mazdayasna ṭəm ṭəm kārayən mā āpō hərəzayən yaṭ ahmi spānasca narasca para-iriṭiṅti aṅtarāṭ naēmāt yārə-drājō vasō pascaēta mazdayasna ṭəm anyāṃ ṭəm kārayən vasō āpō hərəzayən.

3. yezi mazdayasna ṭəm ṭəm kārayən yezi āpō hərəzayən yaṭ ahmi spānasca narasca para-iriṭiṅti aṅtarāṭ naēmāt yārə-drājō nasuspaēm pascaēta āstryāṅte aēte yōi mazdayasna apasca zəmasca urvarayāasca.

4. dātarə ... ašāum yezi mazdayasna ṭəm ṭəm kārayən yezi āpō hərəzayən yaṭ ahmi spānasca narasca para-iriṭiṅti aṅtarāṭ naēmāt yārə-drājō kā-hē asti ciṭa.

5. āaṭ mraoṭ ahurō mazdā, aētahe paiti pəšō-tanuye duye saite upāzanāṃ upāzōiṭ aspəhe aštraya duye saite sraošō-caranaya.

6. dātarə ... ašāum yezi vasən mazdayasna ṭəm raodayāṃ hixtayaēca karštayaēca parakaṅtayaēca kuṭa tē vərəzyāṃ aēte yōi mazdayasna.

7. āaṭ mraoṭ ahurō mazdā, aētaḍa hē aēte mazdayasna aiṅhā zəmō pairišayaṅta aētaṅḥaṃ aštəmca varəšəmca spāməmca mūṭraṃca vaṅhutātəmca.

8. dātarə ... ašāum yezi nōiṭ pairišāṅte aētaṅḥaṃ aštəmca varəšəmca spāməmca mūṭraṃca vaṅhutātəmca kā-hē asti ciṭa.

9. āaṭ mraoṭ ahurō mazdā, aētahe paiti pəšō-tanuye duye saite upāzanāṃ upāzōiṭ aspəhe aštraya duye saite sraošō-caranaya.

10. dātarə ... ašāum yō astəm upaṅharəzaiti sūnō vā para-iristahe mašyehe vā avavaṭ aipi yaṭa kasištəhe ərəzvō fratəməm ṭbišiš yezi ahmya iriṭyeiti ūṭəm vā ūṭō-tās vā kā-hē asti ciṭa.

11. āaṭ mraoṭ ahurō mazdā, ṭrisatəm upāzanāṃ upāzōiṭ aspəhe aštraya ṭrisatəm sraošō-caranaya.

12. dātarə ... ašāum yō astəm upaṇharəzaiti sūnō vā para-iristahe mašyehe vā avavaṭ aipi yaθa maḍəmahe ərəzvō fratəməm t̪bišiš yezi ahmya iriṭyeiti ūθəm vā ūθō-tās vā kā-hē asti ciθa.

13. āaṭ mraoṭ ahurō mazdā, paṇcāsātəm upāzananəm upāzōiṭ aspahe aštraya paṇcāsātəm sraošō-caranaya.

14. dātarə ... ašāum yō astəm upaṇharəzaiti sūnō vā para-iristahe mašyehe vā avavaṭ aipi yaθa masištahe ərəzvō fratəməm t̪bišiš yezi ahmya iriṭyeiti ūθəm vā ūθō-tās vā kā-hē asti ciθa.

15. āaṭ mraoṭ ahurō mazdā, haptāitīm upāzananəm upāzōiṭ aspahe aštraya haptāitīm sraošō-caranaya.

16. dātarə ... ašāum yō astəm upaṇharəzaiti sūnō vā para-iristahe mašyehe vā ərəzu-stavaṇhəm vā pərəsū-masaṇhəm vā yezi ahmya iriṭyeiti ūθəm vā ūθō-tās vā kā-hē asti ciθa.

17. āaṭ mraoṭ ahurō mazdā, navaitīm upāzananəm upāzōiṭ aspahe aštraya navaitīm sraošō-caranaya.

18. dātarə ... ašāum yō astəm upaṇharəzaiti sūnō vā para-iristahe mašyehe vā baēərəzu-stavaṇhəm vā bipərəsū-masaṇhəm vā yezi ahmya iriṭyeiti ūθəm vā ūθō-tās vā kā-hē asti ciθa.

19. āaṭ mraoṭ ahurō mazdā, aētahe paiti pəšō-tanuye duye saite upāzananəm upāzōiṭ aspahe aštraya duye saite sraošō-caranaya.

20. dātarə ... ašāum yō astəm upaṇharəzaiti sūnō vā para-iristahe mašyehe vā bāzu-stavaṇhəm vā sraoni-masaṇhəm vā yezi ahmya iriṭyeiti ūθəm vā ūθō-tās vā kā-hē asti ciθa.

21. āaṭ mraoṭ ahurō mazdā, caθwārō sata upāzananəm upāzōiṭ aspahe aštraya caθwārō sata sraošō-caranaya.

22. dātarə ... ašāum yō astəm upaṇharəzaiti sūnō vā para-iristahe mašyehe vā avavaṭ aipi yaθa narš vaγḍanəm yezi ahmya iriṭyeiti ūθəm vā ūθō-tās vā kā-hē asti ciθa.

23. āaṭ mraoṭ ahurō mazdā, xšvaš sata upāzananəm upāzōiṭ aspahe aštraya xšvaš sata sraošō-caranaya.

24. dātarə ... ašāum yō vīspəm haurvəm tanūm upaṇharəzaiti sūnō vā para-iristahe mašyehe vā yezi ahmya iriṭyeiti ūθəm vā ūθō-tās vā kā-hē asti ciθa.

25. āaṭ mraoṭ ahurō mazdā, hazanrəm upāzananəm upāzōiṭ aspahe aštraya hazanrəm sraošō-caranaya.

26. dātarə ... ašāum yaṭ aēte yōi mazdayasna pāda ayaṇtəm vā taciṇtəm vā barəmnəm vā vazəmnəm vā taci-apaya nasāum frajasan kuθa tē vərəzyan aēte yōi mazdayasna.

27. āaṭ mraoṭ ahurō mazdā, maṭ aoθranəm framuxti maṭ vastranəm niḍaiti upa-maṇayən zaraθuštra fraša frayōiṭ iristəm uzbarōiṭ āpō zaraθuštra

ā-zangāēibyasciṭ āpō ā-žnubyasciṭ āpō ā-maiḍyaṇasciṭ āpō ā-nərəbərəzasciṭ āpō vīspəm ā ahmāt yaḍōiṭ upa-jasōiṭ irištəm tanūm.

28. dātārə ... ašāum yezica aēte nasāvō friṭheyitica puyetica kuθa tē vərəzyān aēte yōi mazdayasna.

29. āaṭ mraoṭ ahurō mazdā, yavaṭ cvaṭca hē zastaēibya haṅgəurvayaṇ aētavaṭ apaṭ haca nižbārayən huše zəme nidaiṭyaṇ nōiṭ aštəm nōiṭ varsəm nōiṭ spāmam nōiṭ mūθraṇ nōiṭ vaṇhutātəm pairi-spāiti apam āstryānte.

30. dātārə ... ašāum cvaṭ aētaṇhā āpō yaṭ armaēštayā aēša druš yā nasuš axtica pivatica āhitica frāšnaoiti.

31. āaṭ mraoṭ ahurō mazdā, xšvaš-gāim kəmcīṭ paiti caθrušanəm vīspəm ā ahmāt aēša āfš ayaoždya anaiwiš-xʷarəθa yavaṭ aēša nasuš nižbərəta, us haca nasāvō aētavaṭ apaṭ haca nižbārayən huše zəme nidaiṭyaṇ.

32. aiṇhā āpō para-hiṇcayən yaṭ vā naēməm yaṭ vā θrišum yaṭ vā caθrušum yaṭ vā paṇtaṇhum yezi tūtava navāt tūtava, pasca nasāvō nižbərəθi pasca āpō para-hixti aēša āfš yaoždya bavaiti vasō aiwiš-xʷarəθa pasubya vīraēibya hamaθa yaθa paraciṭ.

33. dātārə ... ašāum cvaṭ aētaṇhā āpō yaṭ cātayā uzuityāsca aēša druš yā nasuš axtica pivatica āhitica frāšnaoiti.

34-35. āaṭ mraoṭ ahurō mazdā, vīspəm ā ahmāt aēša āfš ayaoždya anaiwiš-xʷarəθa yavaṭ aēša nasuš nižbərəta, us haca² ... yaθa paraciṭ.

36. dātārə ... ašāum cvaṭ aētaṇhā āpō yaṭ snaēziṇtyāica srasciṇtyāica aēša druš yā nasuš axtica pivatica āhitica frāšnaoiti.

37. āaṭ mraoṭ ahurō mazdā, θrigāim kəmcīṭ paiti caθrušanəm vīspəm ā ahmāt aēša āfš ayaoždya anaiwiš-xʷarəθa yavaṭ aēša nasuš nižbərəta, us haca nasāvō aētavaṭ apaṭ haca nižbārayən huše zəme nidaiṭyaṇ.

38. pasca nasāvō nižbərəθi pasca āpō vītaxti aēša āfš yaoždya bavaiti vasō aiwiš-xʷarəθa pasubya vīraēibya hamaθa yaθa paraciṭ.

39. dātārə ... ašāum cvaṭ aētaṇhā āpō yaṭ frātaṭ-carətayā aēša druš yā nasuš axtica pivatica āhitica frāšnaoiti.

40. āaṭ mraoṭ ahurō mazdā, θrigāim nyāpəm nava-gāim paityāpəm xšvaš-gāim anaiḍīm vīspəm ā ahmāt ... nidaiṭyaṇ.

41. pasca nasāvō nižbərəθi pasca āθritīm aiwi-varaiti aēša āfš yaoždya bavaiti vasō aiwiš-xʷarəθa pasubya vīraēibya hamaθa yaθa paraciṭ.

42. dātārə ... ašāum kaṭ tā haoma yaoždayān aṇhən ašāum ahura mazda yā nasāum ava-bərəta sūnō vā para-iristahe mašyehe vā.

43. āaṭ mraoṭ ahurō mazdā, yaoždayān aṇhən ašāum zaraθuštra nōiṭ haomō hutō axtiṣ nōiṭ mahrkō nōiṭ nasuš ava-bərətō ava aēte ahuta yaθa caθwārō ərəzvō aētaēšamca zəmə nidaiṭyaṇ aṇtarə arəḍəm nmānahe vīspəm

2 = Parr. 31-32; the Mss. with P. V. abbreviate.

ā ahmāt yaṭ hē yārē-drājō sacāite, āaṭ pasca yārē-drājō vasō xʷarəθā aṅhən nərəbyō ašavabyō hamaṭa yaṭa paraciṭ.

44. dātarə ... ašāum kva narəṃ iristanəṃ tanūm barāma ahura mazda kva nidaθāma.

45. āaṭ mraoṭ ahurō mazdā, barəzištaešvaca paiti gātušva spitama zaraθuštra yaḍōiṭ dim bāidištəm avazanəṃ sūnō vā kərəfš-xʷarō vayō vā kərəfš-xʷarō.

46. aētaḍa hē aēte mazdayasna aētəm iristəm nidarəzyānte aētaḍa hē aēte sūnō vā pāḍaēibyā xʷaēpaṭyāca varsa ayaṅhaēnəm vā zarštvaēnəm vā fravāxšaēnəm vā yezi nōiṭ sūnō vā kərəfš-xʷarō vayō vā kərəfš-xʷarō aētaṅhəṃ astəṃ avi aṗamca urvaranəṃca barəṅtəm frajasəṃ.

47. dātarə ... ašāum yezi nōiṭ nidarəzyānte aētaḍa hē aēte sūnō vā kərəfš-xʷarō vayō vā kərəfš-xʷarō aētaṅhəṃ astəṃ avi aṗamca urvaranəṃca barəṅtəm frajasāt kā-hē asti ciṭa.

48. āaṭ mraoṭ ahurō mazdā, aētahe paiti pəšō-tanuye duye saite upāzananəṃ upāzōiṭ aspae aštraya duye saite sraošō-caranaya.

49. dātarə ... ašāum kva narəṃ iristanəṃ azdibiš barāma ahura mazda kva nidaθāma.

50. āaṭ mraoṭ ahurō mazdā, uždānəm hē adāt kərənaoṭ upairi spānəm upairi raozəm upairi vəhrkəm anaiwi-varəṅtīm upara-naēmāt apō yaṭ vairyaṭ

51. yezi tavəṃ aēte mazdayasna yezi asānaēšva yezi vicicaēšva yezi tūtuxšva, yezi nōiṭ tavəṃ aēte mazdayasna xʷā-stairiš xʷā-barəziš raocā aiwi-varəna hvarə-darəsyā hē zəme paiti nidaiθīta. ašəm vohū.....

7.

1. pərəsaṭ zaraθuštrō ahurəm mazdəm, ahura mazda mainyō spəništa dātarə gaēṭanəṃ astvaitinəṃ ašāum kaṭ tā nara irista aēša druxš yā nasuš upa-dvəšaiti.

2. āaṭ mraoṭ ahurō mazdā, išarə pasca para-iristīm spitama zaraθuštra us haca baodō ayāt aēša druxš yā nasuš upa-dvəšaiti apāxəḍraēibyō naēmaēibyō maxši kəhrpa ərəṭyāitya frašnaoš apazaḍaṅhō akaranəm driwyā yaṭa zōiždištāiš xrafstrāiš.

3. dātarə ... ašāum āaṭ yaṭ aēte yā spō-jataca vəhrkō-jataca yātu-jataca ṭbaēšō-jataca vaēmō-jataca mašyō-jataca zūrō-jataca aṭō-jataca cvantəm pascaēta zrvānəm aēša druxš yā nasuš upa-dvəšaiti.

4. āaṭ mraoṭ ahurō mazdā, asnyehe pascaēta anyehe raθwō aēša druxš yā nasuš upa-dvəšaiti.

5-8. dātarə ... ašāum yō narō hāmō-gātvō³ ... yezi puxdəm frāšnaoiti tūirīm paiti-raēθwayeiti, aētaða aētahe āste stairišca barəzišca həm-vəranānte.

9. dātarə ... ašāum cvaṭ aēte stairišca barəzišca aēša druxš yā nasuš axtica pivatica āhitica frāšnaoiti.

10. āaṭ mraoṭ ahurō mazdā, upəma aēte stairišca aṇtəma aiwi-varəna aēša druxš yā nasuš axtica pivatica āhitica frāšnaoiti.

11. dātarə ... ašāum kaṭ tā vastra yaoždayən aṇhən ašāum ahura mazda yā nasāum ava-bərəta sūnō vā para-iristahe mašyehe vā.

12. āaṭ mraoṭ ahurō mazdā, yaoždayən aṇhən ašāum zaraθuštra, kva aēva, yezi aṇhaṭ upaētəm vā aiwi-naptīm vā aiwi-iritīm vā aiwi-vaṇṭīm vā aētaða hē aēte mazdayasna aētā vastrā fracā karəṇtən nica kanayən.

13. āaṭ yezi nōiṭ aṇhaṭ upaētəm vā aiwi-naptīm vā aiwi-iritīm vā aiwi-vaṇṭīm vā aētaða hē aēte mazdayasna aētā vastrā frasnādayən maēsmana gēuš.

14. yezi aṇhaṭ izaēniš θriš frasnādayən maēsmana gēuš θriš zəmə haṅkanayən θriš āpō frasnādayən θriš mājho upa-baoḍayən raocanəm paiti nmānahe.

15. āaṭ yezi aṇhaṭ ubdaēniš xšvaš frasnādayən maēsmana gēuš xšvaš zəmə haṅkanayən xšvaš āpō frasnādayən xšvaš mājho upa-baoḍayən raocanəm paiti nmānahe.

16. arədvī ṇama āpa spitama zaraθuštra hā mē āpō yaoždadāiti hā aršṇam xšudrā hā xšaθrinəm garəwā hā xšaθrinəm paēma.

17-22. dātarə ... ašāum kaṭ tā vastra həm-yūta⁴ ... acištāi aṇuhe.

23. dātarə ... ašāum kaṭ tā nara yaoždayən aṇhən ašāum ahura mazda yā nasāum fraṇuharāt sūnō vā para-iristahe mašyehe vā.

24. āaṭ mraoṭ ahurō mazdā, ayaoždayən aṇhən ašāum zaraθuštra, taēca narō gərəḍō-kərətāsca zərəḍō-kərətāsca taēca narō spiti-dōiθra cašmanat haca nižbarəṇti tē aēšam paiti srvē aēša druxš yā nasuš upa-dvəšaiti, ayaoždya pascaēta bavaiṇti yavaēca yavaētātaēca.

25. dātarə ... ašāum kaṭ tā nara yaoždayən aṇhən ašāum ahura mazda yā nasāum maṭ-gūθam āpəm ā vā ātrəm ā vā ayaoždya frabarəṇti.

26. āaṭ mraoṭ ahurō mazdā, ayaoždayən aṇhən ašāum zaraθuštra, tē sūnō maḍaxayāsca
aogazdastəma bavaiṇti
yōi nasu-kərəta drvaṇtō
tē haēcəṇhō avāstrahe
aogazdastəma bavaiṇti
yōi nasu-kərəta drvaṇtō,

3 = Vd. 5,27-30.

4 = Vd. 5, 57-62.

27. tē zomō daēvō-dātahe
 gaojanō jaiwi-vafrāhe
 upa-srvatō xrūtahe
 aḡavatō duždāḡhahe
 aogazdastəma bavaiṅti
 yōi nasu-kərəta drvaṅtō,
 tē aēšam paiti srvē aēša druxš yā nasuš upa-dvəšaiti, ayaoždya pascaēta
 bavaiṅti yavaēca yavaētātaēca.

28. dātārə ... ašāum kaṭ tā aēsma yaoždayan aḡhən ašāum ahura mazda
 yā nasāum ava-bərəta sūnō vā para-iristahe mašyehe vā.

29. āaṭ mraoṭ ahurō mazdā, yaoždayan aḡhən ašāum zaraθuštra, kva
 aēva, yezi aēša nasuš anaiwi-ḡnixta sūnō vā kərəfš-xʷarō vayō vā kərəfš-
 xʷarō vītasti-drājō yaṭ hušanam frārāθni-drājō yaṭ naptanam aiḡhā zomō
 nidaiṅyan kəmcit paiti caθrušanam hakərəṭ āpō vīsrascayən aθa yaoždayan.

30. āaṭ yezi nasuš aiwi-ḡnixta sūnō vā kərəfš-xʷarō vayō vā kərəfš-xʷarō
 frārāθni-drājō yaṭ hušanam frabāzu-drājō yaṭ naptanam aiḡhā zomō
 nidaiṅyan kəmcit paiti caθrušanam hakərəṭ āpō vīsrascayən aθa yaoždayan.

31. aētavaṭ hušanam aēsmanam aētavaṭ naptanam aētavaṭ xraoždvanam
 aētavaṭ varədvānam aiḡhā zomō nidaiṅyan kəmcit paiti caθrušanam hakərəṭ
 āpō vīsrascayən aθa yaoždayan.

32. dātārə ... ašāum kaṭ tā yavaca vāstraca yaoždayan aḡhən ašāum
 ahura mazda yā nasāum ava-bərəta sūnō vā para-iristahe mašyehe vā.

33. āaṭ mraoṭ ahurō mazdā, yaoždayan aḡhən ašāum zaraθuštra, kva
 aēva, yezi aēša nasuš anaiwi-ḡnixta sūnō vā kərəfš-xʷarō vayō vā kərəfš-
 xʷarō frārāθni-drājō yaṭ hušanam frabāzu-drājō yaṭ naptanam aiḡhā zomō
 nidaiṅyan kəmcit paiti caθrušanam hakərəṭ āpō vīsrascayən aθa yaoždayan.

34. āaṭ yezi nasuš aiwi-ḡnixta sūnō vā kərəfš-xʷarō vayō vā kərəfš-xʷarō
 frabāzu-drājō yaṭ hušanam vībāzu-drājō yaṭ naptanam aiḡhā zomō nidaiṅyan
 kəmcit paiti caθrušanam hakərəṭ āpō vīsrascayən aθa yaoždayan.

35. aētavaṭ hušanam yavanam aētavaṭ naptanam aētavaṭ karštanam
 aētavaṭ akarštanam aētavaṭ dərətanam aētavaṭ adərətanam aētavaṭ xʷastanam
 aētavaṭ axʷastanam aētavaṭ batanam aētavaṭ abatanam aētavaṭ ašanam aētavaṭ
 anašanam aētavaṭ aθrəṅtəm yavanam aiḡhā zomō nidaiṅyan kəmcit paiti
 caθrušanam hakərəṭ āpō vīsrascayən aθa yaoždayan.

36. dātārə ... ašāum yaṭ aēte yōi mazdayasna baēšzai fravazānte katārō
 pairvō āmayānte mazdayasnaēibyō vā daēvayasnaēibyō vā.

37. āaṭ mraoṭ ahurō mazdā, daēvayasnaēibyō pairvō āmayayaṅta yaθa
 mazdayasnaēibyascit, yaṭ paoirim daēvayasno kərəṅtāt ava hō miryāite yaṭ
 bitim daēvayasno kərəṅtāt ava hō miryāite yaṭ θiritim daēvayasno kərəṅtāt
 ava hō miryāite anāmātō zī aēšō yavaēca yavaētātaēca.

38. māca pascaēta mazdayasna vīmādescit vīmādayaṅta māca kərəṅtu
 mazdayasna māca kərətu irišyāt, yezi pascaēta mazdayasna vīmādescit

vīmādayānte yezi kərəntē mazdayasna yezi kərətu irišyāt para hē irišəntō raēšəm cikayať baodō-varštahe ciθaya.

39. yať paoirīm daēvayasnō kərəntāt apa hō jasāt yať bitīm daēvayasnō kərəntāt apa hō jasāt yať θritīm daēvayasnō kərəntāt apa hō jasāt amātō zī aēšō yavaēca yavaētātaēca.

40. vasō pascaēta mazdayasna vīmādesciť vīmādayaŋta vasō kərəntu mazdayasna vasō kərətu bišazyāt.

41. āθraVANəm bišazyāt dahmayāt parō āfritōiť nmānahe nmānō-paitīm bišazyāt nitəməm staorəm arəjō vīsō vīspaitīm bišazyāt mađəməm staorəm arəjō zaŋtəuš zaŋtupaitīm bišazyāt aγrīm staorəm arəjō daiŋhəuš daiŋ hupaitīm bišazyāt vāšəm caθru-yuxtəm arəjō.

42. yať paoirīm nmānahe nmānō-paitīm nāirikəm bišazyāt kaθwa daēnu arəjō vīsō vīspaitīm nāirikəm bišazyāt gava daēnu arəjō zaŋtəuš zaŋtupaitīm nāirikəm bišazyāt aspa daēnu arəjō daiŋhəuš daiŋhupaitīm nāirikəm bišazyāt uštra daēnu arəjō.

43. vīsō puθrəm bišazyāt aγrīm staorəm arəjō aγrīm staorəm bišazyāt mađəməm staorəm arəjō mađəməm staorəm bišazyāt nitəməm staorəm arəjō nitəməm staorəm bišazyāt anumaēm arəjō anumaēm bišazyāt gəuš x^varəθahe arəjō.

44. yať pouru-baēšaza haŋjasānte spitama zaraθuštra karətō-baēšazəšca urvarō-baēšazəšca maθrō-baēšazəšca təm iθra haŋjasānte yať maθrəm spəntəm baēšazəm, aēšō zī asti baēšazanəm baēšazyōtəmō yať maθrəm spəntəm baēšazyō yō narš ašəonō haca uruθwaŋ bišazyāt.

45. dātarə ... ašāum cvaŋtəm drājō zrvānəm sairi mašya iriste zəmə niđāite raocā aiwi-varəna hvarə-darəsyā zəmə bavaiŋti.

46. āať mraoť ahurō mazdā, yārə-drājō ašāum zaraθuštra sairi mašya iriste zəmə niđāite raocā aiwi-varəna hvarə-darəsyā zəmə bavaiŋti.

47. dātarə ... ašāum cvaŋtəm drājō zrvānəm sairi mašya iriste zəmə nikaŋte havať-zəmə bavaiŋti.

48. āať mraoť ahurō mazdā, pasca paŋcāsatəm sarəđəm spitama zaraθuštra sairi mašya iriste zəmə nikaŋte havať-zəmə bavaiŋti.

49. dātarə ... ašāum cvaŋtəm drājō zrvānəm sairi mašya iriste daxme niđāite havať-zəmə bavaiŋti.

50. āať mraoť ahurō mazdā, nōiť nū para ahmāt spitama zaraθuštra yať aēša pašnu raēθwāt, hašāēša spitama zaraθuštra kəmcit̄ aŋhəuš astvatō aētaēšva daxmaēšva vī-kaŋtē.

51. yasca mē aētaēšəm yať daxmanəm avavaŋtəm mazō vīkānayāt yaθa hē tanuš aŋhať patitəm hē manō aŋhať patitəm vacō patitəm šyaoθnəm uzvarštəm hē manō aŋhať uzvarštəm vacō uzvarštəm šyaoθnəm.

52. nōiť zī ahmi paiti nairi dva mainyū rēna ava-stāŋhať, fraša fraya vahištəm ā ahūm, bərəjayāŋti-šē zaraθuštra strəšca māŋhəmca hvarəca

azəmca hē bərəjaēm yō dadvā ahurō mazdā, ušta iθa tē narə yō iθyejanhataṭ haca aṅhaot aiθyejanhəm ahūm ā frafrā.

53. dātarə ... ašāum kva asti daēvō kva daēvayāzō kva daēvanəm haṇdvarənō kva daēvanəm haṇ-patanō kva daēva haṇdvarənti paṅcasaynāi sataynāišca sataynāi hazaṅraynāišca hazaṅraynāi baēvarəynāišca baēvarəynāi ahaštaynāišca.

54. āaṭ mraoṭ ahurō mazdā, aētaēšva daxmaēšva spitama zaraθuštra yōi paiti āya zəmā bavaiṅti uzdaēza uzdišta yahmya narō irista niḍayeinte hāu asti daēvō hāu daēvayāzō hāu daēvanəm haṇdvarənō hāu daēvanəm haṇ-patanō avat daēva haṇdvarənti paṅcasaynāi sataynāišca sataynāi hazaṅraynāišca hazaṅraynāi baēvarəynāišca baēvarəynāi ahaštaynāišca.

55. maṅayən bā spitama zaraθuštra aēte yōi daēva aētaēšva daxmaēšva gaṅhənti apāca vaēpənti yaθa aētahmi aṅhvō yaṭ astvaiṅti yūžəm yōi mašyāka x^varəθa x^vāsta huyārəš gaṃca x^vāstəm x^varaiti nāuiti hā aēte yōi mašyāka x^varənti framanyete.

56. aēšō zī asti daēvanəm rapakō vīspəm ā ahmāt yaṭ aēša gaṅtiš upaṅhacaiti.

57. aētaēšva daxmaēšva haṇ-bavaiṅti axtišca garənušca tafnušca naēzasca sārastišca aṅōstišca pourušu asti varsō.

58. aētaēšva daxmaēšva mašya haṇ mərəṅcyəstəma bavaiṅti pasca hū frāšmō-dāitim.

59. taēca yā kasu-xratuš masyō-xraθwəm nōiṭ paitišaiti θrišum aētaēšəm axtinəm janayō drəṅjaiti aoštaca paiti dumnaca θrivataca gaēsuš.

60-69. dātarə ... ašāum yaṭ ahmi nmāne yaṭ māzdayasnōiš nāirika upaspuθrīm jasāt⁵ ... apāca nava upa maṅəm paiti avathā yaoždayaṅ.

70. dātarə ... ašāum yezica hē haṇ tafnō jasāt avi tanuye zōišnuye yezica hē dva yaska avi acištō ājasāt yasca šudō yasca taršnō x^varāt aēša nāirika āpəm.

71. āaṭ mraoṭ ahurō mazdā, x^varāt avat hē asti masyō arəθəm yaṭ uštānəm buṅjayāt para kahmāiciṭ dahmanəm dahmāhu vaēθāhu dahmaca ašavanasca, ada aēša nāirika zastō-maiti āpəm fraṅuharāt, āaṭ vō yūžəm yōi mazdayasna ciθəm frāθwəsaēta aoxtō ratuš aoxtō sraošāvarəzō ciθəm frāθwərsaiti.

72. kā-hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzanəṅəm upāzōiṭ aspahe aštraya duye saite sraošō-caranaya.

73. dātarə ... ašāum kaṭ tā tašta āṅuharəna yaoždayaṅ aṅhən ašāum ahura mazda yā nasāum ava-bərəta sūnō vā para-iristahe mašyehe vā.

5 Parr. 60-69 = Vd. 5, 45-54.

74. āaṭ mraoṭ ahurō mazdā, yaoždayaṇ aṇhən ašāum zaraθuštra, kva aēva, yezi aṇhaṭ zarənaēniš hakərəṭ frasnādayəṇ maēsmana gəuš hakərəṭ zəmə uzdāṭayaṇ hakərəṭ āpō frasnādayəṇ aṭa yaoždayaṇ.

75. āaṭ yezi aṇhaṭ ərəzataēniš biš frasnādayəṇ maēsmana gəuš biš zəmə uzdāṭayaṇ biš āpō frasnādayəṇ aṭa yaoždayaṇ, āaṭ yezi aṇhaṭ ayaṇhaēniš θriš frasnādayəṇ maēsmana gəuš θriš zəmə uzdāṭayaṇ θriš āpō frasnādayəṇ aṭa yaoždayaṇ, āaṭ yezi aṇhaṭ haosafnaēniš caθruš frasnādayəṇ maēsmana gəuš caθruš zəmə uzdāṭayaṇ caθruš āpō frasnādayəṇ aṭa yaoždayaṇ, āaṭ yezi aṇhaṭ zarštvaēniš xšvaš frasnādayəṇ maēsmana gəuš xšvaš zəmə uzdāṭayaṇ xšvaš āpō frasnādayəṇ aṭa yaoždayaṇ, āaṭ yezi aṇhaṭ zəmaēniš drvaēniš fravāxšaēniš yavaētāite ayaoždya.

76. dātarə ... ašāum kaṭ tā gəuš yaoždayaṇ aṇhən ašāum ahura mazda yā nasāum fraṇuharāt sūnō vā para-iristahe mašyehe vā.

77. āaṭ mraoṭ ahurō mazdā, yaoždayaṇ aṇhən ašāum zaraθuštra, nōiṭ payō fšuta zaoθre nōiṭ gəuš zaoθre barəsmaine paiti-baire aṇtarāt naēmāt yārə-drājō āaṭ pasca yārə-drājō vasō x'arəθā aṇhən nərəbyō ašavabyō hamaṭa yaṭa paraciṭ.

78. kō hō aṇhaṭ ahura mazda yō ašəm mainimnō ašəm isəmnō ašəm aparaoḍayeite ašəmca mainimnō drujimca vīnasti.

79. āaṭ mraoṭ ahurō mazdā, hō bā aṇhaṭ ašāum zaraθuštra yō ašəm mainimnō ašəm isəmnō ašəm aparaoḍayeite ašəmca mainimnō drujimca vīnasti yō nasumaitīm āpəm vīzaoθraṇ frabaraiti yō upa-naxturušu tāθraēšu vīzaoθraṇ frabaraiti.

8.

1. āaṭ yaṭ dāuru upa-darane vā nimatō aiwi-varane vā spā vā nā vā iriṭyāt kuṭa tē vərəzyaṇ aēte yōi mazdayasna.

2. āaṭ mraoṭ ahurō mazdā, upairi daxma aēšayaṇ vī daxma caēšayaṇ, yezi aētəm iristəm upa-bərəθwōtarəm ava-zanaṇ ava aētəm iristəm barayəṇ avaṭa nmānəm hərəzayəṇ upa aētəm nmānəm baodaṇaṇ urvāsna yā vohu-gaonahe vā vohu-kərətōiš vā hadānaēpatayā vā kəmciṭ vā hubaoiḍitəmanəṇ urvaranaṇ.

3. yezi aētəm nmānəm upa-bərəθwōtarəm ava-zanaṇ ava aētəm nmānəm barayəṇ avaṭa iristəm hərəzayəṇ upa aētəm nmānəm baodaṇaṇ urvāsna yā vā ... urvaranaṇ.

4. dātarə ... ašāum yaṭ ahmi nmāne yaṭ māzdayasnōiš spā vā nā vā iriṭyāt vārəṇti vā snaēžiṇti vā barəṇti vā təmaṇhaṇ vā aiwi-gātō ayaṇ vā varətafšō varətō-vīre jasəṇti kuṭa tē vərəzyaṇ aēte yōi mazdayasna.

5-7. āaṭ mraoṭ ahurō mazdā, yaṭ ahmi nmāne yaṭ māzdayasnōiš fraēštəm⁶ ... θrigāim haca nərəbyō ašavabyō.

8. aētāḍa hē aēte mazdayasna aiṇhā zəmə ava-kanəm ava-kanayəṇ maiḍyōi paitištāne xrūždisme maiḍyōi narš varədušme ava hē gātūm barayəṇ

6 Parr. 5-7 = Vd. 5, 46-48.

ātryeche vā sairyehē vā ava hē uparāt naēmāt barayən ištyehē vā zarštvahe vā hušo-zəmanəm vā pašnūm.

9. aētaða hē uzbaodəm tanūm nidaiθyaŋ bixšaparəm vā θrixšaparəm vā mǎzdrǎjahīm vā vīspəm ā ahmāt yaṭ frā vayō patāŋ frā urvara uxšyaŋ nyāncō apa-tacin us vātō zəm haēcayāt.

10. āaṭ yaṭ hīš frā vayō patāŋ frā urvara uxšyaŋ nyāncō apa-tacin us vātō zəm haēcayāt aētaða hē aēte mazdayasna ahe nmānahe upa-θwərəsaŋ upa-θwərəsaŋ, dva dim nara isōiθe vīzōištəm vīzvārəntəm maŋna anaiwi-vastra zəməištve vā zarštve vā upa-skaŋbəm vīcicaēšva dim paiṭi aiŋhā zəmə nidaiθyaŋ yaðōiṭ dim bāidištəm avazaŋ sūnō vā kərəfš-x'arō vayō vā kərəfš-x'arō.

11. aētaða aēte nasukaša nišhiðaēta avavaṭ haca iristaēibyō yaθa θrigāim, āaṭ vaocāt ratuš ašava mazdayasnaēibyō, mazdayasna həm aēte maēsma barayən yaēibyō aēte nasukaša frasnyānte varəsāsca tanūmca.

12. dātarə ... ašāum cayō āaṭ aēte maēsma aŋhən ašāum ahura mazda yaēibyō aēte nasukaša frasnyānte varəsāsca tanūmca pasvəm vā staorəm vā narəm vā nāirinəm vā.

13. āaṭ mraoṭ ahurō mazdā, pasvəm vā staorəm vā nōiṭ narəm nōiṭ nāirinəm paragōṭ dvaēibya yōi aŋhən x'aētvaðaθasca x'aētvaðaiθīšca aēte maēsma maēzayaŋta yaēibyō aēte nasukaša frasnyānte varəsāsca tanūmca.

14. dātarə ... ašāum yōi paθa uzbarənte spānasca irista naraēca irista kaṭ tā paθā frayaŋ pasvəm vā staorəm vā narəm vā nāirinəm vā ātrəm vā ahurahe mazdā puθrəm barəsma vā ašaya frastarətm.

15. āaṭ mraoṭ ahurō mazdā, nōiṭ tā paθā frayaŋ pasvəm nōiṭ staorəm nōiṭ narəm nōiṭ nāirinəm nōiṭ ātrəm ahurahe mazdā puθrəm nōiṭ barəsma ašaya frastarətm.

16. spānəm zairitəm caθru-cašməm spaētəm zairi-gaošəm āθritim taða aētā paθā vivādayaŋtu, aiwi-niticiṭ spitama zaraθuštra spānəm zairitəm caθru-cašməm spaētəm zairi-gaošəm aēša druxš yā nasuš apa-dvəšaiti apāxədraēibyō naēmaēibyō.

17. yezi nōiṭ upa vī spitama zaraθuštra spānəm zairitəm caθru-cašməm nōiṭ spaētəm zairi-gaošəm xšvažayaciṭ taða aētā paθā vivādayaŋtu, aiwi-niticiṭ spitama zaraθuštra spānəm zairitəm caθru-cašməm spaētəm zairi-gaošəm aēša druxš yā nasuš apa-dvəšaiti apāxədraēibyō naēmaēibyō.

18. yezi nōiṭ upa-vī spitama zaraθuštra spānəm zairitəm caθru-cašməm nōiṭ spaētəm zairi-gaošəm nāumayāciṭ taða aētā paθā vivādayaŋtu, aiwi-niticiṭ spitama zaraθuštra spānəm zairitəm caθru-cašməm spaētəm zairi-gaošəm aēša druxš yā nasuš apa-dvəšaiti apāxədraēibyō naēmaēibyō.

19. yezi nōiṭ ... zairi-gaošəm āθrava paoirim aētā paθā frayaŋtu vārəθraŋniš vacō framrū, yaθā ahū vairyō ... vāstārəm.

20. kəm-nā mazdā ... frāvaocā, kə vərəθrəm jā ... kahmāiciṭ.

21. pāta-nō ūbišyaŋtaṭ pairi mazdāsca ārmaitišca spəntasca, nase daēvī druxš nase daēvō-ciθre nase daēvō-frakaršte nase daēvō-fradāiti apa druxš

nase apa druxš dvāra apa druxš vīnase apāxəðre apa-nasyehe māmərəncainiš gaēθā astvaitiš ašahe.

22. vasō pascaēta mazdayasna aētā paθā frayaṇ pasvaṃ vā staoraṃ vā naraṃ vā nāirināṃ vā ātrəṃ vā ahurahe mazdā puθrəṃ barəsma vā ašaya frastarətəm, vasō pascaēta mazdayasna ahe nmānahe myazdəm daiθyārəš gaoməntəm maḍumaṇtəm yaoždayaṇ anāstərətəm hamaθa yaθa paraciṭ.

23. dātarə ... ašāum yō vastrəṃ upaṇharəzaiti upairi aētəm iristəm ubdaēnəm vā īzaēnəm vā avavaṭ aipi yaθa narš aoθravana kā hē asti ciθa, āaṭ mraoṭ ahurō mazdā, caθwārō sata upāzananāṃ upāzōiṭ aspahe aštraya caθwārō sata sraošō-caranaya.

24. dātarə ... ašāum yō vastrəṃ upaṇharəzaiti upairi aētəm iristəm ubdaēnəm vā īzaēnəm vā avavaṭ aipi yaθa karanəm vayō-gravanəm kā hē asti ciθa, āaṭ mraoṭ ahurō mazdā, xšvaš sata upāzananāṃ upāzōiṭ aspahe aštraya xšvaš sata sraošō-caranaya.

25. dātarə ... ašāum yō vastrəṃ upaṇharəzaiti upairi aētəm iristəm ubdaēnəm vā īzaēnəm vā avavaṭ aipi yaθa ōyūm vīrō-vastrəṃ kā hē asti ciθa, āaṭ mraoṭ ahurō mazdā, hazarəṃ upāzananāṃ upāzōiṭ aspahe aštraya hazarəṃ sraošō-caranaya.

26. dātarə ... ašāum yaṭ anusō vifyeiti vifyeitica kā hē asti ciθa, āaṭ mraoṭ ahurō mazdā, ašta sata upāzananāṃ upāzōiṭ aspahe aštraya ašta sata sraošō-caranaya.

27. dātarə ... ašāum yaṭ usō vifyeiti vifyeitica kā hē asti ciθa kā hē asti āpərətiš kaṭ hē asti yaoždāθrəṃ, āaṭ mraoṭ ahurō mazdā, nava hē asti ciθa nava hē asti āpərətiš nōiṭ hē asti yaoždāθrəṃ anāpərəθa haca šyaoθna yavaēca yavaētātaēca.

28-30. kva aēva⁷ ... pərənāyuš ciθaṃ θwərəsaiti.

31. dātarə ... ašāum kō asti daēvō kō daēvayāzō kō daēvanāṃ xawzō kō daēvanāṃ xumbō kō daēvanāṃ kū-nāiriš kō havəš daēvō kō vīspō daēvō kō para mərətō daēvō kō pasca mərətō mainyava daēva frabavaiṇti.

32. āaṭ mraoṭ ahurō mazdā, aršaca vīptō aršaca vaēpayō spitama zaraθuštra hāu asti daēvō hāu daēvayāzō hāu daēvanāṃ xawzō hāu daēvanāṃ xumbō hāu daēvanāṃ kū-nāiriš hāu havəš daēvō hāu vīspō daēvō hō para mərətō daēvō hō pasca mərətō mainyava daēva frabavaiṇti yaṭ mašyō mašīm xšudrā avi fraṇhərəzaiti yaṭ vā mašyō mašyānāṃ xšudranāṃ para-gəurvayeiti.

33. dātarə ... ašāum kaṭ tā nara yaoždayaṇ aṇhən ašāum ahura mazda yā nasāum ava-hištāt hišunāṃ tarō yārə mərətanāṃ.

7 = Vd. 3, 40-42.

34. āaṭ mraoṭ ahurō mazdā, yaoždayaṇ aṇhən ašāum zaraθuštra, nōiṭ hušō hišvāi sraešyeiti, yezi hušō hišvāi sraešyeiṇtim aṇhāṭ iṣarəštāitya mē višpō aṇhuš astvā iṣasəm jiṭ-ašəm xraodaṭ-urva pəšō-tanuš frēna aṇhəm nasunaṃ yā paiti āya zəmə iririθarə.

35. dātarə ... ašāum kaṭ tā nara yaoždayaṇ aṇhən ašāum ahura mazda yā nasāum ava-bərəta sūnō vā para-iristahe mašyehe vā.

36. āaṭ mraoṭ ahurō mazdā, yaoždayaṇ aṇhən ašāum zaraθuštra, kva aēva, yezi aēša nasuš aiwi-ṇixta sūnō vā kərəfš-xʻarō vayō vā kərəfš-xʻarō āaṭ hvəṃ tanūm pairi-yaoždaiθita gəuš maēsmana apāca paiti avaθa yaoždayaṇ.

37. āaṭ yezi nasuš anaiwi-ṇixta sūnō vā kərəfš-xʻarō vayō vā kərəfš-xʻarō paoirīm taḍa dim mazdayasna aiṇhā zəmə θriš maṇəm ava-kanayən āaṭ hvəṃ tanūm pairi-yaoždaiθita gəuš maēsmana nōiṭ āpō, frā-mē gaḍwa zazayaṇ nižbərəta nōiṭ ainižbərəta nižbərətāt haca paourvaēibya.

38. bitīm taḍa dim mazdayasna aiṇhā zəmə θriš maṇəm ava-kanayən āaṭ hvəṃ tanūm pairi-yaoždaiθita gəuš maēsmana nōiṭ āpō, frā-mē gaḍwa zazayaṇ nižbərəta nōiṭ ainižbərəta nižbərətāt haca paourvaēibya, višpəm ā ahmāt upa-maṇayən yaṭ hē upəməm paiti vaṇdanahe upəmāt varsa hiku bavāt.

39. θritīm taḍa dim mazdayasna aiṇhā zəmə θriš maṇəm ava-kanayən avayaṭ haca paourvaēibya yaθa θrigāim, āaṭ hvəṃ tanūm pairi-yaoždaiθita āpō nōiṭ maēsmana.

40. zasta hē paoirīm frasnādayən, āaṭ yaṭ hē zasta nōiṭ frasnāta āaṭ višpəm hvəṃ tanūm ayaoždāta kərənaoiti, āaṭ yaṭ hē zasta frasnāta aθritīm pasca frasnātaēibya zastaēibya barəšnūm hē vaṇdanəm pourum paiti-ḥiṇcōiš.

41. dātarə ... ašāum yezica āpō vaṇuhiš barəšnūm vaṇdanəm pourum paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, paitiša hē hō-nā aṇtarāt naēmāt brvaṭ-byəṃ aēšəm aēša druxš yā nasuš upa-dvəšaiti.

42. dātarə ... yezica āpō vaṇuhiš paitiša hē hō-nā aṇtarāt naēmāt brvaṭ-byəṃ paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, pasca hē vaṇdanəm aēšəm aēša druxš yā nasuš upa-dvəšaiti.

43. dātarə ... yezica āpō vaṇuhiš pasca vaṇdanəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, paitiša hē paitiš-xʻarənəm aēšəm aēša druxš yā nasuš upa-dvəšaiti.

44. dātarə ... yezica āpō vaṇuhiš paitiša paitiš-xʻarənəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, dašinəm hē gaošəm aēšəm aēša druxš yā nasuš upa-dvəšaiti.

45. dātarə ... yezica āpō vaṇuhiš dašinəm gaošəm paiti-jasaiti kva aēšəm aēša druxš yā nasuš upa-dvəšaiti, āaṭ mraoṭ ahurō mazdā, hōyūm hē gaošəm aēšəm aēša druxš yā nasuš upa-dvəšaiti.

46. dātarə ... yezica āpō vaṇuhīš hōyūm gaošəm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, dašīnəm hē suptīm aēšəm aēša druخش yā nasuš upa-dvāšaiti.

47. dātarə ... yezica āpō vaṇuhīš dašīnəm suptīm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, haoyəm hē suptīm aēšəm aēša druخش yā nasuš upa-dvāšaiti.

48. dātarə ... yezica āpō vaṇuhīš haoyəm suptīm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, dašīnəm hē kašəm aēšəm aēša druخش yā nasuš upa-dvāšaiti.

49. dātarə ... yezica āpō vaṇuhīš dašīnəm kašəm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, hōyūm hē kašəm aēšəm aēša druخش yā nasuš upa-dvāšaiti.

50. dātarə ... yezica āpō vaṇuhīš hōyūm kašəm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, paitiša hē paitivarəm aēšəm aēša druخش yā nasuš upa-dvāšaiti.

51. dātarə ... yezica āpō vaṇuhīš paitiša paitivarəm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, paršti hē aēšəm aēša druخش yā nasuš upa-dvāšaiti.

52. dātarə ... yezica āpō vaṇuhīš paršti paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, dašīnəm hē fštānəm aēšəm aēša druخش yā nasuš upa-dvāšaiti.

53. dātarə ... yezica āpō vaṇuhīš dašīnəm fštānəm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, hōyūm hē fštānəm aēšəm aēša druخش yā nasuš upa-dvāšaiti.

54. dātarə ... yezica āpō vaṇuhīš hōyūm fštānəm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, dašīnəm hē pərəsāum aēšəm aēša druخش yā nasuš upa-dvāšaiti.

55. dātarə ... yezica āpō vaṇuhīš dašīnəm pərəsāum paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, hōyūm hē pərəsāum aēšəm aēša druخش yā nasuš upa-dvāšaiti.

56. dātarə ... yezica āpō vaṇuhīš hōyūm pərəsāum paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, dašīnəm hē sraonīm aēšəm aēša druخش yā nasuš upa-dvāšaiti.

57. dātarə ... yezica āpō vaṇuhīš dašīnəm sraonīm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, haoyəm hē sraonīm aēšəm aēša druخش yā nasuš upa-dvāšaiti.

58. dātarə ... yezica āpō vaṇuhīš haoyəm sraonīm paiti-jasaiti kva aēšəm aēša druخش yā nasuš upa-dvāšaiti, āaṭ mraoṭ ahurō mazdā, haxti hē aēšəm aēša druخش yā nasuš upa-dvāšaiti, yezi nairyō aṇhaṭ pasca hē pourum paiti-hiṇčōiš paitiša aparəm yezi strī aṇhaṭ paitiša hē pourum paiti-hiṇčōiš pasca aparəm.

59. dātarə ... yezica āpō vaṇuhīš haxti paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, dašinəm hē rānəm aēšam aēša druxš yā nasuš upa-dvāšaiti.

60. dātarə ... yezica āpō vaṇuhīš dašinəm rānəm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, hōyüm hē rānəm aēšam aēša druxš yā nasuš upa-dvāšaiti.

61. dātarə ... yezica āpō vaṇuhīš hōyüm rānəm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, dašinəm hē žnüm aēšam aēša druxš yā nasuš upa-dvāšaiti.

62. dātarə ... yezica āpō vaṇuhīš dašinəm žnüm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, hōyüm hē žnüm aēšam aēša druxš yā nasuš upa-dvāšaiti.

63. dātarə ... yezica āpō vaṇuhīš hōyüm žnüm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, dašinəm hē ascüm aēšam aēša druxš yā nasuš upa-dvāšaiti.

64. dātarə ... yezica āpō vaṇuhīš dašinəm ascüm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, hōyüm hē ascüm aēšam aēša druxš yā nasuš upa-dvāšaiti.

65. dātarə ... yezica āpō vaṇuhīš hōyüm ascüm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, dašinəm hē zaṅəm aēšam aēša druxš yā nasuš upa-dvāšaiti.

66. dātarə ... yezica āpō vaṇuhīš dašinəm zaṅəm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, hōyüm hē zaṅəm aēšam aēša druxš yā nasuš upa-dvāšaiti.

67. dātarə ... yezica āpō vaṇuhīš hōyüm zaṅəm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, dašinəm hē frabdəm aēšam aēša druxš yā nasuš upa-dvāšaiti.

68. dātarə ... yezica āpō vaṇuhīš dašinəm frabdəm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, hōyüm hē frabdəm aēšam aēša druxš yā nasuš upa-dvāšaiti.

69. dātarə ... yezica āpō vaṇuhīš hōyüm frabdəm paiti-jasaiti kva aēšam aēša druxš yā nasuš upa-dvāšaiti, āaṭ mraoṭ ahurō mazdā, adairi haxəm nivōiryete maṇayən ahe yaṭha maxšyā parənəm.

70. hakaṭ nigərəptaēibya aṅuštaēibya uzgərəptaēibya pāšnaēibya dašinəm hē haxəm paiti-hiṅcōiš āaṭ hā druxš yā nasuš hōyüm haxəm upa-dvāšaiti, hōyüm hē haxəm paiti-hiṅcōiš āaṭ hā druxš yā nasuš adairi aṅušta nivōiryete maṇayən ahe yaṭha maxšyā parənəm.

71. hakaṭ nigərəptaēibya pāšnaēibya uzgərəptaēibya aṅuštaēibya dašinəm hē aṅuštəm paiti-hiṅcōiš, āaṭ hā druxš yā nasuš haoyəm aṅuštəm upa-dvāšaiti, haoyəm hē aṅuštəm paiti-hiṅcōiš 72. āaṭ hā druxš yā nasuš nivōiryete....

73. dātārē ... ašāum yaṭ aēte yōi mazdayasna pāda ayaṅtēm vā taciṅtēm vā barəmnəm vā vazəmnəm vā ātrəm nasupākəm frajasən nasūm ḥəm-pacən nasūm ḥāvayaṅ kuṭa tē vərəzyaṅ aēte yōi mazdayasna.

74. āaṭ mraoṭ ahurō mazdā, ava aētəm nasupākəm janaēta ava hē janayən apa aēṭəm dištəm barayən apa aētəm uzdānəm barayən.

75. āōraṭ haca bānuwe aēsmaṭ frasaocayāhi yaṭ vā aētaṅḥəm urvaranəm yaṭ ātrə-ciθranəm yaṭ vā aētəm ātrəm uzdarəza aētayā urvarayā ātarəcarəš vīca barōiṭ vīca šāvayōiṭ yaṭa āsištəm frāvayōiṭ.

76. yaṭa taḍa paoirīm ḥaṅdarəza zəmə aētaṭ paiti nidaiθita avavaṭ haca āōraṭ nasupakāt yaṭa fratarə-vītastiš vīca barōiṭ vīca šāvayōiṭ yaṭa āsištəm frāvayōiṭ.

77. yaṭa taḍa bitīm ḥaṅdarəza ... yaṭa taḍa θritīm ḥaṅdarəza ... yaṭa taḍa tūirīm ḥaṅdarəza ... yaṭa taḍa puxdəm ḥaṅdarəza ... yaṭa taḍa xštūm ḥaṅdarəza ... yaṭa taḍa haptaθəm ḥaṅdarəza ... yaṭa taḍa aštəməm ḥaṅdarəza....

78. yaṭa taḍa nāuməm ḥaṅdarəza zəmə aētaṭ paiti nidaiθita avavaṭ haca āōraṭ nasupakāt yaṭa fratarə-vītastiš,

79. yō aēsṃō ašaya baraṭ spitama zaraθuštra urvāsnyā vā vohu-gaonahe vā vohu-kərətōiš vā ḥadānaēpatayā vā kəmciṭ vā ḥubaoiḍitəmanəm urvaranəm

80. yahmāt kahmāiciṭ naēmanəm vātō āθrō baoiḍim vībaraiti ahmāt kahmāiciṭ naēmanəm ḥazaṅraṅna paiti-jasaiti ātarš mazdā ahurahe daēvanəm mainyavanəm təmasciθranəm drvatəm bižvaṭ yātunəmca pairikanəmca.

81. dātārē ... ašāum yō ātrəm nasupākəm dāitīm gātūm avi ava-baraiti cvaṭ ahmāi naire miždəm aṅḥaṭ pasca astasca baodaṅḥasca vī-urvīštīm, āaṭ mraoṭ ahurō mazdā, yaṭa aētahmi aṅhvō yaṭ astvaiṅti baēvarē ātrə-saokanəm dāitīm gātūm avi ava-baraiti.

82. dātārē ... yō ātrəm uruzdipākəm ... cvaṭ ahmāi naire miždəm aṅḥaṭ pasca astasca baodaṅḥasca vī-urvīštīm, āaṭ mraoṭ ahurō mazdā, yaṭa aētahmi aṅhvō yaṭ astvaiṅti ḥazaṅrəm ātrə-saokanəm dāitīm gātūm avi ava-baraiti.

83. ... yō ātrəm saire-hyaṭ haca ... yaṭa aētahmi aṅhvō yaṭ astvaiṅti paṅca sata ātrə-saokanəm....

84. ... yō ātrəm xumbaṭ haca zəmaini-pacikāt ... caθwārō sata ātrə-saokanəm dāitīm gātūm....

85. ... yō ātrəm xumbaṭ haca yāmō-pacikāt ... āaṭ mraoṭ ahurō mazdā, yavaṭ ahmāi yamanəm paitinəm sairinəm aētavaṭ ātrə-saokanəm ḥəm-bərəta dāitīm gātūm avi ava-baraiti.

86. ... yō ātrəm aonyat haca parō-bərəjyāt ... āaṭ mraoṭ ahurō mazdā, yavaṭ ahmāi paitinəm urvaranəm aētavaṭ ātrə-saokanəm ḥəm-bərəta dāitīm gātūm avi ava-baraiti.

87. ... yō ātrəm pisraṭ haca zaranyō-saēpāt ... satəm ātrə-saokanəm....

88. ... yō ātrəm pisraṭ haca ərəzatō-saēpāt ... navaitīm ātrə-saokanəm....

89. ... yō ātrēm pisraṭ haca ayō-saēpāt ... aštāitīm ātrə-saokanām....

90. ... yō ātrēm pisraṭ haca haosafnaēnō-saēpāt ... haptāitīm ātrə-saokanām....

91-94. ... yō ātrēm tanuraṭ haca ... xšvaštīm ātrə-saokanām.... ... yō ātrēm dištaṭ haca ... pañcāsātəm ātrə-saokanām.... ... yō ātrēm aonyāṭ haca taxairyāṭ ... caθwārəsātəm ātrə-saokanām.... ... yō ātrēm pantaṭ haca staorō-payāt ... θrisātəm ātrə-saokanām....

95-96. ... yō ātrēm skairyāṭ haca ... vīsaiti ātrə-saokanām.... ... yō ātrēm nazdištaṭ haca ... āaṭ mraoṭ ahurō mazdā, yaθa aētahmi aṅhvō yaṭ astvaiṅti dasa ātrə-saokanām dāitīm gātīm avi ava-baraiti.

97. dātarə ... ašāum kaṭ tā nara yaoždayaṅ aṅhən ašāum ahura mazda yā nasāum ava-hišta dūire asahi razanḡam.

98. āaṭ mraoṭ ahurō mazdā, yaoždayaṅ aṅhən ašāum zaraθuštra, kva aēva, yezi aēša nasuš aiwi-ḡnixta sūnō vā kərəfš-xʳarō vayō vā kərəfš-xʳarō āaṭ hvam tanūm pairi-yaoždaiθita gōuš maēsmana θrisataθwəm frasnātēe θrisataθwəm upa-snātēe aḡryam paiti usnāitīm.

99. āaṭ yezi nasuš anaiwi-ḡnixta sūnō vā kərəfš-xʳarō vayō vā kərəfš-xʳarō pañca-dasa frasnātēe pañca-dasa upasnātēe.

100. tacaṭ paoirīm hāθrəm fraša adāt tacōiṭ yaṭ dim kasciṭ aṅhēuš astvatō aētaða paiti ava-hištēe bərəzyaogəṭ vacō rāzayaṅ, ida iristahe tanūm ava-hišta anaēšəm manō anaēšəm vacō anaēšəm šyaoθnəm isaēta mē yaoždāitīm, tacaṭ paoirīm upāiti yezi dim nōiṭ yaoždaθəṅte θrišūm aētahe šyaoθnahe baxšəṅti.

101. tacaṭ bitīm hāθrəm ... bitīm upāiti, yezi dim nōiṭ yaoždaθəṅte naēməm aētahe šyaoθnahe baxšəṅti.

102. tacaṭ θritīm hāθrəm ... θritīm upāiti, yezi dim nōiṭ yaoždaθəṅte vīspəm aētahe šyaoθnahe baxšəṅti.

103. fraša adāt tacōiṭ yaṭ dim nazdištəm avi nmānəmca vīsəmca zaṅtūmca dahyūmca aētaða paiti ava-hištēe bərəzyaogəṭ vacō rāzayaṅ, ida iristahe tanūm ava-hišta anaēšəm manō anaēšəm vacō anaēšəm šyaoθnəm isaēta mē yaoždāitīm, yezi dim nōiṭ yaoždaθəṅte āaṭ hvam tanūm pairi-yaoždaiθita gōuš maēsmana apāca paiti avaθa yaoždayaṅ.

104. dātarə ... āaṭ yezi aṅhaṭ āfš aṅtarāt naēmāt aēte paθa āfš ciθam fraorisaiti kā hē asti ciθa.

105. āaṭ mraoṭ ahurō mazdā, caθwārō sata upāzananam upāzōiṭ aspahe aštraya caθwārō sata sraošō-caranaya.

106. dātarə ... āaṭ yezi aṅhaṭ urvara aṅtarāt naēmāt aēte paθa ātarš ciθam fraorisaiti kā hē asti ciθa.

107. āaṭ mraoṭ ahurō mazdā, caθwārō ... sraošō-caranaya, hā hē asti ciθa hā hē asti āpərətiš aipi-pārəmnāi ida ašaone nōiṭ anaipi-pārəmnāi drujō nmāne haiθyā aṅhən astayō.

ašəm vohū.....

9.

1. pərəsaṭ zaraθuštrō ahurəm mazdām, ahura mazda mainyō spōništa dātārə gaēθanaṃ astvaitinaṃ ašāum kuθa aētaða aṇhava astvaiṇti mašyāka ḥam-vaēnānte tē yōi ḥam-nasūm paiti-iristəm tanūm yaozdaiθyaṃ.

2. āaṭ mraoṭ ahurō mazdā, narəm ašavanəm spitama zaraθuštra yō aṇhaṭ vacō arš-vacō maθrəm pərəsō ašava yō fraēštəm apivatāite daēnayā māzdayasnoiš yaozdāθryāṭ haca, hō pərəθwe aiṇhā zəmō upa-θwaršti urvaranaṃ nava vī-bāzva drājō kəmciṭ paiti caθrušanaṃ

3-5. yaṭ aṇhaṭ aiṇhā zəmō vī-āpō-təməmca vī-urvarō-təməmca ... θrigāim haca nərəbyō ašavabyō.

6. paoirīm upa maṇəm niθwərəsōiš pasca ḥamō aiwi-gaitīm dva ərəzu nismahe pasca zəmō isaoš aiwi-gaitīm yaθa caθwārō ərəzvō.

7. bitīm upa maṇəm ... θritīm upa maṇəm ... tūirīm upa maṇəm ... puxdəm ... xštūm....

8. cvaṭ haca anyō-anyaēibyō, yaθa aēvō-gāim, kaθa aēvō-gāim, yaθa θripadəm.

9. θrāyō anya maṇa niθwərəsōiš pasca ḥamō aiwi-gaitīm dva ərəzu nismahe pasca zəmō isaoš aiwi-gaitīm yaθa caθwārō ərəzvō, cvaṭ haca paourvaēibya, yaθa θrigāim, kaθa θrigāim, yaθa gāmaṇ ḥaṇcayata, kaθa gāmaṇ ḥaṇcayata, yaθa nava-padəm.

10. karšasciṭ frakārayōiš tiṭra xšaθra vairyō, cvaṭ haca maṇaēibya, yaθa θrigāim, kaθa θrigāim, yaθa gāmaṇ ḥaṇcayata, kaθa gāmaṇ ḥaṇcayata, yaθa nava-padəm.

11. āaṭ pasca dva-dasa karša frakārayōiš θrāyō yim aṇtarə vīta aṇtarə θrāyō maṇa frakārayōiš θrāyō yim aṇtarə vīta aṇtarə xšvaš maṇa frakārayōiš θrāyō yim aṇtarə vīta aṇtarə nava maṇa frakārayōiš θrāyō aṇtarəca avāntarə pārəntarə maṇa frakārayōiš θrāyō upa nava-padəm asānō āiti maṇa āiti barōiš safəm vā dādrum vā zəm-varətəm vā kəmciṭ vā xrūzdismanṃ.

12. pascaēta ava tā āiti maṇa āiti jasōiṭ aēša yā paiti-irista, āaṭ tūm zaraθuštra ava-hištōiš ava ništārəm karšayā aθa imā vacō drəṇjayōiš, nəmascā yā ārmaitiš ižacā, paiti-šē ādayōiṭ aēša yā paiti-irista, nəmascā yā ārmaitiš ižacā.

13. āaṭ hā druxš avāstryeite kəmciṭ vā vacaṇḥam snaθāi aṇrahe manyōuš drvatō snaθāi aēšmahe xrvīm-draoš snaθāi māzainyanṃ daēvanṃ snaθāi vīspanṃ daēvanṃ.

14. gaomaēzəm pascaēta upaṇhərəzəm ayaṇhaēnəm vā srum vā, yezi srum paiti-ḥiṇcāi graom ayasōiš zaraθuštra nava-pixəm ādrəṇjayōiš aom srum paurva-naēmāt ahe gravahe.

15. zasta hē paoirīm frasnādayən, āaṭ yaṭ hē zasta nōiṭ frasnāta āaṭ vīspanṃ ḥvaṃ tanūm ayaozdāta kərənaoiti, āaṭ yaṭ hē zasta frasnāta āθritīm

pasca frasnātaēibya zastaēibya baršnūm hē vaγdanəm paourum paiti-hiṇcōiš āaṭ hā druxš yā nasuš paitiša hē hō-nā aṇtarāṭ naēmāṭ brvaṭ-byaṃ upa-dvāšaiti.

16. paitiša hē hō-nā aṇtarāṭ naēmāṭ brvaṭ-byaṃ paiti-hiṇcōiš āaṭ hā druxš yā nasuš pasca vaγdanəm upa-dvāšaiti, pasca hē vaγdanəm paiti-hiṇcōiš āaṭ hā druxš yā nasuš paitiša paitišxʿarənəm upa-dvāšaiti, paitiša hē paitiš-xʿarənəm paiti-hiṇcōiš āaṭ hā druxš yā nasuš dašinəm gaošəm upa-dvāšaiti.

17. dašinəm hē gaošəm paiti-hiṇcōiš āaṭ hā druxš yā nasuš hōyum gaošəm upa-dvāšaiti, hōyum hē gaošəm paiti-hiṇcōiš āaṭ hā druxš yā nasuš dašinəm suptīm upa-dvāšaiti, dašinəm hē suptīm paiti-hiṇcōiš āaṭ hā druxš yā nasuš haoyam suptīm upa-dvāšaiti, haoyam hē suptīm paiti-hiṇcōiš āaṭ hā druxš yā nasuš dašinəm kašəm upa-dvāšaiti.

18. dašinəm hē kašəm paiti-hiṇcōiš āaṭ hā druxš yā nasuš hōyum kašəm upa-dvāšaiti, hōyum hē kašəm paiti-hiṇcōiš āaṭ hā druxš yā nasuš paitiša paitivarəm upa-dvāšaiti, paitiša hē paitivarəm paiti-hiṇcōiš āaṭ hā druxš yā nasuš paršti upa-dvāšaiti.

19. paršti hē paiti-hiṇcōiš āaṭ hā druxš yā nasuš dašinəm fštānəm upa-dvāšaiti, dašinəm hē fštānəm paiti-hiṇcōiš āaṭ hā druxš yā nasuš hōyum fštānəm upa-dvāšaiti, hōyum hē fštānəm paiti-hiṇcōiš āaṭ hā druxš yā nasuš dašinəm pərəsāum upa-dvāšaiti.

20. dašinəm hē pərəsāum paiti-hiṇcōiš āaṭ hā druxš yā nasuš hōyum pərəsāum upa-dvāšaiti, hōyum hē pərəsāum paiti-hiṇcōiš āaṭ hā druxš yā nasuš dašinəm sraonīm upa-dvāšaiti, dašinəm hē sraonīm paiti-hiṇcōiš āaṭ hā druxš yā nasuš haoyam sraonīm upa-dvāšaiti.

21. haoyam hē sraonīm paiti-hiṇcōiš āaṭ hā druxš yā nasuš haxti upa-dvāšaiti, haxti hē paiti-hiṇcōiš yezi nairyō aṇhaṭ pasca hē pourum paiti-hiṇcōiš paitiša aparəm yezi strī aṇhaṭ paitiša hē pourum paiti-hiṇcōiš pasca aparəm āaṭ hā druxš yā nasuš dašinəm rānəm upa-dvāšaiti.

22. dašinəm hē rānəm paiti-hiṇcōiš āaṭ hā druxš yā nasuš hōyum rānəm upa-dvāšaiti, hōyum hē rānəm paiti-hiṇcōiš āaṭ hā druxš yā nasuš dašinəm žnūm upa-dvāšaiti, dašinəm hē žnūm paiti-hiṇcōiš āaṭ hā druxš yā nasuš hōyum žnūm upa-dvāšaiti.

23. hōyum hē žnūm paiti-hiṇcōiš āaṭ hā druxš yā nasuš dašinəm ascūm upa-dvāšaiti, dašinəm hē ascūm paiti-hiṇcōiš āaṭ hā druxš yā nasuš hōyum ascūm upa-dvāšaiti, hōyum hē ascūm paiti-hiṇcōiš āaṭ hā druxš yā nasuš dašinəm zangəm upa-dvāšaiti, dašinəm hē zangəm paiti-hiṇcōiš āaṭ hā druxš yā nasuš hōyum zangəm upa-dvāšaiti.

24. hōyum hē zangəm paiti-hiṇcōiš āaṭ hā druxš yā nasuš dašinəm frabdəm upa-dvāšaiti, dašinəm hē frabdəm paiti-hiṇcōiš āaṭ hā druxš yā nasuš hōyum frabdəm upa-dvāšaiti, hōyum hē frabdəm paiti-hiṇcōiš āaṭ hā druxš yā nasuš adairi haxəm nivōiryete maṇayən ahe yaθa maxšyā parənəm.

25. hakaṭ nigərəptaēibya aṅguštaēibya uzgərəptaēibya pāšnaēibya dašinəm hē haxəm paiti-hiṇcōiš āaṭ hā druxš yā nasuš hōyum haxəm upa-

dvāšaiti, hōyum hē haxəm paiti-hiṅcōiš āaṭ hā druxš yā nasuš ādairi aṅušta nivōiryete maṇayən ahe yaθa maxšyā parənəm.

26. hakaṭ nigərəptaēibya pāšnaēibya uzgərəptaēibya aṅuštaēibya dašīnaṃ hē aṅuštāṃ paiti-hiṅcōiš āaṭ hā druxš yā nasuš haoyāṃ aṅuštāṃ upa-dvāšaiti, haoyāṃ hē aṅuštāṃ paiti-hiṅcōiš āaṭ hā druxš yā nasuš nivōiryete apāxədraēibyō naēmaēibyō maxši kəhrpa ərəyāitya frašnaoš apa-zadaṅhō akaranəm driwyā yaθa zōiždištāiš xrafstrāiš.

27. aθa imā vacō drəṅjayōiš yōi aṅhən varəθraṇyōtəməmca baēšazyōtəməmca,

yaθā ahū vairyō aθā ratuš ... māmərəṅcainiš gaēθā astvaitiš ašahe.

28. paoirīm upa maṅəm frā-nasuš narəm bavaiti aθa imā vacō drəṅjayōiš ... bitīm ... θritīm ... tūirīm ... puxdəm ... xštūm....

29. pascaēta ava tā nišhidaēit aēša yā paiti-irista aṅtarə arədəm maṅahe pārəntarə haca anyāēibyō maṅaēibyō avavaṭ taða yaθa caθwārō ərəzavō aētaēšāṃca zəṃō pərəθu-fravāiš fraḍavata.

30. paṅca-dasa zəṃō haṅkanayən vīspəm ā ahmāt upa-maṇayən yaṭ hē upəməm paiti vaṅḍanahe upəmāt varsa hiku bavāṭ.

31. yaṭ hē tanuš hišvi hiṅvni pāsnu bavāṭ pascaēta ava tā anya maṅa āiti jasōit aēša yā paiti-irista, paoirīm upa maṅəm hakərəṭ āpō āaṭ hvāṃ tanūm pairi-yaoždaiθita bitīm upa maṅəm bižvaṭ āpō āaṭ hvāṃ tanūm pairi-yaoždaiθita θritīm upa maṅəm θrižvaṭ āpō āaṭ hvāṃ tanūm pairi-yaoždaiθita.

32. pascaēta dim ā-baodayaēta urvāsnaṅā vā vohu-gaonahe vā vohu-kərətōiš vā haḍānaēpatayā vā kaṃciṭ vā hubaoiḍitəmanāṃ urvaranāṃ vastrā pascaēta aiwyāṅhayaēta pascaēta ava tā āiti nmāna āiti jasōit aēša yā paiti-irista.

33. airime gātūm hē nišhidaēta aṅtarə arədəm nmānahe pārəntarə haca anyāēibyō mazdayasnaēibyō mā xšayamna jasōit ātrəm mā āpəm mā zāṃ mā gāṃ mā urvarāṃ mā narəm ašavanəm mā nāirikāṃ ašanonīm vīspəm ā ahmāt yaṭ hē θrāyō xšafna sacāṅte, āaṭ pasca θrixšaparāt us tanūm snayaēta us vastrāt gəuš maēsmana apāca paiti avaθa yaoždayāṅ.

34. airime gātūm hē nišhidaēta aṅtarə arədəm nmānahe pārəntarə haca anyāēibyō mazdayasnaēibyō mā xšayamna jasōit ātrəm mā āpəm mā zāṃ ... yaṭ hē xšvaš xšafna sacāṅte, āaṭ pasca xšvaš-xšaparāt us tanūm snayaēta us vastrāt gəuš maēsmana apāca paiti avaθa yaoždayāṅ.

35. airime gātūm hē nišhidaēta aṅtarə ... yaṭ hē nava xšafna sacāṅte, āaṭ pasca nava-xšaparāt us tanūm snayaēta us ... yaoždayāṅ.

36. pascaēta xšayamna jasōit avi ātrəm avi āpəm avi zāṃ avi gāṃ avi urvarāṃ avi narəm ašavanəm avi nāirikāṃ ašanonīm.

37. āθravanəm yaoždaθō dahmayāt parō āfritōit daiṅhəuš daiṅhu-paitīm yaoždaθō uštrahe paiti aršnō aṅryehe zaṅtəuš zaṅtu-paitīm yaoždaθō aspahe paiti aršnō aṅryehe vīsō vīspaitīm yaoždaθō gəuš paiti uxšnō aṅryehe nmānahe nmānō-paitīm yaoždaθō gəuš paiti azyā.

38. nmānahe nmānō-paitīm nāirikam yaoždaθō gōuš paiti fravaityā vaēsōsca pairyaētrēsca yaoždaθō gōuš paiti vazyā nitēməmciṭ apərənāyūkəm yaoždaθō pasōuš garōbuš anumayehe.

39. yezi tavaṇ aēte mazdayasna aēte pasvō staorāca aētahmāi naire frabārayən, yezi nōiṭ tavaṇ aēte mazdayasna aēte pasvō staorāca anyam hē avarəṭam aētahmāi naire frabārayən vīspəm ā ahmāt yaṭ aēšō nā yō yaoždāθryō haca aēibyō nmānaēibyō xšnūtō adbištō pārāyāt.

40. yezica aēšō nā yō yaoždāθryō haca aēibyō nmānaēibyō ṭbištō axšnūtō parāiti apa hē paskāt fraoirisaite spitama zaraθuštra aēša druxš yā nasuš nāḡhanaṭ haca cašmanaṭ haca hizumaṭ haca paitišxʻarənāda fravāxšaṭ haca frašumakaṭ haca tē,

41. aēšam paiti sraoe aēša druxš yā nasuš upa-dvāsaite ayaoždya pascaēta bavaiṇti yavaēca yavaētātaēca, anusō zī spitama zaraθuštra aēša yā paiti-irista avaṭ hvarə ā-tāpaite anusō hāu mā anusō ave stārō.

42. xšnāvayeiti zī spitama zaraθuštra aēšō nā yō yaoždāθryō yaṭ aētəm paiti-iristəm frā-nasūm kərənaoiti xšnāvayeiti ātrəm xšnāvayeiti āpəm xšnāvayeiti zaṃ xšnāvayeiti gaṃ xšnāvayeiti urvaram xšnāvayeiti narəm ašavanəm xšnāvayeiti nāirikam ašanonīm.

43. paiti dim pərəsata zaraθuštrō, dātarə gaēθanam astvaitinam ašāum cvaṭ ahmāi naire miždəm aḡhaṭ pasca astasca baodaḡhasca vī-urvištīm yaṭ aētəm paiti-iristəm frā-nasūm kərənaoiti.

44. āaṭ mraoṭ ahurō mazdā, disyāt ahmāi naire avaṭ miždəm parō-asnāi aḡuhe vazdvarə vahištahe aḡhōuš.

45. paiti dim pərəsata zaraθuštrō, dātarə ... ašāum kuθa aētaṭ druxš pərənāne yā haca irista upa jvaṇtəm upa-dvāsaite kuθa aētaṭ nasu pərənāne yā haca irista upa jvaṇtəm upa-raēθwayeiti.

46. āaṭ mraoṭ ahurō mazdā, ime vaca framrva yōi həṇti gāθāhva bišāmṛūta ime vaca framrva yōi həṇti gāθāhva θrišāmṛūta ime vāca framrva yōi həṇti gāθāhva caθrušāmṛūta, maṇayən bā spitama zaraθuštra aipi tā nasuš zgaθaite yaθa išuš xʻāθaxtō yaθa vā nəmatō tarō yārə yaθa vā raθwya varona.

47. dātarə ... yezica hō nā paiti-hiṇcōiṭ yō nōiṭ apivatāite daēnayā māzdayasnōiš yaoždāθryāt haca kuθa aētaṭ druxš pərənāite yā haca irista upa jvaṇtəm upa-dvāsaite kuθa aētaṭ nasu pərənāite yā haca irista upa jvaṇtəm upa-raēθwayeiti.

48. āaṭ mraoṭ ahurō mazdā, maṇayən bā spitama zaraθuštra aēša druxš yā nasuš aš-aojastara varədayete yaθa para ahmāt as, hā aēte yaska hā aēte mahrka hā aēte paityāra hamaθa yaθa paraciṭ.

49. dātarə ... kā hē asti ciθa, āaṭ mraoṭ ahurō mazdā, haṇdarəzaciṭ haṇdarəzayən aēte yōi mazdayasna zasta hē paoirīm haṇdarəzayaṇta apa hē vastrā barayən pəstō-fraθaḡhəm hē kamərədəm vīnāθayən aš-xʻarətəmaēibyō spəṇtō-mainyavanam dāmanam kərəfš-xʻarəm kərəfš paiti-nisirinuyāt vayam

kahrkāsəm uityaojanō, avā hīm paiti-miθnāiti vīspəm dušmatəmca dužuxtəmca dužvarštəmca.

50. yezica hē anya aya šyaoθna fravaršta patita hē ciθa, āaṭ yezi-šē anya aya šyaoθna nōiṭ fravaršta patitəm ahe narš yavaēca yavaētātaēca.

51. ciš hāu as ahura mazda yō mē asadayaṭ fradaθəm apa-baraṭ varədaθəm apa-baraṭ yaskəm apa-baraṭ mahrkəm apa-baraṭ.

52. āaṭ mraoṭ ahurō mazdā, hō bā aēšō ās ašāum zaraθuštra ašəmaoγō anašava yō aētahmi aṅhvō yaṭ astvaiṅti paiti-ḥiṅcaiti ā-dim nōiṭ apivatāite daēnayā māzdayasnōiš yaoždāθryāṭ haca.

53. para nū ahmāt haca asaṅhaṭca šōiθrāaṭca axštāṭ spitama zaraθuštra izāca āzūitišca para dasvarəca baēšazəmca para fradaθəmca varədaθəmca vaxšaθəmca para yavanəmca vāstranəmca uruθəm.

54. dātarə ... kaða nō ahmāi asaṅhaēca šōiθraēca paiti-jasātō izāca āzūitišca kaða dasvarəca baēšazəmca kaða fradaθəmca varədaθəmca vaxšaθəmca kaða yavanəmca vāstranəmca uruθəm.

55. āaṭ mraoṭ ahurō mazdā, nōiṭ nū para ahmāt spitama zaraθuštra asaṅhaēca šōiθraēca paiti-jasātō izāca āzūitišca nōiṭ dasvarəca baēšazəmca nōiṭ fradaθəmca varədaθəmca vaxšaθəmca nōiṭ yavanəmca vāstranəmca uruθəm.

56. para ahmāt yaṭ ida ašəmaoγō anašava haθra jatō nijanāite yaṭ vā aētaṅhā daiṅhōuš sraošō ašyō frāyazānte θri-aγarəm θri-xšaparəm saociṅtaṭ paiti āθraṭ frastərətāt paiti barəsmən uzdatāt paiti haomāt.

57. pascaēta ahmāi asaṅhaēca šōiθraēca paiti-jasātō izāca āzūitišca pascaēta dasvarəca baēšazəmca pascaēta fradaθəmca varədaθəmca vaxšaθəmca pascaēta yavanəmca vāstranəmca uruθəm. ašəm vohū....

10.

1. pərəsaṭ zaraθuštrō ahurəm mazdām, ahura mazda mainyō spōništa dātarə gaēθanəm astvaitiṅəm ašāum kuθa aētaṭ druxs pərənāne yā haca irista upa jvaṅtəm upa-dvəšaiti kuθa aētaṭ nasuš pərənāne yā haca irista upa jvaṅtəm upa-raēθwaiti.

2. āaṭ mraoṭ ahurō mazdā, ime vaca framrva yōi həṅti gāθāhva bišāmrūta ime vaca framrva yōi həṅti gāθāhva θrišāmrūta ime vaca framrva yōi həṅti gāθāhva caθrušāmrūta ime vaca framrva yōi həṅti gāθāhva bišāmrūtaca θrišāmrūtaca caθrušāmrūtaca.

3. dātarə ... kaya aēte vaca yōi həṅti gāθāhva bišāmrūta, āaṭ mraoṭ ahurō mazdā, ime aēte vaca yōi həṅti gāθāhva bišāmrūta ime vaca ādbitīm framrva,

4. ahyā yāsā ... humatanəm ... ašahyā āaṭ sairī ... yaθā tū-i ... humāim θwā ižim ... θwōi staotarascā ... uštā ahmāi ... spəṅtā mainyū ... vohū xšaθrəm ... vahištā ištīš....

5. āaṭ pasca bišāmṛūta vaca ime vaca framrva varəθraγne baēšazya, paiti-pərəne aṅrəm mainyūm haca nmāna haca vīsa haca zaṅtu haca daiṅhu haca havayāsə-tanvō haca nā paiti-iristō haca nāirika paiti-iriste haca nmānahe nmānō-patōiš haca vīsō vīspatōiš haca zaṅtəuš zaṅtupatōiš haca daiṅhəuš daiṅhupatōiš haca vīspayā ašaonō stōiš.

6. paiti-pərəne nasūm paiti-pərəne ḥəm-raēθwəm paiti-pərəne paiti-raēθwəm haca nmāna haca vīsa haca zaṅtu haca daiṅhu haca havayāsə-tanvō haca nā paiti-iristō haca nāirika paiti-iriste haca nmānahe nmānō-patōiš haca vīsō vīspatōiš haca zaṅtəuš zaṅtupatōiš haca daiṅhəuš daiṅhupatōiš haca vīspayā ašaonō stōiš.

7. dātarə ... kaya aēte vaca yōi həṅti gāθāhva θrišāmṛūta, āaṭ mraoṭ ahurō mazdā, ime aēte vaca yōi həṅti gāθāhva θrišāmṛūta ime vaca āθritim framrva,

8. ašəm vohū ... yē səvištō ... ḥuxšaθrōtəmāi ... dužvarənāiš....

9. āaṭ pasca θrišāmṛūta vaca ime vaca framrva varəθraγne baēšazya, paiti-pərəne iṅdrəm paiti-pərəne saurum paiti-pərəne nāṅhaiθim daēum haca nmāna haca vīsa haca zaṅtu haca daiṅhu.

10. paiti-pərəne tauru paiti-pərəne zairica haca nmāna haca vīsa haca zaṅtu haca daiṅhu.

11. dātarə ... kaya aēte vaca yōi həṅti gāθāhva caθrušāmṛūta, āaṭ mraoṭ ahurō mazdā, ime aēte vaca yōi həṅti gāθāhva caθrušāmṛūta ime vaca āxtūirīm framrva,

12. yaθā ahū vairyō ... mazdā aṭ mōi ... ā airyōmā išyō....

13. āaṭ pasca caθrušāmṛūta vaca ime vaca framrva varəθraγne baēšazya, paiti-pərəne aēšməm xrvīm-drūm paiti-pərəne akatašəm daēum haca nmāna haca vīsa haca zaṅtu haca daiṅhu.

14. paiti-pərəne varənya daēvō paiti-pərəne vātīm daēvō haca nmāna haca vīsa haca zaṅtu haca daiṅhu.

15. ime aēte vaca yōi həṅti gāθāhva bišāmṛūta ime aēte vaca yōi həṅti gāθāhva θrišāmṛūta ime aēte vaca yōi həṅti gāθāhva caθrušāmṛūta.

16. ime aēte vaca yōi həṅti aṅrahe mainyēuš snaθəm ime aēte vaca yōi həṅti aēšmahe xrvīm-draoš snaθəm ime aēte vaca yōi həṅti māzainyanəm daēvanəm snaθəm ime aēte vaca yōi həṅti vīspanəm daēvanəm snaθəm.

17. ime aēte vaca yōi həṅti avaiṅhā drujō avaiṅhā nasāvō hamaēstārəm yā haca irista upa jvaṅtəm upa-dvəšaiti ime aēte vaca yōi həṅti avaiṅhā drujō avaiṅhā nasāvō hamaēstārəm yā haca irista upa jvaṅtəm upa-raēθwaiti.

18. āaṭ tūm zaraθuštra nava maγa niθwərəsōiš yaṭ aṅhaṭ aiṅhā zəmə vī-āpōtəməmca vī-urvarō-təməmca ana-x'arəθa pasu-vīra, yaoždā mašyāi aipi zaθəm vahišta hā yaoždā zaraθuštra yā daēna māzdayasniš yō ḥvəm daēnəm yaoždāite humatāišca hūxtāišca hvarštāišca.

19. daēnəm ərəzvō yaoždaiθiša aθa zī aiṅhā asti yaoždāitiš kahmāicit aṅhəuš astvatō havayā ərəzvō daēnayā yō ḥvəm daēnəm yaoždāite humatāišca hūxtāišca hvarštāišca.

20. yaθā ahū vairyō ... kēm-nā mazdā ... māmərəncainiš gaēθā astvaitiš ašahe. ašəm vohū.....

11.

1. pərəsaṭ zaraθuštrō ahurəm mazdām, ahura mazda ... ašaum kuθa nmānəm yaoždaθāni kuθa ātrəm kuθa āpəm kuθa zəm kuθa gəm kuθa urvarəm kuθa narəm ašavanəm kuθa nāirikəm ašaonīm kuθa strēš kuθa mąnhəm kuθa hvarə kuθa anayra raocā kuθa vīspa vohu mazdaḏāta ašaciθra.

2. āaṭ mraoṭ ahurō mazdā, yaoždāθrəm srāvayōiš zaraθuštra yaoždāta pascaēta bun nmāna yaoždāta ātrəm yaoždāta āpəm yaoždāta zəm yaoždāta gəm yaoždāta urvarəm yaoždāta narəm ašavanəm yaoždāta nāirikəm ašaonīm yaoždāta strēš yaoždāta mąnhəm yaoždāta hvarə yaoždāta anayra raocā yaoždāta vīspa vohu mazdaḏāta ašaciθra.

3. aθa imā vacō drəṅjayōiš yōi aṅhən varəθraṅnyōtəməmca baēšazyōtəməmca paṅca ahuna vairya frasrāvayōiš, yaθā ahū vairyō...(5), ahunəm vairīm tanūm pāiti, yaθā ahū vairyō ... kēm-nā mazdā ... ašahe.

4. imaṭ nmānəm yaoždaθāne imā aḏa vacō framrva, aṭ mā yavā bəṅdvō pafre mazištō, imaṭ ātrəm yaoždaθāne imā aḏa vacō framrva, ahe θwā āθrō vərəzāna paoirye pairijasāmaide mazda ahurā.

5. imaṭ āpəm yaoždaθāne imā aḏa vacō framrva, apō aṭ yazamaide maēkaiṅtišcā hōbvantīšcā fravazaṅhō, imaṭ zəm yaoždaθāne imā aḏa vacō framrva, imām āaṭ zəm gəṅnābiš haθrā yazamaide.

6. imām gəm yaoždaθāne imā aḏa vacō framrva, gave aḏāiš tāiš šyaoθnāiš yāiš vahīštāiš fraēšyāmahī, imaṭ urvarəm yaoždaθāne imā aḏa vacō framrva, aṭ ahyāi ašā mazdā urvarā vaxšaṭ.

7. imaṭ narəm ašavanəm yaoždaθāne imaṭ nāirikəm ašaonīm yaoždaθāne imā aḏa vacō framrva, ā airyēmā išyō rafədrāi jaṅtū nərəbyascā nāiribyascā zaraθuštrahe vaṅhəuš rafədrāi manəṅhō yā daēnā vairīm hanāt mīzdəm ašahyā yāsā ašīm yəm išyām ahurō masatā mazdā.

8. aθa imā vacō ... ašta ahuna vairya frasrāvayōiš, yaθā ahū vairyō... (8). kēm-nā mazdā ... ašahe.

9. pərəne aēšməm pərəne nasūm pərəne ḥəm-raēθwəm pərəne paiti-raēθwəm pərəne xrū pərəne xrvīṅni pərəne būidi pərəne būidiža pərəne kuṅdi pərəne kuṅdiža pərəne būšyāsta yā zairina pərəne būšyāsta yā darəṅō-gava pərəne mūidi pərəne kapastiš pərəne pairikəm yā āiti ātrəm āpəm zəm gəm urvarəm pərəne āhitīm yā āiti ātrəm āpəm zəm gəm urvarā.

10. pərəne θwā dužda aṅra mainyō haca nmānaṭ haca āθraṭ haca apaṭ haca zəmaṭ haca goṭ haca urvarayāt haca narəm ašavanəm haca nāirikəm ašaonīm haca strēš haca mąnhəm haca hvarə haca anayra raocā haca vīspa vohu mazdaḏāta ašaciθra.

11. aθa imā vacō ... caθwārō ahuna vairya frasrāvayōiš, yaθā ahū vairyō...(4), kēm-nā mazdā ... ašahe.

12. paršta aēšmēm paršta nasūm paršta haṃ-raēθwēm paršta paiti-raēθwēm paršta xrū paršta xrvīṃni paršta būiḍi paršta būiḍiža paršta kuṇḍi paršta kuṇḍiža paršta būšyāsta yā zairina paršta būšyāsta yā darəγō-gava paršta mūiḍi paršta kapastiš paršta pairikāṃ yā āiti ātrēm āpēm zāṃ ḡāṃ urvarāṃ paršta āhitīm yā āiti ātrēm āpēm zāṃ ḡāṃ urvarā

13. paršta θwā duḡda aṅra mainyō haca nmānaṭ haca āθraṭ haca apaṭ haca zəmaṭ haca gaot haca urvarayāt haca narēm ašavanēm haca nāirikāṃ ašanonīm haca strēš haca māṅhōm haca hvarə haca anayra raocā haca vīspa vohu mazdadāta ašaciθra.

14. aθa imā vacō ... caθwārō mazdā aṭ mōi frasrāvayōiš, mazdā aṭ mōi... (4).

15-16. pərəne aēšmēm....

17. aθa imā vacō ... paṅca ahuna vairya frasrāvayōiš, yaθā ahū vairyō... (5), kēm-nā mazdā ... ašahe. ašēm vohū....

12.

1. [āaṭ yaṭ pitō para-iriθyeiti māta vā para-iriθyeiti cvaṭ aēšāṃ upa-māṇayən puθrō haca pitarēm duḡda haca mātarēm cvaṭ dahmanāṃ cvaṭ tanu-pərəθanāṃ, āaṭ mraoṭ ahurō mazdā, θrisatēm dahmanāṃ xšvaštīm tanu-pərəθanāṃ.

2. dātarə ... kuθa nmānēm yaoždaθāmi kuθa bun yaoždāta, āaṭ mraoṭ ahurō mazdā, θriš frasnāiti tanunāṃ θriš frasnāiti vastranāṃ θriš frasrūiti gāθanāṃ imā nō ātrēm yazaēta barəsma stərənaēta aiwyō vaṇuhibyō zaoθrā baraēta, yaoždāta pascaēta bun nmāna vasō upāiti apāṃ vasō upāiti urvaranāṃ vasō upāiti aməšanāṃ spəntanāṃ spitama zaraθuštra.

3-4. āaṭ yaṭ puθrō para-iriθyeiti duḡda vā para-iriθyeiti cvaṭ aēšāṃ upa-māṇayən pita haca puθrēm māta haca duḡdarēm cvaṭ dahmanāṃ cvaṭ tanu-pərəθanāṃ, āaṭ mraoṭ ahurō mazdā, θrisatēm dahmanāṃ xšvaštīm tanu-pərəθanāṃ. dātarə....

5-6. āaṭ yaṭ brāta para-iriθyeiti xʼaṅha vā para-iriθyeiti cvaṭ aēšāṃ upa-māṇayən brāta haca xʼaṅharēm xʼaṅha haca brātarēm cvaṭ dahmanāṃ cvaṭ tanu-pərəθanāṃ, āaṭ mraoṭ ahurō mazdā, θrisatēm dahmanāṃ xšvaštīm tanu-pərəθanāṃ. dātarə....

7-8. āaṭ yaṭ nmānō-paitiš para-iriθyeiti nmānō-paθni vā para-iriθyeiti cvaṭ aēšāṃ upa-māṇayən cvaṭ dahmanāṃ cvaṭ tanu-pərəθanāṃ, āaṭ mraoṭ ahurō mazdā, xšvaš māṅhō dahmanāṃ dvadasa tanu-pərəθanāṃ kaininō xʼatō puθrēm. dātarə....

9-10. āaṭ yaṭ nyākō para-iriθyeiti nyāke vā para-iriθyeiti cvaṭ aēšāṃ upa-māṇayən napō haca nyākō napti haca nyāke cvaṭ dahmanāṃ cvaṭ tanu-pərəθanāṃ, āaṭ mraoṭ ahurō mazdā, paṅcāca vīsatica dahmanāṃ paṅcāsātēm tanu-pərəθanāṃ. dātarə....

11-12. āaṭ yaṭ napō para-iriθyeiti napti vā para-iriθyeiti cvaṭ aēšāṃ upa-māṇayən nyākō haca naptō nyāke haca napti cvaṭ dahmanāṃ cvaṭ tanu-

pərəθanəm, āt mraot ahurō mazdā, pañcāca vīsatica dahmanəm pañcāsātəm tanu-pərəθanəm. dātārē....

13-14. āt yať brātruyō para-iriθyeiti brātruye vā para-iriθyeiti cvať aēšəm upa-maňayən cvať dahmanəm cvať tanu-pərəθanəm, āt mraot ahurō mazdā, vīsaiti dahmanəm caθwarəsātəm tanu-pərəθanəm. dātārē....

15-16. āt yať tūiryō para-iriθyeiti tūirya vā para-iriθyeiti cvať aēšəm upa-maňayən cvať dahmanəm cvať tanu-pərəθanəm, āt mraot ahurō mazdā, pañca-dasa dahmanəm θrisātəm tanu-pərəθanəm. dātārē....

17-18. āt yať tūiryō puθrō para-iriθyeiti tūirya duγda vā para-iriθyeiti cvať aēšəm upa-maňayən cvať dahmanəm cvať tanu-pərəθanəm, āt mraot ahurō mazdā, dasa dahmanəm vīsaiti tanu-pərəθanəm. dātārē....

19-20. āt yať tūirya puθrō vā puθrō para-iriθyeiti tūirya duγdairi cvať aēšəm upa-maňayən cvať dahmanəm cvať tanu-pərəθanəm, āt mraot ahurō mazdā, pañca dahmanəm dasa tanu-pərəθanəm. dātārē....

21. āt yať kañciť vā taoxmanəm para-iriθyeiti yaθa ainyō-varəna ainyō-ťkaēša cvať spəntahe mainyēuš dāmanəm hañ-raēθwayeiti cvať paiti-raēθwayeiti.

22-24. āt mraot ahurō mazdā, yaθa vazayaciť ... nōiť avaθa mərətō. ašəm vohū.....]

13.

1. kať tať dāma spəntō-mainyava aētañham dāmanəm yōi hənti spəntahe mainyēuš dāma dātəm vīspəm paiti ušāñhəm ā hū vaxšať hazaraja aňrō mainyuš paiti-jasaiti.

2. āt mraot ahurō mazdā spānəm sīzdrəm urvīsarəm yim vañhāparəm yim mašyāka avi dužvacarñhō dužakəm nəma aojaite, aētať tať dāma spəntō-mainyava aētañham dāmanəm yōi hənti spəntahe mainyēuš dāma dātəm vīspəm paiti ušāñhəm ā hū vaxšať hazaraja aňrō-mainyuš paiti-jasaiti.

3. yasca dim janať spitama zaraθuštra spānəm sīzdrəm urvīsarəm yim vañhāparəm yim mašyāka avi dužvacarñhō dužakəm nəma aojaite nava-naptyaēciť hē urvānəm para-mərəñcaite yaēšəm aňhať dužāpīm cinvať-pərətūm yō nōiť jvō sraošyām uzvərəzyeiti.

4. dātārē ... yō janať spānəm sīzdrəm urvīsarəm yim vañhāparəm yim mašyāka avi dužvacarñhō dužakəm nəma aojaite kā hē asti ciθa, āt mraot ahurō mazdā, hazarəəm upāzanənəm upāzōiť aspahe aštraya hazarəəm sraošō-caranaya.

5. kať tať dāma aňrō-mainyava aētañham dāmanəm yōi hənti aňrahe mainyēuš dāma dātəm vīspəm paiti ušāñhəm ā hū vaxšať hazaraja spəntō-mainyūm paiti-jasaiti.

6. āt mraot ahurō mazdā, daēum yim zairimyaňurəm nəma spitama zaraθuštra yim mašyāka avi dužvacarñhō zairimyakəm nəma aojaite, aētať tať dāma aňrō-mainyava aētañham dāmanəm yōi hənti aňrahe mainyēuš dāma

dātəm vīspəm paiti ušāṅhəm ā hū vaxšaṭ hazaraja spəntō-mainyūm paiti-jasaiti.

7. yasca dim janaṭ spitama zaraθuštra daēum yim zairimyaṅurəm yim mašyāka avi dužvacarṅhō zairimyakəm nāma aojaite patitəm hē manō aṅhaṭ patitəm vacō patitəm šyaoθnəm uzvarštəm hē manō aṅhaṭ uzvarštəm vacō uzvarštəm šyaoθnəm.

8. yō aētaēšam sūnam jaiṅti yim pasuš-haurvəmca višhaurvəmca vohunazgəmca draxtō-hunaranəmca xraosyō-taraca nō ahmāt voyō-taraca hvō urva parāiti parō-asnāi aṅuhe yaθa vəhrkō vayōi tūite dramne barəzište razūire.

9. nōiṭ hē anyō urva haom urvānəm paiti irista bəzaiti xraosyāca voyaca aṅuhe naēda spāna pəšu-pāna paiti irista bəzaiti xraosyāca voyaca aṅuhe.

10. yō sūne pištrəm jaiṅti yim pasuš-haurve us vā hē gaošəm θwərəsaiti apa vā hē paiḍyām kərəṅtaiti yasə-taṭ paiti avā gaēθā tāyuš vā vəhrkō vā apaiti-busti haca gaēθabyō para-baraiti dasa adāt paiti afšō cikayaṭ, cikayaṭ sūnahe raēšō baoḍō-varštahe ciθaya.

11. yō sūne pištrəm jaiṅti yim viš-haurve us vā hē gaošəm θwərəsaiti apa vā hē paiḍyām kərəṅtaiti yasə-taṭ paiti avā vīsō tāyuš vā vəhrkō vā apaiti-busti haca vīžibyō para-baraiti dasa adāt paiti afšō cikayaṭ, cikayaṭ sūnahe raēšō baoḍō-varštahe ciθaya.

12. dātarə ... yō spānəm jaiṅti yim pasuš-haurum frazābaoḍaṅhəm snaθəm vīkərəṭ-uštānəm kā hē asti ciθa, āaṭ mraoṭ ahurō mazdā, ašta sata upāzananəm upāzōiṭ aspahe aštraya ašta sata sraošō-caranaya.

13. dātarə ... yō spānəm jaiṅti yim viš-haurum frazābaoḍaṅhəm snaθəm vīkərəṭ-uštānəm kā hē asti ciθa, āaṭ mraoṭ ahurō mazdā, hapta sata upāzananəm upāzōiṭ aspahe aštraya hapta sata sraošō-caranaya.

14. dātarə ... yō spānəm jaiṅti yim vohunazgəm frazābaoḍaṅhəm snaθəm vīkərəṭ-uštānəm kā hē asti ciθa, āaṭ mraoṭ ahurō mazdā, xšvaš sata....

15. dātarə ... yō spānəm jaiṅti yim taurunəm frazābaoḍaṅhəm snaθəm vīkərəṭ-uštānəm kā hē asti ciθa, āaṭ mraoṭ ahurō mazdā, paṅca sata....

16. hāu jažāuš hāu vīzāuš hāu sukurənahe hāu urupiš tiži-dātahe hāu raopiš yaonō-x^vatahe hāu vīspanəm spəntō-mainyavanəm spaciθranəm anya udra upāpa.

17. dātarə ... dva asti spā pasuš-haurvō dāityō-gātuš, āaṭ mraoṭ ahurō mazdā, yō yūjastīm haca gaēθabyō parāiti sraēšəmnō tāyuš vəhrkamca.

18. dātarə ... kva asti spā viš-haurvō dāityō-gātuš, āaṭ mraoṭ ahurō mazdā, yō hāθrō-masəṅhəm adwanəm haca vīžibyō parāiti sraēšəmnō tāyuš vəhrkamca.

19. dātarə ... kva asti spā vohunazgō dāityō-gātuš, āaṭ mraoṭ ahurō mazdā, yō naēcim isaiti hunaranam tanuye isaite θrāθrəm.

20. dātarə ... yō spānəm tarō-piθwəm daste yim pasuš-haurum cvaṭ aētaēšam šyaoθnanam āstāraiti, āaṭ mraoṭ ahurō mazdā, yaθa aētahmi aṅhvō yaṭ astvaiṅti fratēmō-nmānahe nmānō-paitīm paiti tarō-piθwəm daiθyāṭ aθa āstryeiti.

21. dātarə ... yō spānəm tarō-piθwəm daste yim višhaurum cvaṭ aētaēšam šyaoθnanam āstāraiti, āaṭ mraoṭ ahurō mazdā, yaθa aētahmi aṅhvō yaṭ astvaiṅti maḍēmō-nmānahe nmānō-paitīm paiti tarō-piθwəm daiθyāṭ aθa āstryeiti.

22. dātarə ... yō spānəm tarō-piθwəm daste yim vohunazgəm cvaṭ aētaēšam šyaoθnanam āstāraiti, āaṭ mraoṭ ahurō mazdā, narəm bōiṭ iḍa ašavanəm jasəṅti ahmya nmāne maṭ avabyō daxštābyō yaθa āθrava paiti tarō-piθwəm daiθyāṭ aθa āstryeiti.

23. dātarə ... yō spānəm tarō-piθwəm daste yim taurunəm cvaṭ aētaēšam šyaoθnanam āstāraiti, āaṭ mraoṭ ahurō mazdā, yaθa aētahmi aṅhvō yaṭ astvaiṅti apərənāyūkəm dahmō-kəṛətəm šyaoθnāvarəzəm vərəzyāṭ šyaoθnəm paiti tarō-piθwəm daiθyāṭ aθa āstryeiti.

24. dātarə ... yō spānəm tarō-piθwəm daste yim pasuš-haurum kā hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzanam upāzōiṭ aspāhe aštraya duye saite sraošō-caranaya.

25. dātarə ... yō spānəm tarō-piθwəm daste yim višhaurum kā hē asti ciθa, āaṭ mraoṭ ahurō mazdā, navaitīm upāzanam upāzōiṭ aspāhe aštraya navaitīm sraošō-caranaya.

26. dātarə ... yō spānəm tarō-piθwəm daste yim vohunazgəm kā hē asti ciθa, āaṭ mraoṭ ahurō mazdā, haptāitīm upāzanam....

27. dātarə ... yō spānəm tarō-piθwəm daste yim taurunəm kā hē asti ciθa, āaṭ mraoṭ ahurō mazdā, paṅcāsatəm upāzanam....

28. aētəm zī aētahmi aṅhvō yaṭ astvaiṅti spitama zaraθuštra spəṅtahe mainyēuš dāmanam āsištəm zaurvānəm upāiti yaṭ spānō yōi hištəṅte ax'arō upa x'arəṅtəm parō spasānō əviṅdānō parō xšvisca āzūitišca gōuš maṭ baratu x'arəθanəm sūnahe aēvahe dāityō-piθwəm.

29. dātarə ... yaṭ ahmi nmāne yaṭ māzdayasnōiš spā avacā vā bavaṭ adāityō-xratuš kuθa tē vərəzyaṅ aēte yōi mazdayasna.

30. āaṭ mraoṭ ahurō mazdā, ava hē barayən tāštəm dāuru upa-tam manaθrīm stamanəm hē adāṭ nyāzayən išti-masō xraoždvahe biš aētavatō varədvāhe.

31. aētahmāṭciṭ nidarəzayən frā-hīmcīṭ nidarəzayən yezi nōiṭ spā avacā vā adāityō-xratuš pasūm vā narəm vā raēšyāṭ para hē iriṣiṅtō raēšəm cikayaṭ baoḍō-varštahe ciθaya.

32. paoirīm pasūm avaynāt paoirīm narəm raēšyāt dašinəm hē gaošəm upa-θwərəsayən bitīm pasūm avaynāt bitīm narəm raēšyāt hōyūm hē gaošəm upa-θwərəsayən.

33. θritīm pasūm avaynāt θritīm narəm raēšyāt dašinəm hē paiḍyām upa-kərəntayən tūirīm pasūm avaynāt tūirīm narəm raēšyāt haoyām hē paiḍyām upa-kərəntayən.

34. puxdəm pasūm avaynāt puxdəm narəm raēšyāt duməmcit hē upa-θwərəsayən, aētahmāciḥ nidarəzayən ... ciθaya.

35. dātarə ... yaḥ ahmi nmāne yaḥ māzdayasnōiš spā aḥam-baoḍəmnō vā bavaḥ adāityō-xratuš kuθa tē vərəzyān aēte yōi mazdayasna, āaḥ mraoḥ ahurō mazdā, avaða hē baēšazəm upōisayən yaθa dahmāciḥ ašaone.

36. dātarə ... yezi isəmnō nōiḥ viṇḍāite kuθa tē vərəzyān aēte yoi mazdayasna.

37. āaḥ mraoḥ ahurō mazdā, ava hē barayən ... frā-hīmcit nidarəzayən yezi nōiḥ spā aḥam-baoḍəmnō maēye vā cāiti vā vaēmi vā urūidi vā apō vā nāvayā paiḍyāite aḥmaḥ haca irišyāt,

38. yezi taḥ paiti irišyeiti aiḥaḥ haca šyaoθnāvarəza aθa bavaiṇti pəšō-tanvō.

39. spānəm daθəm zaraθuštra
azəm yō ahurō mazdā
hvāvastrəm x^vā-aoθrəm
zaēni-buḍrəm tiži-ḍasurəm

vīrō-draonaḥəm gaēθanəm harəθrāi, aḍa azəm yō ahurō mazdā spānəm nidaθəm yaḥ dim mazaoš kəhrpō tūrahe yezi asta aša xraθwa yezi asta gaēθābyō.

40. yasca hē spitama zaraθuštra vācim paiti zaēniš aḥaḥ nōiḥ hē tā vīspō tāyūš vā vəhrkō vā apaiti-busti haca vīžibyō para-baraiti, jaḥwa vəhrka scaḥwa vəhrka pōiθwa vəhrka snaēžana.

41. dātarə ... katārō zī ayā vəhrkayā jaḥwō-tarō aḥhən ašāum ahura mazda yaθa spā vəhrkahe kərənaoiti yaθa yaḥ vəhrkō spā, āaḥ mraoḥ ahurō mazdā, aēšō zī aētayā vəhrkayā jaḥwō-tarō aḥhən ašāum zaraθuštra yaθa spā vəhrkahe kərənaoiti yaθa yaḥ vəhrkō spā.

42. ustāciḥ spāna patəṇti pasuš-haurvəmca viš-haurvəmca vohunazgəmca draxtō-hunaranəmca yaθa-ḡnyō gaēθābyō taēciḥ yā bavaiṇti aošō-tarasca dužitō-tarasca gaēθō-jatarasca yaθa anya spā.

43. ustāciḥ vəhrka patəṇti ḡnyō gaēθābyō taēciḥ yā bavaiṇti aošō-tarasca dužitō-tarasca gaēθō-jatarasca yaθa anya vəhrka.

44. sūnahe aēvahe aštā bifrəm, asti šē haēm yaθa aθaurune asti-šē haēm yaθa raθaēštārahe asti-šē haēm yaθa vāstryeche fšuyantō asti-šē haēm yaθa

vaēsāuš asti šē haēm yaθa tāyaoš asti-šē haēm yaθa disaoš asti-šē haēm yaθa jahikayā asti-šē haēm yaθa apərənāyūkahe.

45. paiti xʷarəθa xʷaraiti yaθa āθrava huxšnaoθrō yaθa āθrava hvāzārō yaθa āθrava aēšō kasu draonō yaθa āθrava aiti-šē haēm yaθa aθaurune, raptō paurvaēibya yaθa raθaēštā aipi-jatō ǵam hudāŋhəm yaθa raθaēštā parō pasca nmānahe yaθa raθaēštā aiti šē haēm yaθa raθaēštārahe.

46. zaēnaŋha əvišpō-xʷafna yaθa vāstryō fšuyas parō pasca nmānahe yaθa vāstryō fšuyas parō nmānahe yaθa vāstryō fšuyas aiti-šē haēm yaθa vāstryehe fšuyantō, xʷandrakarō yaθa vaēsō asnaēraēšō yaθa vaēsō zairimyaḡsma θryaḡsma yaθa vaēsō aiti šē haēm yaθa vaēsāuš.

47. taθrō-cinō yaθa tāyuš xšapāyaonō yaθa tāyuš apišma-xʷarō yaθa tāyuš aθaca dužniḡātō yaθa tāyuš aiti-šē haēm yaθa tāyaoš, taθrō-cinō yaθa disuš xšapāyaonō yaθa disuš apišma-xʷarō yaθa disuš aθaca dužniḡātō yaθa disuš aiti-šē haēm yaθa disāuš.

48. xʷandrakarō yaθa jahika asnaēraēšō yaθa jahika airitō paṅtānəm yaθa jahika zairimyaḡsma θryaḡsma yaθa jahika aiti-šē haēm yaθa jahikayā, xʷafnō yaθa apərənāyuš snaēžanō yaθa apərənāyuš hizu-drājō yaθa apərənāyuš pairi-taxtō paurvaēibya yaθa apərənāyuš aiti-šē haēm yaθa apərənāyūkahe.

49. yaṭ mē aēšamciṭ nmānaḡmca caratō dva mā apa-raoḡayaēta yasca spā pasuš-haurvō yasca spā viš-haurvō, noiṭ mē nmānəm viḡātō hištəṅti zḡm paiti ahuraḡātəḡm yezi mē noiṭ aŋhāt spā pasuš-haurvō vā višhaurvō vā.

50. dātarə ... yaṭ sūniš para-iriθyeiti ništā-zəmanasca pairištā-xšudrasca kuθa aēšam baodō jasaiti.

51. āaṭ mraoṭ ahurō mazdā, xā paiti apam parāiti spitama zaraθuštra aθra aŋhəm ham-bavaiṅti dva udra upāpa hazaŋrāiš sūniš strī-nāmanō hazaŋrāiš sūniš nairyō-nāmanō miθwana strica nairyasca, udrahe avaynānō haēcō kərənaoiti yaṭ avāstrəm.

52. para nū ahmāt haca asaŋhaṭca šōiθraaṭca axštāṭ spitama zaraθuštra izāca āzūitišca para dasvarəca baēšazəmca para fradaθəmca varədaθəmca vaxšaθəmca para yavanamca vāstranəmca uruθəm.

53. dātarə ... kaḡa-nō ahmāi asaŋhaēca šōiθraēca paiti-jasātō izāca āzūitišca kaḡa dasvarəca baēšazəmca kaḡa fradaθəmca varədaθəmca vaxšaθəmca kaḡa yavanamca vāstranəmca uruθəm.

54. āaṭ mraoṭ ahurō mazdā, noiṭ nū para ahmāt spitama zaraθuštra asaŋhaēca šōiθraīca paiti-jasātō izāca āzūitišca noiṭ dasvarəca baēšazəmca noiṭ fradaθəmca varədaθəmca vaxšaθəmca noiṭ yavanamca vāstranəmca uruθəm.

55. para ahmāt yaṭ ida udra-janō haθra jatō nijanāite yaṭ vā aētahe udrahe upa dahməm urvānəm frāyazāṅte θri-ayarəm θri-xšaparəm saociṅtāṭ paiti āθraṭ frastərətāt paiti barəsmən uzḡātāt paiti haomāt.

56. pascaēta ahmāi asaṅhaēca šōiθraēca paiti-jasātō izāca āzūitišca pascaēta dasvarēca baēšazəmca pascaēta fradaθəmca varēdaθəmca vaxšaθəmca pascaēta yavanəmca vāstranəmca uruθəm. ašəm vohū.....

14.

1. pərəsaṭ zaraθuštrō ahurəm mazdām, ahura mazda mainyō spōništa dātarē gaēθanəm astvaitinəm ašāum yō udrəm jaiṅti yim upāpəm hazarṅrāišsūniš strī-nāmanō hazarṅrāiš sūniš nairyō-nāmanō frazābaoḍarḅhəm snaθəm vīkərəṭ-uštānəm kā hē asti ciθa.

2. āaṭ mraoṭ ahurō mazdā, baēvarē upāzananəm upāzōiṭ aspahe aštraya baēvarē sraošō-caranaya baēvarē vazyanəm aēsmanəm xraoždvanəm hušatəm pairištānəm āθre ahurahe mazdā ašaya vaṅhuya urune ciθīm nisirinuyāt.

3. baēvarē vazyanəm aēsmanəm varēdvanəm urvāsnyā vā vohu-gaonahe vā vohu-kərətōiš vā hadānaēpatayā vā kəmciṭ vā hubaoiḍitōmanəm urvaranəm āθre ahurahe mazdā ašaya vaṅhuya urune ciθīm nisirinuyāt.

4. baēvarē frastərətānəm barəsmaine frastairyāt baēvarē zaoθranəm haomavaitinəm gaomavaitinəm yaoždātānəm pairi-aṅharštānəm dahmō-yaoždātānəm dahmō-pairi-aṅharštānəm ḅam-irista aētayā urvarayā yā vaoce hadānaēpāta aiwyō vaṅhibyō ašaya vaṅhuya urune ciθīm nisirinuyāt.

5. baēvarē ažinəm udarō-θrašanəm ava-janyāt baēvarē ažinəm spakanəm kahrpunanəm ava-janyāt baēvarē kasyapanəm ava-janyāt baēvarē vazaṅanəm dādmānyanəm ava-janyāt baēvarē vazaṅanəm upāpanəm ava-janyāt baēvarē maoirinəm dānō-karšanəm ava-janyāt baēvarē maoirinəm araēkanəm kutakanəm dužaininəm ava-janyāt.

6. baēvarē pazdunəm gūθō-varətanəm ava-janyāt baēvarē maxšinəm əṅyāitinəm ava-janyāt baēvarē maṅanəm irimaitinəm aiṅhā zəmō aipikanyāt biš hapta āθrō daxštəm nərəbyō ašavabyō ašaya vaṅhuya urune ciθīm nisirinuyāt.

7. ātrē-carana pairiš-hanāna yaoždāni garəmō-skarana ātrē-vazanəm hikaranəm vikusrəm aḍarāt naēmāt haṅkusrəm uparāt naēmāt tašəm tiži-dārəm tiži-žnūtəm vadəm tiži-bārəm tiži-žnūtəm nərəbyō ašavabyō ašaya vaṅhuya urune ciθīm nisirinuyāt yaēibyō aēte mazdayasna āθre ahurahe mazdā aēsmaṅ pairišəṅte.

8. vīspe zaya aθaurune nərəbyō ašavabyō ašaya vaṅhuya urune ciθīm nisirinuyāt yaēšəm zayanəm aθaurune aštra gaiḍi paiti-dānō xrafstraynəm sraošō-caranaya urunya raēθwiš-bajina havana dāityō-kərəta tašta haomya barəsmaca.

9. vīspe zaya raθōišti nərəbyō ašavabyō ašaya vaṅhuya urune ciθīm nisirinuyāt yaēšəm zayanəm raθōišti paoiryō arštiš bityō karəto θrityō vazrō tūiryā θanvarē puxḍa zaēnāuš maṭ akana maṭ θrisaš ayō-aṅrāiš xštvi fradaxšana snāvarē-bāzura maṭ θrisaš fradaxšanyāiš haptaθō zrāḍō aštəmō kūiris nāumō paiti-dānō dasəmō sāravarō aēvaṅdasō kamara dvadasō rānapō.

10. vīspe zaya vāstryō fšuyas nərəbyō ašavabyō ašaya vaṇhuya urune ciθīm nisirinuyāt yaēšam zayanam vāstryeche fšuyantō aēša yuyō-səmi ayazāna paiti-darazāna gavāzišta gavāzō asmana hāvana yāvarənəm zgərəsnō-vaγdanəm

11. kaštrəm paitiš-hərəzəm vərəzayantəm hakərət ərəzatəm hakərət zaranim, dātarə ... cvaṭ yavaṭ ərəzatəm, āaṭ mraoṭ ahurō mazdā, yaθa aspahe aršnō pərəska, dātarə ... cvaṭ yavaṭ zaranim, āaṭ mraoṭ ahurō mazdā, yaθa uštrahe aršnō pərəska.

12. vaiḍim taci-apam nərəbyō ašavabyō ašaya vaṇhuya urune ciθīm nisirinuyāt, dātarə ... cvaṭ yavaṭ vaiḍim, āaṭ mraoṭ ahurō mazdā, spā-barəzəm spā-fraθəm.

13. zam karšyam raodayam nərəbyō ašavabyō ašaya vaṇhuya urune ciθīm nisirinuyāt, dātarə ... cvaṭ yavaṭ zā, āaṭ mraoṭ ahurō mazdā, yavaṭ aēša āfš byārixti upa-θwaršti frabavāt.

14. nmānəm gāvayanəm nava-hāθrəm nava-nəmatəm nərəbyō ašavabyō ašaya vaṇhuya urune ciθīm nisirinuyāt, dātarə ... cvaṭ yavaṭ nmānəm, āaṭ mraoṭ ahurō mazdā, dvadasa vītara upəma nava vītara madəma xšvas vītara nitəma gātu x'aini starətu maṭ barəziša nərəbyō ašavabyō ašaya vaṇhuya urune ciθīm nisirinuyāt.

15. kanyam askəndam anupayatam nərəbyō ašavabyō ašaya vaṇhuya urune ciθīm nisirinuyāt, dātarə ... kā yā kaine, āaṭ mraoṭ ahurō mazdā, x'əṇha vā duγda vā nāməni maṭ gaošāvarə pasca paṇca-dasim sarəðəm nərəbyō ašavabyō nāiriθwana upa-vādayaēta.

16. biš hapta pasvō anumaya nərəbyō ašavabyō ašaya vaṇhuya urune ciθīm nisirinuyāt, biš hapta puθram gadwam uzjāmōiṭ biš hapta pəšavō fraoirisyōiṭ tarasca āpō nāvayā.

17. duye navaiti astanam adāityō-aṇharəθranam dāitīm ahmāiciṭ harəθrəm kərənuyāt duye navaiti gadwam pairi-yaozdaiθita stiptibyasca anāiritibyasca vyanuraēibyasca vīspaēibyasca pairi acištaēibyō yōi gadwam pairi-bavaiti, duye navaiti naram ašaonam vāstryaēta gəuš vā x'arəθahe vā hurayā vā maduš vā.

18. hā hē asti ciθa hā hē asti āpərətiš aipi-pārəmnāi ida ašaone nōiṭ anaipi-pārəmnāi drujō nmāne haiθyā aṇhən astayō. ašəm vohū.....

15.

1. caiti tā šyaoθna varšta yā aṇhuš astvā vərəzyceti fraēta apatita anuzvaršta aiṇhaṭ haca šyaoθnāvarəza aθa bavaiṇti pəšō-tanva.

2. āaṭ mraoṭ ahurō mazdā, paṇca ašāum zaraθuštra, paoirīm aētaēšam šyaoθnanam yōi vərəziṇti mašyāka yō narəm ašavanəm anyō-varənāi vā anyō-ṭkaēšāi vā kasyaṇhe saṇhāi daḍāiti vīdvā avat hava xraθwa parāiti aiṇ haṭ haca šyaoθnāvarəza aθa bavaiṇti pəšō-tanva.

3. bitīm aētaēšam šyaoθnanam yōi vərəziṇti mašyāka yō sūne yim pasuš-haurve vā viš-haurve vā astanam ahmarštanam daḍāiti garəmanam vā x'arəθanəm,

4. yezica aēte asti dātāhva arānte garēmōhva vīdānte yaṭ vā aēte garəma xʻarəθa stamanəm vā hizvəm vā apa-daḗaṭ ahmaṭ haca irišyāṭ yezi taṭ paiti irišyeiti aiñhaṭ haca šyaoθnāvarəza aθa bavaiṅti pəšō-tanva.

5. θritīm aētaēšəm šyaoθnanəm yōi vərəziṅti mašyāka yō gadwəm yəm apuθraṃ janaiti vā vayeiti vā xraosyeiti vā pazdayeiti vā.

6. yezica aēša gadwa maēye vā cāiti vā vaēmi vā urūidi vā apō vā nāvayā paidyāite ahmaṭ haca irišyāṭ yezi taṭ paiti irišyeiti aiñhaṭ haca šyaoθnāvarəza aθa bavaiṅti pəšō-tanva.

7. tūirīm aētaēšəm šyaoθnanəm yōi vərəziṅti mašyāka yō nāirikəm ciθravaitīm daxštavaitīm vohunavaitīm xšudrā avi frañhərəzaiti aiñhaṭ haca šyaoθnāvarəza aθa bavaiṅti pəšō-tanva.

8. puxdəm aētaēšəm šyaoθnanəm yōi vərəziṅti mašyāka yō nāirikəm yəm apuθraṃ pipyūšim vā apipyūšim vā anasaxtaṃ para xšudrā avi frañhərəzaiti ahmaṭ haca irišyāṭ yezi taṭ paiti irišyeiti aiñhaṭ haca šyaoθnāvarəza aθa bavaiṅti pəšō-tanva.

9. yō kaininəm upāiti stātō-ratūm vā astātō-ratūm vā paradātaṃ vā aparadātaṃ vā puθraṃca hē dadāiti mā-nō aēša yā kaine mašyānaṃ parō fšarəmāṭ tarō daxštəm pārayāṭ tarō apəmca urvarəṃca.

10. yezica aēša yā kaine mašyānaṃ parō fšarəmāṭ tarō daxštəm parāiti tarō apəmca urvarəṃca aētahmāyuš paiti varšta šyaoθna.

11. yō kaininəm upāiti stātō-ratūm vā astātō-ratūm vā paradātaṃ vā aparadātaṃ vā puθraṃca hē dadāiti mā-nō aēša yā kaine mašyānaṃ parō fšarəmāṭ xʻatō garəwəm raēšayāṭ.

12. yezica aēša yā kaine mašyānaṃ parō fšarəmāṭ xʻatō garəwəm irišyeiti pṭərəbyō āstryeiti pṭərəbyō irišyeiti pṭərəbyō irišiṅtaṃ raēšō cikaēn baodō-varštahe ciθaya.

13. yō kaininəm upāiti stātō-ratūm vā astātō-ratūm vā paradātaṃ vā aparadātaṃ vā puθraṃca hē dadāiti yezica vaocāṭ aēša yā kaine, puθrəm aēm narō varšta yezica vaocāṭ aēšō nā hanəm aētaēšəm jjišarəṃjuha pərəsarəṃjuha

14. aētaða aēša yā kaine hanəm aētaēšəm jjišāiti pərəsāiti aēša hana frabaraiti bañhəm vā šaētəm vā ɣnānəm vā fraspātəm vā kaṃciṭ vā vītācinanəm urvaranəm, aētahmāṭ puθrāṭ mimarəxšarəṃjuha aētaða aēša yā kaine aētahmāṭ puθrāṭ mimarəxšāite havaṅta aētahe šyaoθnahe vərəzyaṃ nāca kainica hanāca.

15. yō kaininəm upāiti stātō-ratūm vā astātō-ratūm vā paradātaṃ vā aparadātaṃ vā puθraṃca hē dadāiti vīspəm ā ahmāṭ θrāθrəm kərənavāṭ yaṭ aēša yō apərənāyūkō uzjasāṭ.

16. yezi nōiṭ harəθrəm baraiti aētaða aēša yō apərənāyūkō adāityō-añharəθrəm irišyāṭ para hē irišiṅtō raēšəm cikayaṭ baodō-varštahe ciθaya.

17. dātarə ... yezi taṭ frajasāṭ aṅtarə sairī varəzāne kahmāṭ mazdayasnanəm harəθrəm barāṭ,

18. āaṭ mraoṭ ahurō mazdā, yō kainīnəm upāiti stātō-ratūm vā astātō-ratūm vā paradātəm vā aparadātəm vā vīspəm ā ahmāt θrāθrəm kərənāvāt yaṭ aēša yō aparənāyūkō uzjasāt.

19. yezi nōiṭ harəθrəm baraiti aētaḁa hē vīspā hāirišīš frāšnaoiti bipaitištānaca caṭwarə-paitištānaca [aēša bipaitištāna yā kaine aēša caṭwarə-paitištāna yā gaḁwa.]

20. dātarə ... yezi taṭ frajasāt aṅtarə sairi varəzāne kahmāt mazdayasnanəm harəθrəm barāt.

21. āaṭ mraoṭ ahurō mazdā, yō hē aṅhaṭ nazdištəm nmānəm uzdasta aētahmāyuš paiti harəθrəm vīspəm ā ahmāt θrāθrəm kərənāvāt yaṭ aēte yōi spāna uzjasən.

22. yezi nōiṭ harəθrəm baraiti aētaḁa aēte yōi spāna adāityō-aṅharəθrəm irišyaṅ para aēšəm irišiṅṭəm raēšō cikaēn baodō-varštahe ciṭaya.

23. dātarə ... yezica aēša gaḁwa uštrō-stānaēšva frajasāt kahmāt mazdayasnanəm harəθrəm barāt.

24-25. āaṭ mraoṭ ahurō mazdā, yō aētəm uštrō-stānəm uzdasta yeṅhā vō aēšō uštrō-stāniš aṅhaṭ aētahmāyuš paiti harəθrəm vīspəm ā ahmāt....

26. dātarə ... yezica aēša gaḁwa aspō-stānaēšva frajasāt kahmāt mazdayasnanəm harəθrəm barāt.

27-28. āaṭ mraoṭ ahurō mazdā, yō aētəm aspō-stānəm uzdasta yeṅhā vō aēšō aspō-stāniš aṅhaṭ aētahmāyuš paiti harəθrəm vīspəm ā ahmāt....

29. dātarə ... yezica aēša gaḁwa gavō-stānaēšva frajasāt kahmāt mazdayasnanəm harəθrəm barāt.

30-31. āaṭ mraoṭ ahurō mazdā, yō aētəm gavō-stānəm uzdasta yeṅhā vō aēšō gavō-stāniš aṅhaṭ aētahmāyuš paiti harəθrəm vīspəm ā ahmāt....

32. dātarə ... yezica aēša gaḁwa pasuš-hastaēšva frajasāt kahmāt mazdayasnanəm harəθrəm barāt.

33-34. āaṭ mraoṭ ahurō mazdā, yō aētəm pasuš-hastəm uzdasta yeṅhā vō aēšō pasuš-hastiš aṅhaṭ aētahmāyuš paiti harəθrəm vīspəm ā ahmāt....

35. dātarə ... yezica aēša gaḁwa uzdaēzaēšva frajasāt kahmāt mazdayasnanəm harəθrəm barāt.

36-37. āaṭ mraoṭ ahurō mazdā, yō aētəm uzdaēzəm uzdišta yeṅhā vō aēšō uzdaēziš aṅhaṭ aētahmāyuš paiti harəθrəm vīspəm ā ahmāt....

38. dātarə ... yezica aēša gaḁwa avakaṅtaēšva frajasāt kahmāt mazdayasnanəm harəθrəm barāt.

39. āaṭ mraoṭ ahurō mazdā, yō aētəm avakanəm avakaṅta yeṅhā vō aēšō avakaniš aṅhaṭ aētahmāyuš paiti harəθrəm vīspəm ā ahmāt θrāθrəm kərənāvāt yaṭ aēte yōi spāna uzjasən.

40. yezi nōiṭ harəθrəm baraiti aētaḁa aēte yōi spāna adāityō-aṅharəθrəm irišyaṅ para aēšəm irišiṅṭəm raēšō cikaēn baodō-varštahe ciṭaya.

41. dātarə ... yezica aēša gaḍwa avi maḍəme vā vāstre vā frajasāt kahmāt mazdayasnanəm harəθrəm barāt.

42. āaṭ mraoṭ ahurō mazdā, yō aētəm vāstri uzdasta yejḥā vō aēšō vāstriš aṇhaṭ aētahmāyuš paiti harəθrəm,

43. upāca hē gātūm barayən nəmō vaṇtāhva kāmciṭ vā starətaēšinəm vīspəm ā ahmāt θrāθrəm kərənavāt yaṭ aēte yōi spāna x^vā-zaēnəm x^vā-draonəm bavān.

44. dātarə ... kaḥa aēte spāna x^vā-zaēnəm x^vā-draonəm bavān.

45. āaṭ mraoṭ ahurō mazdā, yavaṭ aēte spāna biš hapta nmāna pairi tacahi bavān, vasō pascaēta fraxštāite aiwi-gāme iḥa hama, xšvas māṇhō sūnō θrāθrəm hapta sarəḍa apərənāyūkahe āθrō ahurahe mazdā puθrəm avaḥa nāirikayāi.

46. dātarə ... ašāum yezi vasən mazdayasna jvō-daxštəm maēθmanəm kuḥa tē vərəzyaṇ aēte yōi mazdayasna.

47. āaṭ mraoṭ ahurō mazdā, aētaḍa hē aēte mazdayasna aiḡhā zəmō avakanəm ava-kanayən maiḍyōi pasuš-hastaēšva maiḍyōi paitištāne xrūzdisme maiḍyōi narš varədušme.

48. paoiryāi nidarəzayən apərənāyūkəm avaḥa ātrəm ahurahe mazdā puθrəm vīspəm ā ahmāt θrāθrəm kərənavāt yavaṭ aēšō spā anya jasō aiwica aparəm patica aparəm apāca paurvaēibya nōiṭ dim avaḥa irišyaṇ.

49. yō gaḍwəṃ yaṃ apuθraṃ θrayaṃ bāuzdri barəθrica puθrāca paēmainica ayatāca taēca aētaḍaca puθrəm baraiti sūnaṃ bāuzdri.

50. dātarə ... yō gaḍwəṃ jaiṇti yaṃ apuθraṃ θrayaṃ bāuzdri barəθrica puθrāca paēmainica ayatāca taēca aētaḍaca puθrəm baraiti sūnaṃ bāuzdri kā hē asti ciḥa.

51. āaṭ mraoṭ ahurō mazdā, hapta sata upāzananəm upāzōiṭ aspahe aštraya hapta sata sraošō-caranaya. ašəm vohū.....

16.

1. dātarə gaēθanaṃ astvaitinaṃ ašāum yaṭ ahmi nmāne yaṭ māzdayasnōiš nāirika ciḥavaiti daxštavaiti vohunavaiti nišhiḍāt kuḥa tē vərəzyaṇ aēte yōi mazdayasna.

2. āaṭ mraoṭ ahurō mazdā, aētaḍa hē aēte mazdayasna paṇta vīcinaēta pairi urvarābyasca varəḍābyasca aēsmaēibyō hiku pašnu gātu niḍayaēta fratara haca nmāna vərəzyaṇ yaṭ vā naēməm yaṭ vā θrišum yaṭ vā caθrušum yaṭ vā paṇtaṇhum yezi nōiṭ nāirika ātrəm aiwi-vaēnāt yezi nōiṭ nāirika āθre raoxšnaṇ paiti-diḍyāt.

3. dātarə ... cvaṭ drājō haca āθraṭ cvaṭ drājō haca apaṭ cvaṭ drājō haca barəsmən frastairyāt cvaṭ drājō haca nərəbyō ašavabyō.

4. āaṭ mraoṭ ahurō mazdā, paṇca-dasa-gāim haca āθraṭ paṇca-dasa-gāim haca apaṭ paṇca-dasa-gāim haca barəsmən frastairyāṭ θrigāim haca nərəbyō ašavabyō.

5. dātərə ... cvaṭ drājō ava-hištāt aēša yō nāirikayā ciθravaityā daxštavaityā vohunavaityā xʼarəθəm frabarāt.

6. āaṭ mraoṭ ahurō mazdā, θrigāim ava-hištāt aēša yō nāirikayā ciθravaityā daxštavaityā vohunavaityā xʼarəθəm frabarāt cinəm xʼarəθəm frabarāt cinəm yaom frabarāt ayaṇhaēnəm vā srum vā nitəma xšaθra vairyā.

7. cvaṭ xʼarəθəm frabarāt cvaṭ yaom frabarāt, dva danarə tāyūirinəm aēva danarə xšaodrinəm yezi nōiṭ nāirika niuruiḍyāt, yezi apərənāyūkō frāšnāvāt zasta hē paoirim frasnāḍayən aētahe yaṭ apərənāyūkahe ahe havayāsə tanvō.

8. yezi nāirika vohuniš aiwi-vaēnāt yaṭ hē θrāyō xšafna sacāṇte airime gātūm hē nišhiḍaēta vīspəm ā ahmāt yaṭ hē caθwārō xšafna sacāṇte, yezi nāirika vohuniš aiwi-vaēnāt yaṭ hē caθwārō xšafna sacāṇte airime gātūm hē nišhiḍaēta vīspəm ā ahmāt yaṭ hē paṇca xšafna sacāṇte.

9. yezi nāirika vohuniš aiwi-vaēnāt yaṭ hē paṇca xšafna sacāṇte airime gātūm hē nišhiḍaēta vīspəm ā ahmāt yaṭ hē xšvaš xšafna sacāṇte, yezi nāirika vohuniš aiwi-vaēnāt yaṭ hē xšvaš xšafna sacāṇte airime gātūm hē nišhiḍaēta vīspəm ā ahmāt yaṭ hē hapta xšafna sacāṇte.

10. yezi nāirika vohuniš aiwi-vaēnāt yaṭ hē hapta xšafna sacāṇte airime gātūm hē nišhiḍaēta vīspəm ā ahmāt yaṭ hē ašta xšafna sacāṇte, yezi nāirika vohuniš aiwi-vaēnāt yaṭ hē ašta xšafna sacāṇte airime gātūm hē nišhiḍaēta vīspəm ā ahmāt yaṭ hē nava xšafna sacāṇte.

11. yezi nāirika vohuniš aiwi-vaēnāt yaṭ hē nava xšafna sacāṇte āaṭ hē paityārəm ava-barəṇti daēva daēvanəm yasnāica vahmāica, aētaḍa hē aēte mazdayasna paṇta vīcinaēta pairi urvarābyasca varəḍābyasca aēsmaēibyō.

12. aētaḍa hē aēte mazdayasna aiṅhā zəmə θriš maḡəm ava-kanayən dva maḡa frasnāḍayən maēsmana gēuš ōyūm apō xrafstrəm ava-janaēta maoirim dānō-karšəm yaṭ vā hama duye saite kahyāciṭ anrō-mainyavanəm xrafstranəm ava-janyāt yaṭ vā aēte zaēna.

13. aētahe yaṭ mazdayasnahe aētayā nāirikayā ciθravaityā daxštavaityā vohunavaityā daxštəm uzvərəzyāt kā hē asti ciθa, āaṭ mraoṭ ahurō mazdā, aētahe paiti pəšō-tanuye duye saite upāzananəm upāzōiṭ aspahē aštraya duye saite sraošō-caranaya.

14. dātərə ... yō nāirikayā ciθravaityā daxštavaityā vohunavaityā paurvō vasna šyaoθna tanūm iriḍyāt yaṭ hē ciθra daxštəm bavaiti yaṭ hē daxšta ciθrəm bavaiti kā hē asti ciθa.

15. āaṭ mraoṭ ahurō mazdā, paoiryāi upaēta paoiryāi nišasta θrisatəm upāzananəm upāzōiṭ aspahē aštraya θrisatəm sraošō-caranaya, bityāi upaēta bityāi nišasta paṇcāsātəm upāzananəm upāzōiṭ aspahē aštraya paṇcāsātəm sraošō-caranaya, θrityāi upaēta θrityāi nišasta haptāitīm upāzananəm upāzōiṭ aspahē aštraya haptāitīm sraošō-caranaya.

16. [tūiryāi upaēta tūiryāi nišasta yim antarə vastrəm frajasāt yim antarə āhitəm rānəm frajasāt afranharəzāt pairi xšudrāt kā hē asti ciθa, āaṭ mraoṭ ahurō mazdā,navaitīm upāzananəm upāzoiṭ aspae aštraya navaitīm sraoṣō-caranaya.]

17. yō nāirikəm ciθravaitīm daxštavaitīm vohunavaitīm xšudrā avi franharəzaiti nōiṭ vanhō ahmāt šyaoθnəm vərəzyeiti yađoiṭ puθrahe hvāzātahe frā naēzəm nasūm pacāṭ paiti ūθəm barāt.

18. vīspe drvaṇtō tanu-drujō yō adərətō tkaēšō vispe adərətō-tkaēšō yō asraoṣō vīspe asraoṣō yō anašavanō vīspe anašavanō yō tanu-pərəθō. ašəm vohū.....

17.

1. pərəsaṭ zaraθuštrō ahurəm mazdām, ahura mazda ... ašāum kəm aojišta mahrka mašyāka daēvō aoṣō yazāite.

2. āaṭ mraoṭ ahurō mazdā, hāu bā ašāum zaraθuštra yō aētahmi aṅhvō yaṭ astvaiṇti varəsāsca ḥəm-rāzayeiti varəsāsca pairi-brīnaṇti srvaēca upa-θwərəsəṇti aθa dim upa-taošayeṇti ūnāhva dim raēšayaca.

3. āaṭ āhva vyarəθāhva zəmō daēva ḥəm-bavaiṇti āaṭ āhva vyarəθāhva zəmō xrafstra ḥəm-bavaiṇti yim mašyāka spiš ṇama aojaite yim mašyāka yaom yavō-hva nižganḥṇti vastra vastrāhva.

4. āaṭ yaṭ tūm zaraθuštra aētahmi aṅhvō yaṭ astvaiṇti varəsāsca ḥəm-rāzayaṇuha varəsāsca pairi-brīnaṇuha srvaēca upa-θwərəsaṇuha, āaṭ tūm pascaēta apa-barōiš dasa-gāim haca nərəbyō ašavabyō vīsata-gāim haca āθraṭ θrisata-gāim haca apaṭ paṇcāsata-gāim haca barəsmən frastairyāt.

5. āaṭ aθra maṅəm ava-kanōiš dīštīm xrūždisme vitastīm varədusme paiti dim ābarōiš aθa imā vacō framruyā vārəθraṇiš zaraθuštra, aṭ ahyāi ašā mazdā urvarā vaxšāṭ.

6. xšaθrāi vairiyāi pairi-karəm pairi-kārayōiš tišrō yaṭ vā xšvaš yaṭ vā nava ahunəmca vairīm frasrāvayōiš tišrō yaṭ vā xšvaš yaṭ vā nava.

7. srvābya maṅəm ava-kanōiš ništara-naēmāt nmānahe avāṭ aipi yaθa kasištahe ərəzvō fratəməm tbišiš, paiti dim ābarōiš aθa imā vacō framruyā vārəθraṇiš zaraθuštra, ašā vohū manaṅhā yā sruyē parō magaonō.

8. xšaθrāi vairiyāi pairi-karəm pairi-kārayōiš tišrō yaṭ vā xšvaš yaṭ vā nava ahunəmca vairīm frasrāvayōiš tišrō yaṭ vā xšvaš yaṭ vā nava.

9. paiti tē mərəṅa ašō-zušta imā srvā vaēdayemi imā srvā āvaēdayemi imāso-tē srvā mərəṅa ašō-zušta hyārə arštayasca karətayasca θanvarəca išavasca ərəzifyō-parəna asanasca fradaxšanya paiti daēvō māzanyaṇ.

10. yezi nōiṭ paiti-vaēdayeṇti tā srvā pascaēta bun māzainyanəm daēvanəm arštayasca karətayasca θanvarəca išavasca ərəzifyō-parəna asanasca fradaxšanya paiti daēvō māzanyaṇ.

11. vīspe drvaṇtō tanu-drujō yō adərətō-tkaēšō vispe adərətō-tkaēšō yō asraoṣō vīspe asraoṣō yō anašavanō vīspe anašavanō yō tanu-pərəθō. ašəm vohū.....

18.

1. paravō zī mašyāka uiti mraoṭ ahurō mazdā āi ašāum zaraθuštra paiti-dānəm ainīm baraiti anaiwyāstō daēnəm diwžaṭ haca āθrava saṅhaite,

mā dim mruyā āθravanəm
uiti mraoṭ ahurō mazdā
āi ašāum zaraθuštra.

2. xrafstraynəm ainīm baraiti anaiwyāstō daēnəm diwžaṭ haca āθrava saṅhaite, mā dim mruyā āθravanəm uiti mraoṭ ahurō mazdā āi ašāum zaraθuštra.

3. urvarəm ainīm baraiti anaiwyāstō daēnəm diwžaṭ haca āθrava saṅhaite, mā dim mruyā āθravanəm uiti mraoṭ ahurō mazdā āi ašāum zaraθuštra.

4. aštram mairīm kāšayeiti anaiwyāstō daēnəm diwžaṭ haca āθrava saṅhaite, mā dim mruyā āθravanəm uiti mraoṭ ahurō mazdā āi ašāum zaraθuštra.

5. yō saēte haurvəm tarasca xšapanəm ayazəmnō asrāvayō amarō əvrəzyō asixšō asācayō jayāi cinvaṭ-uštānəm diwžaṭ haca āθrava saṅhaite, mā dim mruyā āθravanəm uiti mraoṭ ahurō mazdā āi ašāum zaraθuštra.

6. təm dim mruyā āθravanəm
uiti mraoṭ ahurō mazdā
āi ašāum zaraθuštra
yō haurvəm tarasca xšapanəm
xratūm pərəsāt ašavanəm

ązō-būjim ravazdəm cinvaṭ-pərətūm havəṅhō-dəm ahu-nāsəm aša-nāsəm vahišta-nāsəm vahištahe aṅhūš.

7. paiti məm ərəzvō pərəsaṅuha
yim daḍvāṅhəm spēništəmca
vaēdištəmca paiti-vacištəmca parštəm avaθa tē aṅhaṭ vaṅhō
avaθa aṅhāi spanyā
yezi məm paiti-pərəsāṅhe.

8. pərəsaṭ zaraθuštrō ahurəm mazdəm, ahura ... ašāum kā asti iθyejā maršaonō.

9. āaṭ mraoṭ ahurō mazdā, aṅa daēna disyāt spitama zaraθuštra yō θizarəmaēm ratūm aiwyāṅhəm nōiṭ aiwyāsti nōiṭ gāθā srāvayeiti nōiṭ āpō vaṅuhīš yazaiti.

10. yasca mē aētəm narəm ązō avi ava-gərəptəm ravōhu paiti uzbārayaṭ nōiṭ vaṅhō ahmāt šyaoθnəm vərəzyeiti yaθa yaṭ hē paštō-fraθaṅhəm kamərəḍəm kərənuyāt.

11. aēvahe zī ašaoyahe aṅahe anašaonō zānu-drājā asti āfritiṣ dvayā hizu-drājā θrayəm naēda-ciš caθwārō xʷatō zavaṅte.

12. yō aēvahe ašaoyahe ayahe anašaonō haomahe hutahe daḍāiti usəfritinam vā myezdinam nōiṭ vaṇhō ahmāt šyaonəm vərəzeyēiti yaθa yaṭ hazarō-aspaṃ haēnaṃ avazōiṭ māzdayasnīš avi vīsō janyāt nərəš para gaṃ azōiṭ varəṭam.

13. paiti maṃ ərəzvō pərəsaṇuha yim daḍvāṇhəm spēništəmca vaēdištəmca paiti-vacištəmca parštəm avaθa tē aṇḥaṭ vaṇhō avaθa aṇhāi spanyā yezi maṃ paiti-pərəsāṇhe.

14. pərəsaṭ zaraθuštrō ahurəm mazdāṃ, ahura mazda mainyō spēništa dātaraḡ gaēθanāṃ astvaitināṃ ašāum kō asti sraošahe ašyeche taxmahe tanumaṭrahe darši-draoš āhūryeche sraošāvarəzō.

15. āaṭ mraoṭ ahurō mazdā, mərəγō yō parō-darš nāma spitama zaraθuštra yim mašyāka avi dužvacanḡhō kahrkatās nāma aojaite āaṭ hō mərəγō vācim baraiti upa ušāṇhəm yaṃ sūrāṃ,

16. usəhištata mašyāka staota ašəm yaṭ vahištəm nīsta daēva aēša vō dvaraiti būšyāsta darəγō-gava hā vīspəm ahūm astvaṇtəm hakaṭ raocanḡhəm fraγrātō nix^vabdayēiti, x^vafsa darəγō mašyāka nōiṭ tē sacaite.

17. mā θrayāṃ vahištanāṃ aiwiθyō buyata humataheca mananḡhō hūxtaheca vacanḡhō hvarštaheca šyaonəhahe θrayāṃ acištanāṃ aiwiθyō buyata dušmataheca mananḡhō dužūxtaheca vacanḡhō dužvarštaheca šyaonəhahe.

18. āaṭ mē paoiryāi θrišvāi xšafne ātarš ahurahe mazdā nmānahe nmānō-paitim yāsaiti,

19. avaiṇhe nmānahe nmānō-paite usəhišta aiwi vastra yaṇhayaṇuha frā zasta snayaṇuha ā aēsmaṡ yāsaṇuha avi maṃ bara paiti maṃ raocaya aēsmanāṃ yaoždātanāṃ frasnātaēibya zastaēibya ava mē āziš daēvō-dātō parōiṭ pairiθnəm aṇhvāṃ ava-dərənāṇ sadayeiti.

20. āaṭ mē bityāi θrišvāi xšafne ātarš ahurahe mazdā vastrīm fšuyāntəm yāsaiti,

21. avaiṇhe fšuya vāstrya usəhišta aiwi vastra yaṇhayaṇuha frā zasta snayaṇuha ā aēsmaṡ yāsaṇuha avi maṃ bara paiti maṃ raocaya aēsmanāṃ yaoždātanāṃ frasnātaēibya zastaēibya ava mē āziš daēvō-dātō parōiṭ pairiθnəm aṇhvāṃ ava-dərənāṇ sadayeiti.

22. āaṭ mē θrityāi θrišvāi xšafne ātarš ahurahe mazdā sraošəm ašim yasaiti, avaiṇhe āi sraoša ašya huraoda āaṭ maṃ kəmcit aṇhōuš astvatō aēsmanāṃ paiti baraiti yaoždātanāṃ frasnātaēibya zastaēibya ava mē āziš daēvō-dātō parōiṭ pairiθnəm aṇhvāṃ ava-dərənāṇ sadayeiti.

23. āaṭ hō sraošō ašyō aom mərəγəṃ fraγrārayēiti parō-darš nāma spitama zaraθuštra yim mašyāka avi dužvacanḡhō kahrkatās nāma aojaite, āaṭ hō mərəγō vācim baraiti upa ušāṇhəm yaṃ sūrāṃ,

24. usəhištata mašyāka staota ašəm yaṭ vahištəm nīsta daēva aēša vō dvaraiti būšyāsta darəγō-gava hā vīspəm ahūm astvaṇtəm hakaṭ raocanḡhəm fraγrātō nix^vabdayēiti, x^vafsa darəγō mašyāka nōiṭ tē sacaite.

25. mā θrayaṃ vahištaṇaṃ aiwiθyō buyata humataheca manañhō hūxtaheca vacaṇhō hvarštaheca šyaoθnahe θrayaṃ acištaṇaṃ aiwiθyō buyata dušmataheca manañhō dužūxtaheca vacaṇhō dužvarštaheca šyaoθnahe.

26. āaṭ aošete haxa haša ana barēziš sayamnanāṃ, usōhišta-tū vyārayeite maṃ yatārō pauraṃ usōhištaiti parāiti vahištahe aṇhēuš yatārō pauraṃ āθre ahurahe mazdā aēsmāṃ paiti-baraiti yaoždānaṃ frasnātaēibya zastaēibya ahmāi ātarš āfrīnāt xšnūtō adbištō haγdaṇhum,

27. upa θwā haxšōiṭ gōuš vāθwa
 upa vīraṇaṃ pouru-tās
 upa θwā vərəzvaṭca manō
 vərəzvatica haxšōiṭ aṇuha
 urvāxš-aṇuha gaya jiγaēša
 tā xšapanō yā jvāhi,
 imaṭ āθrō āfrivanəṃ
 yō ahmāi aēsməṃ baraiti
 hikūš raocas-pairištəm
 ašahe bərəja yaoždātā.

28. yasca mē aēte mərəγa spitama zaraθuštra miθwana strica nairyasca naire ašaone ašaya vaṇhuya para-daθaṭ nmānəṃ hō manyaēta para-daθō satō-stūnəṃ hazarō-frasciṇbanəṃ baēvarə-mištəm baēvarə-vaēdayanəṃ.

29. yasca mē aētahe mərəγahe yaṭ parō-daršahe tanumazō gōuš daθaṭ nōiṭ dim yava azəṃ yō ahurō mazdā bitīm vācim paiti-pərəsəmnō bva fraša frayāi vahištəm ā ahūm ā.

30. sraošō ašyō drujim apərəsaṭ
 apayūxtāt paiti vazrāt,
 druxš ax'āθre əvərəzike
 tūm zī aēva vīspahe aṇhēuš astvatō anaiwyāstiš hunahi.

31. āaṭ hē hā paiti-davata yā daēvi druxš, sraoša ašya huraoda nava azəṃ vīspahe aṇhēuš astvatō anaiwyāstiš hunāmi həṇti bāda māyayaciṭ caθwārō aršāna.

32. tē maṃ avaθa vərənəṇte
 yaθa anyāsciṭ aršānō
 avi xšudrā xšaθrišva ḥaṃ-vərənavaiṇti.

33. sraošō ašyō drujim apərəsaṭ apayūxtāt paiti vazrāt, druxš ax'āθre əvərəzike kō tē aētaēšāṃ aršnaṃ paoiryō.

34. āaṭ hē hā paiti-davata yā daēvi druxš, sraoša ašya huraoda hō bā mē aētaēšāṃ aršnaṃ paoiryō yaṭ nā kasvikəmcina yāṇhuyanaṃ avarətanāṃ naire ašaone jasta ašaya vaṇhuya nōiṭ dadāiti.

35. hō maṃ avaθa vərənūiti yaθa anyāsciṭ aršānō avi xšudrā xšaθrišva ḥaṃ-vərənavaiṇti.

36. sraošō ašyō drujim apərəsaṭ apayūxtāt paiti vazrāt, druxš ax'āθre əvərəzike ciš aiṇhe asti uzvarəzəṃ.

37. āaṭ hē hā paiti-davata yā daēvi druxš, sraoša ašya huraoda aom aiṅhe asti uzvarəzəm yaṭ nā kasvikəmciṭ yāṅhuyanaṃ avarətanṃ naire ašaone ajasta ašaya vaṅhuya dadāiti.

38. hō maṃ avaṭa vərənaṃ nijaiṅti yaṭa vəhrkō caṭwarə-zangrō barəṭryāṭ haca puṭrəm niždarə-dairyāṭ.

39. sraošō ašyō drujim apərəsaṭ apayūxtāt paiti vazrāt, druxš ax'āṭre əvərəzike kō tē aētaēšam aršnaṃ bityō.

40. āaṭ hē hā paiti-davata yā daēvi druxš, sraoša ašya huraoda hō bā mē aētaēšam aršnaṃ bityō yaṭ nā paura frabda frabdō-drājō framaēzaiti.

41. hō maṃ avaṭa vərənūiti yaṭa anyāsciṭ aršānō avi xšudrā xšaṭrišva ḥam-vərənavaiṅti.

42. sraošō ašyō drujim apərəsaṭ apayūxtāt paiti vazrāt, druxš ax'āṭre əvərəzike ciš aiṅhe asti uzvarəzəm.

43. āaṭ hē hā paiti-davata yā daēvi druxš, sraoša ašya huraoda aom aiṅhe asti uzvarəzəm yaṭ nā pasca yaṭ usəhištāt θrigāim θriš ašəm upa-stuyāt biš humatanṃ θriš huxšaθrōtəmāi caṭwārō adāt ahunəm vairim frasrāvayoiṭ yeyḥe hātṃ frāyazāite.

44. hō maṃ avaṭa vərənaṃ nijaiṅti yaṭa vəhrkō caṭwarə-zangrō barəṭryāṭ haca puṭrəm niždarə-dairyāṭ.

45. sraošō ašyō drujim apərəsaṭ apayūxtāt paiti vazrāt, druxš ax'āṭre əvərəzike kō tē aētaēšam aršnaṃ θrityō.

46. āaṭ hē hā paiti-davata yā daēvi druxš, sraoša ašya huraoda hō bā mē aētaēšam aršnaṃ θrityō yaṭ nā x'aptō xšudrā frāraodayeite.

47. hō maṃ avaṭa vərənūiti yaṭa anyāsciṭ aršānō avi xšudrā xšaṭrišva ḥam-vərənavaiṅti.

48. sraošō ašyō drujim apərəsaṭ apayūxtāt paiti vazrāt, druxš ax'āṭre əvərəzike ciš aiṅhe asti uzvarəzəm.

49. āaṭ hē hā paiti-davata yā daēvi druxš, sraoša ašya huraoda aom aiṅhe asti uzvarəzəm yaṭ nā pasca yaṭ x'afnāda frabūidyamnō θriš ašəm upa-stuyāt biš humatanṃ θriš huxšaθrōtəmāi caṭwārō adāt ahunəm vairim frasrāvayoiṭ yeyḥe hātṃ frāyazāite.

50. hō maṃ avaṭa vərənaṃ nijaiṅti yaṭa vəhrkō caṭwarə-zangrō barəṭryāṭ haca puṭrəm niždarə-dairyāṭ.

51. āaṭ aošete spəṅtayāi ārmatəe, spəṅta ārmaite iməm tē narəm nistrinaomi iməm mē narəm nistrārayā upa sūrṃm frašō-kərətīm vīduš-gāṭəm vīduš-yasnəm paiti-parštō-sravaṅḥəm maždrəm haḍa-hunarəm tanu-maṭrəm.

52. āaṭ hē naṃa fradaiṭyā ātrə-dātəm vā ātrə-ciṭrəm vā ātrə-zaṅtūm vā ātrə-dahyūm vā kəmciṭ vā ātrə-dātahe naṃa.

53. sraošō ašyō drujim apərəsaṭ apayūxtāt paiti vazrāt, druxš ax'āṭre əvərəzike kō tē aētaēšam aršnaṃ tūiryō.

54. āaṭ hē hā paiti-davata yā daēvi druṣš, sraoša ašya huraoda hō bā mē aētaēšam aršnaṃ tūiryō yaṭ nā jahika pasca pañcadasīm sarəḍəm frapataiti anaiwyāsta vā anabdātō vā.

55. pasca tūirīm gāmō-bərətīm išarə pascaēta vaēm yōi daēva hakaṭ vaēm ava-mivāmahi hizvasca pivasca, [xšayamna pascaēta mərəγənte gaēθā astvaitiš ašahe yaθa zaṇda yātumənta mərəncīta gaēθā ašahe.]

56. sraošō ašyō drujim apərəsaṭ apayūxtāt paiti vazrāt, druṣš axʼāθre əvərəzike ciš aiṅhe asti uzvarəzəm.

57. āaṭ hē hā paiti-davata yā daēvi druṣš, sraoša ašya huraoda naēciš aiṅ he asti urvarəzəm

58. yaṭ nā jahika pasca pañcadasīm sarəḍəm frapataiti anaiwyāsta vā anabdātō vā.

59. pasca tūirīm gāmō-bərətīm išarə pascaēta vaēm yōi daēva hakaṭ vaēm ava-mivāmahi hizvasca pivasca, [xšayamna pascaēta mərəγənte gaēθā astvaitiš ašahe yaθa zaṇda yātumənta mərəncīta gaēθā ašahe.]

60. paiti maṃ ərəzvō pərəsaṅuha yim dadvāṅhəm spəništəmca vaēdištəmca paiti-vacištəmca parštəm avaθa tē aṅhaṭ vaṅhō avaθa aṅhāi spanyā yezi maṃ paiti-pərəsāṅhe.

61. pərəsaṭ zaraθuštrō ... ašāum kō θwāṃ yim ahurəm mazdāṃ mazištayanti inaoiti kō mazišta t̄baēšāṅha t̄baēšayeiti.

62. āaṭ mraoṭ ahurō mazdā, jahi bā ašāum zaraθuštra yō xšudrā haṃ-raēθwayeiti dahmanāṃ adahmanāṃca daēvayasnanāṃ adaēvayasnanāṃca tanu-pərəθanāṃ atanu-pərəθanāṃca.

63. θrišum apāṃ θraotō-stācāṃ taxmanāṃ pairištayeiti paiti-dīti zaraθuštra θrišum urvaranāṃ uzuxšyentīnāṃ srīranāṃ zairi-gaonanāṃ vaxšā apayasaitē paiti-dīti zaraθuštra.

64. θrišum spəntayā āratōiš varəṇā apayasaitē paiti-dīti zaraθuštra θrišum narš ašaonō frāyō-humatahe frāyō-hūxtahe frāyō-hvarštahe amaheca vərəθraγnaheca ašavastahēca apayasaitē paiti-pasti zaraθuštra.

65. tāscā tē mraomi spitama zaraθuštra jaθwō-tara yaθa ažyō xšvaēwāṅhō yaθa vā vəhrkāṅhō sravaṅhavō yaθa vā vəhrkām azrō-daiidīm gaēθāṃ avi frapataiti yaθa vā vazayāṃ hazarō-hunāṃ āpəm avi frapataiti.

66. paiti maṃ ərəzvō pərəsaṅuha yim dadvāṅhəm spəništəmca vaēdištəmca paiti-vacištəmca parštəm avaθa tē aṅhaṭ vaṅhō avaθa aṅhāi spanyā yezi maṃ paiti-pərəsāṅhe.

67. pərəsaṭ zaraθuštrō ... ašāum yō nāirikāṃ ciθravaitīm daxštavaitīm vohunavaitīm baoḍō vīdvā cikiθwā baoḍaṅuhaitīm vīθušīm avi-ciciθušīm xšudrā avi fraṅharəzaiti

68. kaṭ aiṅhe asti paititiš kaṭ aiṅhe asti āpərətiš kaṭ aētahe paiti varšta šyaθna ciciθwā azaēta.

69. āaṭ mraoṭ ahurō mazdā, yō nāirikam ciθravaitīm daxštavaitīm vohunavaitīm baoḍō vīḍvā cikiθwā baoḍaṇuhaitīm vīθušīm avi-ciciθušīm xšudrā avi fraṇharəzaiti

70. hazarəm anumayanam frāvinuyāt vīspanamca aētaēšam pasvam asmanivā zaoθra āθre ašaya vaṇhuya frabarōiṭ bāzva aiwyō vaṇhibyō frabarōiṭ.

71. hazarəm vazyanam aēsmanam xraoždvanam hušatam pairīstanam āθre ašaya vaṇhuya frabarōiṭ hazarəm vazyanam aēsmanam varədvānam urvāsnayā vā vohu-gaonahe vā vohu-kərətōiš vā hadānaēpatayā vā kamciṭ vā hubaoiḍītanam urvaranam āθre ašaya vaṇhuya frabarōiṭ,

72. hazarəm frastərətanam barəsmaine frastairyāt hazarəm zaoθranam haomavaitinam gaomavaitinam yaoždātanam pairiaṇharštanam dahmō-yaoždātanam dahmō-pairiaṇharštanam ham-irista aētayā urvarayā yā vaoce hadānaēpāta aiwyō vaṇhibyō ašaya vaṇhuya frabarōiṭ,

73. hazarəm ažinam udarō-θrašanam ava-janyāt duye hazarə anyaešamciṭ hazarəm vazyanam dādmānyanam ava-janyāt duye hazarə upāpanam hazarəm maoirinam dānō-karšanam ava-janyāt duye hazarə anyaešamciṭ,

74. θrisatəm frascimbananam frasciṇbayōiṭ tarasca āpō nāvayā hazarəm upāzananam upāzōiṭ aspāhe aštraya duye hazarə sraošō-caranaya.

75. taṭ aiṇhe asti paititiṭ taṭ aiṇhe asti āpərətīš taṭ aētahe paiti varšta šyaoθna ciciθwā azaēta.

76. yezi azāite təm ahūm paiθyāite yim ašaonam yezi nōiṭ azāite təm ahūm paiθyāite yim drvatam təmaṇhaēnəm təmasciθrəm təmaṇhəm. ašəm vohū.....

19.

1. apāxtaraṭ haca naēmāt apāxtaraēibyō haca naēmaēibyō fradvaraṭ aṇrō mainyuš pouru-mahrkō daēvanam daēvō, uiti davata hō yō duždā aṇrō mainyuš pouru-mahrkō, druxš upa-dvāra mərəṇcaṇuha ašaum zaraθuštra, druxš hē pairi-dvaraṭ būiti daēvō iθyejō maršaonəm davazā.

2. zaraθuštrō ahunəm vairīm frasrāvayaṭ, yaθā ahū vairyō ... vastārəm, āpō vaṇhiš frāyazaēta vaṇhuyā dāityayā daēnam māzdayasnīm fraorənaēta, druxš hē stərətō apa dvaraṭ būiti daēvō iθyejō maršaonəm davazā.

3. druxš hē paiti-davata, skutara aṇra mainyō nōiṭ hē aošō pairi-vaēnāmi spitamāi zaraθuštrāi pouru-x'arənaṇhō ašava zaraθuštrō, zaraθuštrō manəṇhō pairi-vaēnāt, daēva mē drvanṭō duždāṇhō aošəm ham-pərəsənte.

4. usəhištaṭ zaraθuštrō frašūsaṭ zaraθuštrō asarətō aka manəṇha xrūždya ṭbaēšō-parštanam asānō zasta dražimnō katō-masaṇhō həṇti ašava zaraθuštrō viṇḍəmnō daθušō ahurāi mazdāi, kva hē dražahe aiṇhā zəmə yaṭ paθanayā skarənayā dūraēpārayā drəjya paiti zbarahi nmānahe pourušaṣpahe.

5. uzvaēdayaṭ zaraθuštrō aṇrəm mainyūm, dužda aṇra mainyō janāni dāma daēvō-dātəm janāni nasuš daēvō-dātəm janāni pairikam yam xnaθaiti

yahmāi us-zayāite saošyās vərəθraja haca apaṭ kšaoyāt ušastaraṭ haca naēmāt ušastaraēibyō haca naēmaēibyō.

6. paiti ahmāi adavata duždāmō aṅrō mainyuš, mā mē dāma mərəncayuha ašāum zaraθuštra, tūm ahi pourušaspahe puθrō barəθryāt haca zāviši apa-stavaṇuha vaṇuhīm daēnaṃ māzdayasnīm viṇdāi yānəm yaθa viṇdaṭ vaḍayanō daijḥupaitiš.

7. paiti ahmāi avašata yō spitāmō zaraθuštrō, nōiṭ hē apa-stavāne vaṇuhīm daēnaṃ māzdayasnīm nōiṭ astaca nōiṭ uštānəmca nōiṭ baodasca vīurvīsyāt.

8. paiti ahmāi adavata duždāmō aṅrō mainyuš, kahe vaca vanāi kahe vaca apa-yasāi kana zaya hukərətāṅhō mana dāma aṅrō-mainyuš.

9. paiti ahmāi avašata yō spitāmō zaraθuštrō, hāvanaca taštaca haomaca vaca mazdō-fraoxta mana zaya asti vahištəm ana vaca vanāni ana vaca apa-yasāne ana zaya hukərətāṅhō āi dužda aṅra mainyō, daθaṭ spəntō mainyuš daθaṭ zrūne akarane fradaθən aməšā spənta huxšaθra huḍāṅhō.

10. zaraθuštrō ahunəm vairīm frasrāvayaṭ, yaθā ahū vairyō ... vastārəm, frāmraoṭ ašava zaraθuštrō, taṭ θwā pərəsā arš mē vaoca ahura.

11. pərəsaṭ zaraθuštrō ... ašāum drəjya paiti zbarahe ahurāi mazdāi vaṅhave vohu-maite aṅhānō ašāi vahištāi xšaθrāi vairyāi spəntayāi ārmatəe.

12. kuθa hiš azəm kərənāvāni haca avaṅhāt drujaṭ haca dužda aṅra mainyō kuθa ḥam-raēθwəm kuθa paiti-raēθwəm kuθa nasuš apayasāne haca avaṅhāt vīsaṭ yaṭ māzdayasnōiṭ kuθa narəm ašavanəm yaoždaθāni kuθa nāirikam ašaonīm yaoždāθrəm barāni.

13. āaṭ mraoṭ ahurō mazdā, nizbayaṇuha tū zaraθuštra vaṇuhīm daēnaṃ māzdayasnīm nizbayaṇuha tū zaraθuštra avaēn aməšā spənta avi haptō-karšvairīm zəm nizbayaṇuha tū zaraθuštra θwāšahe xʷadātahe zrvānahe akaranahe vayaoš uparō-kairyehe nizbayaṇuha tū zaraθuštra vātō taxmō mazdaḍātō spənta srīra duγḍa ahurahe mazdā,

14. nizbayaṇuha tū zaraθuštra fravašiš mana yaṭ ahurahe mazdā avam yam mazištəmca vahištəmca sraēštəmca xraoždištəmca xraθwištəmca hukərəptəmamca ašāt apanōtəmamca yeṅhe urva maθrō spəntō, xʷatō nizbayaṇuha zaraθuštra imaṭ dāma yaṭ ahurahe mazdā.

15. vaxšəm mē asəsaṭ zaraθuštrō, nizbayemi ahurō mazdā ašava dāma dātəm nizbayemi miθrəm vouru-gaoyaoitīm huzaēnəm xʷarənaṅjuhastəməm zayanam vərəθravastəməm zayanam nizbayemi sraošəm ašīm huraoḍəm snaiθiš zastaya dražimnō kamərəḍe paiti daēvanam.

16. nizbayemi maθrō spəntō yō aš-xʷarəna nizbayemi θwāšahe xʷadātahe zrvānahe akaranahe vayaoš uparō-kairyehe nizbayemi vātō taxmō mazdaḍātō spənta srīra duγḍa ahurahe mazdā nizbayemi vaṇuhīm daēnaṃ māzdayasnīm dātəm vīdōyūm zaraθuštra.

17. pərəsaṭ zaraθuštrō ahurəm mazdam, dātō vaṅhən ahura mazda kana yasna yazāne kana yasna frāyazāne imaṭ dāma yaṭ ahurahe mazdā.

18. āaṭ mraoṭ ahurō mazdā, urvaranaṃ uruθmyanaṃ ava-jasāhi spitama zaraθuštra srīra urusta amavaiti imaṭ vacō framrū, nēmō urvaire vaṇuhi mazdaḍāte ašaone ašəm vohū vahištəm astī... (1).

19. barəsma hē uzbārayaṭ aēšō-drājō yavō-fraθō mā hē barəsma pairi-kərətəm pairi-kərəntiš narō aṇhən ašavanō hāvōya zasta nyāsəmnō yazəmnō ahurəm mazdāṃ yazəmnō aməšē spəntē haomasca zāiriš bərəzō srīrāsca vohu manō rātaca vaṇuhi mazdaḍāta ašaone vahištō.

20. pərəsaṭ zaraθuštrō ahurəm mazdāṃ, vīspō-vīdvā ahura mazda axʹafnō ahi abanḥō tūm yō ahurō mazdā, vohu manō ḥəm-raēθwayeiti vohu manō paiti-raēθwayeiti ḥaca avanḥāt tanvaṭ yaṭ daēvō-jatayā daēva ḥəm-raēθwayeiti bvaṭ vohu manō yaoždātō.

21. āaṭ mraoṭ ahurō mazdā, gaomaēzəm ayasoīṭ zaraθuštra gaom pairi uxšānəm bixədrəm dāityō-kərətəm yaoždāta frabarōiš zṃm paiti ahuraḍātāṃ pairi-karšəm pairi-karšōīṭ aēšō nā yō yaoždāθryō.

22. satəm ašō-stūitināṃ upastvōiš bižvaṭ ahunəm vairīm frasnāvayōiš, catura frasnana frasnayōīṭ gaomaēzəm gava dātayā biš āpəm mazdaḍātayā.

23. yaoždāta bun vohu manō yaoždāta bun mašyō uzgəurvayāṭ vohu manō hāvōya bāzvō dašinaca dašina bāzvō hāvayaca, āaṭ vohu manō nidaiōiš sūrō-θwarštanāṃ raocanḥāṃ yaṭ hē stārāṃ bayō-dātanāṃ aiwi raocayānte vīspəm ā ahmāt yaṭ hē nava xšafna sacānte.

24. āaṭ pasca nava-xšaparāt āθre zaoθrā frabarōiš xrūždranāṃ aēsmanāṃ āθre frabarōiš vohu-gaonanāṃ baoiḍināṃ āθre frabarōiš vohu manō ā-baoḍayaēta.

25. yaoždāta bun vohu manō yaoždāta bun mašyō uzgəurvayāṭ vohu manō hāvōya bāzvō dašinaca dašina bāzvō haoyaca fravaocaṭ vohu manō, nēmō ahurāi mazdāi nēmō aməšaēibyō spəntāēibyō nēmō anyaēšāṃ ašaonāṃ.

26. pərəsaṭ zaraθuštrō ahurəm mazdāṃ, vīspō-vīdvā ahura mazda ḥaxšāne narəm ašavanəm ḥaxšāne nāirikāṃ ašaonīm ḥaxšāne drvatāṃ daēvayasnanāṃ mərəzujītim mašyānāṃ zṃm ahuraḍātāṃ nipārayanta āpəm tacintāṃ yavanāṃ uruθmāṃ anyāṃ hē avarətāṃ nipārayanta, āaṭ mraoṭ ahurō mazdā, ḥaxšaēša ašāum zaraθuštra.

27. dātārē ... dva tā dāθra bavaiṇti dva tā dāθra pārayeiṇti dva tā dāθra pairi-bavaiṇti dva tā dāθra paiti ḥanjasənti mašyō astvaiṇti aṇḥvō havāi urune para-daiḍyāṭ.

28. āaṭ mraoṭ ahurō mazdā, pasca para-iristahe mašyehe pasca frasaxtahe mašyehe pasca pairiθnəm dərəniṇti daēva drvanθō duždāṇhō, θrityā xšapō vīusaiti uši raocaiti bāmya gairināṃ ašaxʹāθranāṃ āsənaoiti miθrəm huzaēnəm hvarəxšaētəm uzvōraiti,

29. vīzarəšō daēvō nāma spitama zaraθuštra urvānəm bastəm vāḍayeiti drvatāṃ daēvayasnanāṃ mərəzujītim mašyānāṃ, paθāṃ zrvō-dātanāṃ

jasaiti yasca drvaite yasca ašaone cinvaṭ-pərətūm mazdaḍātām baodasca urvānəmca yātəm gaēthanam paiti-jaiḍyeiṇti dātəm astvaiṇti aṅhvō.

30. hāu srīra kərəta taxma huraoḍa jasaiti spānavaiti nivavaiti pasvaiti yaoxštavaiti hunaravaiti, [hā drvatām aṅəm urvānō tēmō-hva nizaršaitē,] hā ašāunam urvānō tarasca haraṃ bərəzaitīm āsənaoiti tarō cinvatō pərətūm viḍārayeiti haētō mainyavanam yazatanam.

31. usəhištaṭ vohu manō haca gātvō zaranyō-kərətō fravaocaṭ vohu manō, kaḍa-nō ida ašāum agatō iṭheyajhataṭ haca aṅhaoṭ aiṭyajanham ahūm ā.

32. xšnūtō ašaonam urvānō pārāyeiṇti avi ahurahe mazdā avi aməšanam spəntanam avi gātvō zaranyō-kərətō avi garō nmānəm maēthanəm ahurahe mazdā maēthanəm aməšanam spəntanam maēthanəm anyaešam ašaonam.

33. yaoždāṭryō ašava pasca para-iristīm daēva drvaṇtō duždāṅhō baodəm avaṭa fratərəsəṇti yaṭa maeši vəhrkavaiti vəhrkaṭ haca fratərəsaiti.

34. narō ašavanō ham-bavaiṇti nairyō saṅhō ham-bavaiti aštō mazdā ahurahe mrūiḍi nairyō saṅhō, x'atō nizbayanuḥa zaraṭuštra imaṭ ḍama yaṭ ahurahe mazdā.

35. vaxšəm mē asəšaṭ zaraṭuštrō, nizbayemi ahurō mazdā ašava dāmi-dātəm nizbayemi zaṃ ahuraḍātām āpəm mazdaḍātām urvaram ašaonīm nizbayemi zrayō vourukašəm nizbayemi asmanəm x'anvaṇtəm nizbayemi anayra raocā x'adātā.

36. nizbayemi vahištəm ahūm ašaonam raocaṅhəm vispō-x'āθrəm nizbayemi garō nmānəm maēthanəm ahurahe mazdā maēthanəm aməšanam spəntanam maēthanəm anyaešam ašaonam nizbayemi misvānahe gātvahe x'adātahe cinvaṭ-pərətūm mazdaḍātām.

37. nizbayemi saokam vaṅuhīm vouru-dōiθraṃ nizbayemi uyrā ašāunam fravašayō vīspā dāmaṅ savaṅuhaitiš nizbayemi vərəθraynəm ahuraḍātəm barō-x'arənō mazdaḍātəm nizbayemi tištrīm stārəm raēvaṇtəm x'arənaṅuhaṇtəm gəuš kəhrpa zaranyō-sravahe.

38. nizbayemi gāṭabyō spəntābyō ratuxšaθrabyō ašaonibyō nizbayemi ahunavaiṭyā gāṭayā nizbayemi uštavaiṭyā gāṭayā nizbayemi spəntā-mainyēuš gāṭayā nizbayemi vohuxšaθrayā gāṭayā nizbayemi vahištōištōiš gāṭayā.

39. nizbayemi avat karšvarə yaṭ arəzahe savahe nizbayemi avat karšvarə yaṭ fradaḍafšu vīdaḍafšu nizbayemi avat karšvarə yaṭ vouru-barəšti vouru-jarəšti nizbayemi imaṭ karšvarə yaṭ x'aniraθəm bāmīm nizbayemi haētuməntəm raēvaṇtəm x'arənaṅuhaṇtəm nizbayemi ašōiš vaṅhuyā [cistōiš vaṅhuyā] nizbayemi razištayā cistayā nizbayemi x'arənō airyanam dahyunam nizbayemi x'arənō yimāi xšaētāi hvəθwāi.

40. yaštō xšnūtō friθō paiti-zaṇtō sraošō ašyō huraoḍō vərəθraja sraošō ašyō, āθre zaoθrā frabarōiš xrūždranam aēsmanam āθre frabarōiš vohugaonanam baoiḍinam āθre frabarōiš ātrəm vāzištəm frāyazaēša daēcum janəm spəṅjayrīm, x'āsta x'arəθā frabarōiš pərənam viyžārayeṇtīm.

41. sraoṣō aṣyō frāyazaēša, sraoṣō aṣyō daēum kuṇḍem baṅhəm vībaṅhəm ava-janyāt drujaskaṅəm ḥəm-pataiti drvatəm daēvayasnaṅəm mərəzujītim mašyāṅəm [nazdištā daiṅhāvō yaoždāθryāt haca frakaire frakərənaoṭ vāstre vərəzyōiṭ pasuš-xʷarəθəm gave xʷarəθəm].

42. nizbayemi karō masyō upāpō būne jafranaṅəm vairyaṅəm nizbayemi mərəzu pourvō-xʷadātō yūidištō mainivā dāmaṅ nizbayemi hapta sraoṣō bāmya hvāṅhō puθrāṅhō pusāṅhō bavaiṅti.

43. fradavata vidavata
framanyata vimanyata
aṅrō mainyuš pouru-mahrkō

daēvanāṅm daēvō iṅdrō daēvō saoru daēvō nāṅhaiθəm daēvō taurvi zairica aēšəməm xrvī-drūm akatašəm daēum zyāṅm daēvō-dātəm iθyejō maršaonəm zaurva duždāfədrō kərənaoiti, būiti daēvō driwiš daēvō daiwiš daēvō kasviš daēvō paitišō daēvō daēvanāṅm daēvōtəmō.

44. daēvō ulti davata hō yō duždā aṅrō mainyuš pouru-mahrkō, cim ḥəm-bərəθa ḥəm-bārayama daēva drvaṅtō duždāṅhō arəzūrahe paiti kamərəðəm.

45. advarəṅta adāuṅta
daēva drvaṅtō duždāṅhō
uruθəṅta adāuṅta
daēva drvaṅtō duždāṅhō
aṅəm daoθrīm dāuṅta
daēva drvaṅtō duždāṅhō,
iməm nō ḥəm-bərəθa ḥəm-bārayama arəzūrahe paiti kamərəðəm.

46. zātō bē yō ašava zaraθuštrō nmānahe pourušašpahe kva hē aošō viṅdāma hāu daēvanāṅm snaθō hāu daēvanāṅm paityārō hāu druxš vidruxš, nyāncō daēvayāzō nasuš daēvō-dātō draogō miθaoxtō.

47. adāuṅta advarəṅta daēva drvaṅtō duždāṅhō būnəm aṅhəuš təmaṅhahe yaṭ ərəyatō daožanuhahe.

ašəm vohū.....

20.

1. pərəsaṭ zaraθuštrō ... ašāum kō paoiryō mašyāṅəm θamnaṅuhataṅm varəcaṅuhataṅm yaoxštivatāṅm yātumatāṅm raēvatāṅm taxmanāṅm parađātāṅm yaskəm yaskāi dārayaṭ mahrkəm mahrkāi dārayaṭ vazəmnō-aršti dārayaṭ āθrō tafnuš dārayaṭ tanaoṭ haca mašyehe.

2. āaṭ mraoṭ ahurō mazdā, θritō paoiryō spitama zaraθuštra mašyāṅəm θamnaṅuhataṅm varəcaṅuhataṅm yaoxštivatāṅm yātumatāṅm raēvatāṅm taxmanāṅm parađātāṅm yaskəm yaskāi dārayaṭ mahrkəm mahrkāi dārayaṭ vazəmnō-aršti dārayaṭ āθrō tafnuš dārayaṭ tanaoṭ haca mašyehe.

3. višciθrəm dim ayasata āyapta xšaθra vairya paitištātē yaskahe paitištātē mahrkahe paitištātē dāžu paitištātē tafnu paitištātē sāranahe paitištātē sārastyehē paitištātē ažanahe paitištātē ažahvahe paitištātē kuruyahe paitištātē aživākahe paitištātē drukahe paitištātē astairyehē paitištātē ayašyā pūityā āhityā yā aṇrō mainyuš frākərəntaṭ avi iməṃ tanūm yaṃ mašyānaṃ.

4. aḍa azəm yō ahurō mazdā urvarā baēšazyā uzbarəm paoiriš pouru-satā paoiriš pouru-hazaṇrā paoiriš pouru-baēvanō ōyum gaokərənəm pairi.

5. taṭ višpəm frīnāmahi taṭ višpəm fraēšyāmahi taṭ višpəm nəmahyāmahi avi iməṃ tanūm yaṃ mašyānaṃ

6. paitištātē yaskahe paitištātē mahrkahe paitištātē dāžu paitištātē tafnu paitištātē sāranahe paitištātē sārastyehē paitištātē ažanahe paitištātē ažahvahe paitištātē kuruyahe paitištātē aživākahe paitištātē drukahe paitištātē astairyehē paitištātē ayašyā pūityā āhityā yā aṇrō mainyuš frākərəntaṭ avi iməṃ tanūm yaṃ mašyānaṃ.

7. yaskəm θwəṃ paiti-saṇhāmi mahrkəm θwəṃ paiti-saṇhāmi dāžu θwəṃ paiti-saṇhāmi tafnu θwəṃ paiti-saṇhāmi sāranahe θwəṃ paiti-saṇhāmi sārastyehē θwəṃ paiti-saṇhāmi ažanahe θwəṃ paiti-saṇhāmi ažahvahe θwəṃ paiti-saṇhāmi kuruyahe θwəṃ paiti-saṇhāmi aživākahe θwəṃ paiti-saṇhāmi drukahe θwəṃ paiti-saṇhāmi astairyehē θwəṃ paiti-saṇhāmi ayašyā pūityā āhityā yā aṇrō mainyuš frākərəntaṭ avi iməṃ tanūm yaṃ mašyānaṃ.

8. yeṇhe varəda vanaēma drujim druje varəda vanaēma yeṇhe xšaθrəm aojəṇhvaṭ maibyō ahura.

9. paiti-pərəne ašire paiti-pərəne ayūire paiti-pərəne ayraṃ paiti-pərəne uyraṃ paiti-pərəne yaskahe paiti-pərəne mahrkahe paiti-pərəne dāžu paiti-pərəne tafnu paiti-pərəne sāranahe paiti-pərəne sārastyehē paiti-pərəne ažanahe paiti-pərəne ažahvahe paiti-pərəne kuruyahe paiti-pərəne aživākahe paiti-pərəne drukahe paiti-pərəne astairyehē paiti-pərəne ayašyā pūityā āhityā yā aṇrō mainyuš frākərəntaṭ avi iməṃ tanūm yaṃ mašyānaṃ.

10. paiti-pərəne višpəm yaskəmca mahrkəmca višpe yatavō pairikāsa višpā janyō yā drvaitiš.

11. ā airyēmā išyō rafədrāi jaṇtū nərəbyascā nāiribyascā zaraθuštrahe vanhəuš rafədrāi manaṇhō yā daēnā vairim hanāt mīzdəm ašahyā yāsā ašim yaṃ išyāṃ ahurō masatā mazdā.

12. jaṇtu ā-airyēmā-išyō višpəm yaskəmca mahrkəmca višpe yatavō pairikāsa višpā janyō yā drvaitiš.

13-14. yaθā ahū vairyō ... māmərəncainiš gaēθā astvaitiš ašahe.

ašəm vohū.....

21.

1. nəmasə-tē gaospənta nəmasə-tē gaoš hudā nəmasə-tē frādənte nəmasə-tē varədənte nəmasə-tē dāθrō baxtəm vahištai ašaone anazaθāi ašaone yā jahi mərəncāite ašəmaoyō anašava mašyasca drvā sāsta.

2. yayata dunma yayata frā-āpəm nyāpəm upa-āpəm hazarō-vārayō baēvarō-vārasciṭ mruyā ašāum zaraθuštra, yaskahe apanaštahe mahrkahe apanaštahe jaini-yaskahe apanaštahe jaini-mahrkahe apanaštahe gaḍahe apa-gaḍahe apanaštahe.

3. yezi uzīrō-hva mərəncaite arəzahva bišazyāt yezi arəzahva mərəncaite xšapō-hva bišazyāt yezi xšapō-hva mərəncaite ušahva bišazyāt vi-vārənti vi-vārāhu nava āfš nava zā nava urvarā nava baēšazā navata baēšaza-kəša.

4. yaθa zrayō vouru-kašəm apō asti hanjaγmanəm usihišta həm-yaētānhō yaonəmca avi zəmca zəmca avi yaonəmca usihišta pāiri-haēzanuha yehe zəθaēca vaxšaēca yaonəm daḍāt ahurō mazdā.

5. uzayara uzīra hvarəxšaēta aurvaṭ-aspā tarasca harəm bərəzaitīm raoxšnəm kərənavāhi dāmahva təmciṭ uzīra

yezi ahi garō dərətəm
mazdaḍātəm paiti paṇtəm
baγō-baxtəm paiti yaonəm
fraθwarštəm paiti āfəntəm.

6. [āat ana parō duš-kərəta] āat ana parō maθrō spəntō, frā-tē zəθəmca vaxšaθəmca azəm ida frasnayeni frā tē kəhrəmca təvišimca yaoždaθāni kərənaomi θwəm hacat-puθrəm hacat-paēmanyəm.

7. kāravaiti paēmavaiti xšvīptavaiti raoγnavaiti mazgavaiti frazaiṇtivaiti frā-tē hazarəm xəm azəm ida frasnayeni gaodanəm avi hančinā yaṭ asti puθrahe θrimō.

8. yaθa zrayō ... yehe zəθaēca vaxšaēca zəm daḍāt ahurō mazdā.

9. uzayara uzīra māṇha gaociθra tarasca harəm bərəzaitīm raoxšnəm kərənavāhi dāmahva təmciṭ uzīra yezi ahi garō dərətəm mazdaḍātəm paiti paṇtəm baγō-baxtəm paiti yaonəm fraθwarštəm paiti āfəntəm.

10. [āat ana parō duš-kərəta] āat ana parō maθrō spəntō, frā-tē zəθəmca vaxšaθəmca azəm ida frasnayeni frā-tē kəhrəmca təvišimca yaoždaθāni kərənaomi θwəm hacat-puθrəm hacat-paēmanyəm.

11. kāravaiti paēmavaiti xšvīptavaiti raoγnavaiti mazgavaiti frazaiṇtivaiti frā-tē hazarəm xəm azəm ida frasnayeni gaodanəm avi hančinā yaṭ asti puθrahe θrimō.

12. yaθa zrayō vourukašəm apō asti hanjaγmanəm usihišta həm-yaētānhō yaonəmca avi zəmca zəmca avi yaonəmca usihišta pāiri-haēzanuha yehe zəθaēca vaxšaēca vaxšəm daḍāt ahurō mazdā.

13. uzayara uzīra stāra gufra afšciθrānhō tarasca harəm bərəzaitīm raoxšnəm kərənavāhi dāmahva təmciṭ uzīra yezi ahi garō dərətəm mazdaḍātəm paiti paṇtəm baγō-baxtəm paiti yaonəm fraθwarštəm paiti āfəntəm.

14. [āaṭ ana parō duš-kərəta] āaṭ ana parō maθrō spəntō, frā-tē zaθəmca vaṣšaθəmca azəm ida frasnayeni frā-tē kəhrpəmca təvīšimca yaoždaθāni kərənaomi θwaṃ hacat-puθraṃ hacat-paēmanyam.

15. kāravaiti paēmavaiti xšviptavaiti raoynavaiti mazgavaiti frazañtivaiti frā-tē hazaṇrəm xam azəm ida frasnayeni gaodanəm avi hañtacinā yaṭ asti puθrahe θrimō.

16. yaθa zrayō vourukašəm apō asti hañjaγmanəm usihišta ham-yaētāṇhō yaonəmca avi zəmca zəmca avi yaonəmca usihišta pāiri-haēzaṇuha yehe zaθaēca vaṣšaēca uzayarəm daḍāt ahurō mazdā.

17. uzayara uzīra paxrušta hī kaxuži paxrušta hī ayehye paxrušta hī yātumaiti jahi.

18-23. paiti-pərəne ašire ... astvaitiš ašahe.

ašəm vohū.....

22.

1. mraot ahurō mazdā spitamāi zaraθuštrāi,
azəm yō ahurō mazdā
azəm yō dāta vaṇhvam
yasə-taṭ nmānəm ākərənəm srīrəm raoxšnəm frādərəsrəm
uzayeni pārayeni.

2. āaṭ maṃ mairiyō ākaṣaṭ
āaṭ maṃ mairiyō frākərənaot
aṇrō mainyuš pouru-mahrkō

navaca yaskē navaitišca navaca sata navaca hazaṇra navasōsca baēvān
āaṭ maṃ tūm bišazyōiš maθrō spəntō yō aš-x^varənā.

3. daθāni tē aētahe paiti hakaṭ hazaṇrəm aspanam aurvatō dərəzi-takanam yazāi saoka vaṇuhi mazdaḍāta ašaoni, daθāni tē aētahe paiti hakaṭ hazaṇrəm uštranam urvatō saēni-kaofanam yazāi saoka vaṇuhi mazdaḍāta ašaoni.

4. daθāni tē aētahe paiti hakaṭ hazaṇrəm gavam aṣšaēnanam apərətō-tanunam yazāi saoka vaṇuhi mazdaḍāta ašaoni, daθāni tē aētahe paiti hakaṭ hazaṇrəm anumayanam harətō vīspō-gaonanam yazāi saoka vaṇuhi mazdaḍāta ašaoni.

5. uta tē azəm āfrīnāni srīra dahma āfriti friθa dahma āfriti
yā ūnəm pərənəm kərənaoiti
pərənəmciṭ vīγžārayeiti
avañtəmciṭ baṇdayeiti
bañtəmca drūm kərənaoiti.

6. paiti ahmāi avašata
maθrō spəntō yō aš-x^varənā,
kuθa tē azəm bišazāni kuθa tē azəm apa-varāni navaca yaskē navaitišca
navaca sata navaca hazaṇra navasōsca baēvān.

7. nairyō saṅhō aocayata
 yō daḍvā ahurō mazdā,
 nairyā saṅha vyāxana
 para-āiḍi upa-vazaṅuha
 avi nmānəm airyamaini
 imaṭ saṅhōiš airyamanāi,

8. imaṭ tē saṅhaṭ ahurō mazdā ašava, azəm yō ahurō mazdā azəm yō dāta
 vaṅhvam yasə-taṭ nmānəm ākərənəm srīrəm raoxšnəm frādərəsrəm uzayeni
 pārayeni,

9. āaṭ məm mairyō ākasat āaṭ məm mairyō frākərənaoṭ aṅrō mainyuš
 pouru-mahrkō navaca yaskō navaitišca navaca šata navaca hazanra
 navasəšca baēvaṅ āaṭ məm tūm bišazyōiš airyama yō išyō.

10-12. daθāni ... kərənaoiti.

13. ahe vacō paityesti
 para-āiḍi upa-vazata
 nairyō saṅhō vyāxanō
 avi nmānəm airyamaini
 imaṭ saṅhaṭ airyamanāi,

14-18. imaṭ tē saṅhaṭ ahurō mazdā ašava, azəm yō ahurō mazdā ...
 kərənaoiti.

19. mošu taṭ ās nōiṭ darəḡəm yaṭ frāyatayaṭ θwaxšəmnō airyama yō išyō
 gairīm avi spəṅtō-frasnā
 varəšəm avi spəṅtō-frasnā.

20. navanəm aspanəm aršnəm gaonəm baraṭ airyama yō išyō navanəm
 uštranəm aršnəm gaonəm baraṭ airyama yō išyō navanəm gavəm aršnəm
 gaonəm baraṭ airyama yō išyō navanəm anumayanəm aršnəm gaonəm baraṭ
 airyama yō išyō nava vaētayō baraṭ nava karšā frakārayaṭ.

21-26. paiti-pərəne ašire ... ašahe.

ašəm vohū.....

.....

nāismī daēvō, aēvō paṅtā yō ašahe vīspe anyāēšəm apəṅtəm.

..

.